




756  
B. 10. B.

Eng. title  
+ 19 plates



Digitized by the Internet Archive  
in 2017 with funding from  
Getty Research Institute



ANTIGRAPHEVS

Siue

CONSCIENCIA

HOMINIS

R. P. H. DREXELII.



Antverpiæ.

Apud Viduam J. Chobbari. A.º 1655.



ANTIGRAPHEUS

Sive

CONSCIENCIA  
HOMINIS,

Coram

SERENISSIMO  
MAXIMILIANO  
ELECTORE BAVARO,

Illustrata:

per

R. P. HIEREMIAM  
DREXELIUM SOC: JESU.

ANNO 1632.

Nunc primum,

*Cum facultate superiorum &  
Privilegio.*

COLONIÆ AGRIPPINÆ,

---

Apud JODOCUM KALCOVIUM,  
ET SOCIOS.

Anno 1655.



SERENISSIMO PRINCIPI

ac

DOMINO, DOMINO  
ERNESTO

HASSIÆ LANDGRAVIO,  
PRINCIPI HIRSFELDENSIS, CO-  
MITI Cattimeliboci, Deciae,  
Ziegenhainj Niddæ &  
Schavvenburg, &c.

DOMINO SVO CLEMEN-  
TISSIMO.

**Q**Uod Regum fasti de  
Saule memorant, illum  
aliud agendo, ad Sa-  
muelelem fortuito delatum; ibi-  
que epulo adhibitum, etiam  
ferculo lautiore honoratum es-  
se: hoc nemo non dixerit Cel-  
situdini Tuæ contigisse, Prin-  
ceps Serenissime; simul ac li-  
belli huius Auctorem, Aucto-  
risque Patronum inspexerit.

A 3

Nam

# DEDICATIO.

Nam quòd Armum Prophetes  
 asservari præceperit Hospiti,  
 nec invitato, neque convivium  
 vel per somnium cogitanti, id  
 Numinis instinctu est factum;  
*auriculam Samueli revelantis a:*  
 quod convivator ipse insinua-  
 bat, cum diceret: *Ecce quod re-*  
*mansit: pone ante te, & comede,*  
*quia de industria servatum est ti-*  
*bi b.* Numinis videlicet nutu in  
 populi sui Caput Saulem desti-  
 nantis. Armum enim futuro  
 Regi vel dignitatis indicium,  
 vel oneris brevi subeundi pro-  
 gnosticum volebat esse.

Ita profectò se res habet cum  
 Antigrápheo nostro, cum li-  
 bello de Conscientia hominis  
 conscripto, quem optimus Pa-  
 ter Hieremias Drexelius in vi-  
 vis

# DEDICATIO.

vis promiserat, & inter posthumos plures alios reliquerat; æquè suis absolutum numeris & propria manu exaratum, atque alios, qui publicum iam dudum aspexêre. Remansit, tamen iste; ut reor, non sine fato, (cum altero aliquo itidem in lucem prope diem prodituro,) ut in hominum manus hæctenus non veniret.

Quo inquis fato? certè non alio, Princeps Serenissime, quàm quòd arcano Numinis consilio Tibi præ aliis quam pluribus Magnatum destinatus esset: non alio fato, quàm ut Tibi aliud agendo hac transeunti, sicut Sauli armus, nihil cogitanti, consecraretur: non alio, quam quòd Tibi ex argumento suo debeatur.

# D E D I C A T I O.

Materia libelli de qua agitur  
Conscientia est, quam quidem  
Drexelius fartam tectam inter  
homines cupit, variisque ratio-  
nibus atque momentis, quàm  
potest validissimè, adnititur  
commendare; at nunquam ita  
efficaciter calamo suo, quàm tu  
Illustrissimo, quocunque te  
confers, exemplo mortalibus  
persuadebit. Nimis enim quam  
certum est, quod Annæus iam  
olim effatus. *Longum iter est per  
præcepta, breve & efficax per  
exempla* a. Tibi ô Princeps de  
industria servatus est; Tibi li-  
bellus inscribendus erat, non  
tam ut Patrocinium ab authori-  
tate contra malevolos haberet,  
quam ut virtus tua (utpote Con-  
scientiæ Cultoris strenuissimi)  
quod



# DEDICATIO.

quod rationes scriptoris apud Lectorem minus possent, potenti exemplo impetraret.

Tu enim conspecto libelli argumento cum Paulo dicere potes : *In hoc & ipse studeo, sine offendiculo Conscientiam habere ad Deum & homines semper ;*  
*a* Qui à primis vnguiculis ita educatus esse perhiberis, vt pueritiam etiam egressus, eius tamen adhuc integritatis maneres, vt inter dexteram sinistram-ue quid interesset, *b* vixdum perspiceres : non vitio mentis hebetioris, sed innocentis beneficio educationis. Ex qua, tametsi aliunde, sive, à natalibus sive naturæ dotibus inglorius fuisses, abunde sat ornamenti,

A 5 tuæ

*a* *Actor.* 24. 16.

*b* *Iona* 4. 11.

# DEDICATIO.

tuæ scilicet testimonium Conscientiæ haberes.

Superfedemus particulatim actiones tuas , ad amissim exigi solitas recensere : ne assentationis , quam in aliis improbanus , notam ipsi incurramus. Vnum tamen illud generosissimum facinus (quod instar omnium esse possit , quodque Orbi huic nostro pœne vniverso , quia tantum innotuit , ) quin amplius pensitemus animo , styloque exornemus , nemo prohibuerit : quando id ipsum Conscientiæ tam studiosus , Paulus ad Galatas , in Domino gloriabundus ostentauit. Quid illud , inquis ? Conscientiæ sollicitudinem curamque cui se ex integro addictum deditumque aliàs asseruisset.

*Cum*

## D E D I C A T I O.

*Cum placuit ei, ait Aposto-  
lus, qui me segregavit ex utero  
matris meae, & vocavit per gra-  
tiam suam, ut revelaret Filium  
suum in me, ut euangelizarem  
illum gentibus: Continuo non ac-  
quievi carni & sanguini. a &c,*

*Quod Augustinus ita inter-  
pretatur. Segregatur quodam-  
modo de ventre Matris, quisquis  
à carnaliam parentum consuetu-  
dine caca separatur: acquiescit  
autem carni & sanguini quisquis  
carnalibus propinquis & consan-  
guineis suis carnaliter suadenti-  
bus assentitur b. Hoc Paulus fe-  
cit. Ille tam abundans traditio-  
num paternarum emulator. Ille  
minarum & cedis spirans Perse-  
cutor, qui Dei Ecclesiam supra  
modum persecutus, eam expu-  
gnatum*

*a Gal.c.1.v.15. b Aug.in le.1.4.*

# D E D I C A T I O.

gnatum extirpatumque ibat. Et momentô tamen in Agnum abiit ex Lupo, simul boni & benignissimi Pastoris de Cœlo seu minas seu monita inaudiit : *Saule Saule : &c. Continuò non acquievit carni & sanguini quin manibus pedibusque in vocantis voluntatem sese resignaret, mutato clypeo tantum de reliquo in Judaïsmum pugnaturus, quantû ad id temporis eundem propugnasset. Idque non alio ex capite,quàm quòd Conscientiam ad Deum & homines habere sine offendiculo semper studuisset.*

Quisquis hoc ipsum de E R N E S T O dixerit nostro, quod res est, dixerit, nihil auribus tribuendo : utpote cui non minus periculi à carne, à sanguine,quàm Paulo tunc à Coatanis

*neis*

# DEDICATIO.

*neis ingenere*, à Sacerdotum Principibus, quorum legationeungebatur, potuit imminuisse. Nunquidenim à ventre Matris, non segregatus est, qui à cæca parentum consuetudine tam se animosus expedit? cum valere tenebras jussit, in quas postremi & proximi progenitorum, nuper admodum à majorum suorum clarissima Fidei luce, per fraudem sunt abducti? cum carnalibus propinquis carnaliter suadentibus, aut prudentissime obsurduit, aut cordatissimè occurrit.

Et hoc quidem eo rerum statu ac tempore, quo Adversarii suarum partium non modica sperabant incrementa; nostrarum contra interitū plus quam præsentem somniabant. An-  
non

# DEDICATIO.

non debebat Princeps ER-  
NESTUS conceptas bonæ  
mentis scintillas more aliorum  
non paucorum Magnatū, idem  
quandóque parturientium, tan-  
tis per sub cinere fovere? quo-  
ad æstus heterodoxorum, ab  
armis recens positis nondum  
planè sopitus, magis ac magis  
deferbuisset? Aut spes illa, quæ  
modò in herba est, plenius in  
messem adoleuisset? Ita nec  
odio Acatholicorum sese vnus  
unicus obiecisset, aut offensam  
si quampiam cum aliis incurris-  
set, certè calamitatis optatum è  
confortio plurimum levamen  
accepisset.

Hæ tales tam carnis quam  
sanguinis argutiæ, quantumvis  
multis in arietem possint esse,  
quo animis dejecti concidant

# DEDICATIO.

aut saltem in ruinam inclinentur : Paulo tamen alicui, Paulique æmulo ; ERNESTO dixerim nostro , ut rigidissimo Conscientiæ Custodi in Fidei non leve serviêre stabilimentum. Vnde mirum non est , si libellus hic noster Conscientiæ Hunc sibi è millibus Patronum vnicum vendicet : si de industria Huic ipsi divinitus servatus dicatur : Eique quàm demississimè à nobis dedicetur, repetitis Prophetæ verbis: *Ecce quod remansit* : Princeps Sere-  
nissime: *pone ante Te & comede; Tibi enim de industria servatum est.* Non Armum , sed librum cape sis, qui lectionem refectio-  
ni corporis frequenter præfer-  
re soles : librum accipe , non qualem Ioannes ab Angelo qui  
ventrem

# D E D I C A T I O.

ventrem amaricari faciat :  
*a* (quod Patrono evenire pos-  
 set , Conscientiæ suæ parum  
 studioso : ) sed similem volu-  
 mini , quod Ezechieli porre-  
 ctum in ore fiebat sicut mel  
 dulce *b*.

Huiusmodi noster, quem of-  
 ferimus , Liber est, qui tua non  
 minùs mellita reddet legentis  
 labia, quàm Dei eloquia Davi-  
 dis fauces. Reddet enim testi-  
 monium Conscientiæ tuæ de  
 integritate , Tibique spem non  
 dubiam ingeret de libro longè  
 beatissimo: de libro Vitæ. Vale,  
 Princeps Serenissime; & quam  
 Drexelius scripto docuit, Tu  
 factis excolere Conscientiam,  
 uti hætenus consuevisti, stre-  
 nuè

*a* Apoc. 10. 9.

*b* Ezech. 3. 3.

*c* Ps. 118.



**D E D I C A T I O.**

nuè perſeueræ. Neoburgi. Cal.  
Novemb. Feſto Die omnium  
Sanctorum. Anno 1652.

**Serenitati Tuæ**

**Devotiſſimum**

**Collegium Societatis  
Jesu Neoburgi.**

**B**

**A D**

## AD LECTOREM.

**P**osset *Antigrápheus Drexelij* supposititius tibi videri, *Amice Lector*; quòd longe pòst in lucem veniat, quàm posthumi plures publicati, & opuscula omnia in geminos contracta sunt tomos. At ubi *P. Philippi Allegambe* de scriptoribus Societatis inspexeris catalogum; & *Iconem* operibus *Drexelij* præfixam, facile errorem, qui intervenerat, deprehendes: Nam ille tibi & *Antigrápheum*, & *Iobum* disertissimis verbis promittit; & ista utrumque libellum per symbola clarissimè repræsentat. Nihil enim utrique deerat, eleganti caractere pro typo ab ipso authore descripto, quàm quod frontispicio carerent, capitum inscriptionibus, nec instar aliorum, compacti essent. Hic ludicrus error tam utili scriptione te hætenus privavit. Tuum erit modò agnoscere, & in horas proditurum etiam alterum, scilicet *Iobum*, benevolè acceptare. Vale.

## C O N S C I E N T I A

sive

## A N T I G R A P H E U S

## H O M I N I S.

## C A P U T I.

*Quid sit Conscientia?*

N ullum animalium alteri tam dissimile in multis atque homini Homo. Prima dissimilitudo vultûs miraculum censi potest. Nobilissimus encomiastes naturæ Plinius, ut rem mirissimam obstupescens : In facie , inquit, vultûque nostro cum sint decem aut paulo plura membra , nullas duas in tot millibus hominum indiscretas effigies existere , quod ars nulla in paucis numero præstet affectando a.

Altera dissimilitudo est affectuum humanorum. Vbi reperias alterum alteri propensionibus , animi moti-

B 2

bus.

bus, affectionibus è toto similem? Et quamvis plures eandem inhient voluptatem, non tamen eodem modo.

Tertia, nullus hominum similis est alteri formâ modoque moriendi. Quod ii testantur, qui quotidie moribundis adsunt.

Quarta, Nemo alteri similis est Conscientiâ. Tot hîc differentiæ, quot homines. Id jam olim fassus Origenes: Sicut facies, inquit, à facie differt, sic corda, voluntates, virtutes, & fere conscientiæ. Animi facies Conscientia. Hanc inspicere & animum vidisti.

Tarsensis Paulus duo quædam à Timotheo suo exigens. Hoc, inquit, præceptum commendo tibi, fili Timothee &c. Vt milites in illis bonam militiam, habens fidem & bonam conscientiam *a*. Fidem vivam sine quâ nullus potest placere Deo. *b* Conscientiam bonam, sine qua nemo videbit Deum. *c* De conscientia disse-

*a* 1. Tim. cap. 1. vers. 18. *b* Hebr. c. 11. vers. 6. *c* Hebr. cap. 12. vers. 14.

diffidere mihi animus est, sed hac methodo. Ad singula capita scripturam & picturam, anteaambulones sequentium indices præmittam. Ad dam more meo exordiolum quod sui capitis institutum & thema compendio dicat. Hoc igitur primo capite, quid Conscientia, quid Synteresis sit, explicabo: Præmissis tamen, ut pollicitus sum, scripturâ & picturâ indicibus eorum, quæ hoc capite dicenda.

## SCRIPTURA.

*Esto Consentiens adversario tuo, citò,  
dum es in via cum eo. Math.  
cap. 5. vers. 15.*

## PICTURA.

*Oculus è nubibus emicans cum his ver-  
bis; solus hic Conscientiæ  
Arbiter.*

**C**onscientia quid est? Dictamen, seu, Iudicium practicum rectæ rationis: sæpe idem cum synteresi. Theologi tamen ita distinguunt.

Synteresis, aiunt, est habitus principiorum practicorum *a*. Exemplo demonstramus id, quod dicimus: Omne peccatum est fugiendum, sed cibo & vino se onerare, comissari, furari, fallere, mentiri, fornicari peccata sunt, ergo fugienda. Hæc principia agendorum per se nota synteresis docet.

Doctissimus Gerson hanc animi facultatem vocat Apicem mentis, scintillam rationis, naturalem instinctum in bonum, virginalem particulam animæ. *b* Hæc neque apud inferos ullis ignibus extinguitur. Synteresis ergo habitus est principiorum sed practicorum. Illum alium, quem Intellectum appellant *c*; Aristoteli explicandum committimus. Nos de synteresi loquimur, quam Hieronymus Ezechielis interpres cum Gerson *Rationis scintillam* nominat, quæ nec in Caino, fratris sicario, fuit sopita.

Ani-

*a* Thom. parte 1. q. 79. a 12. *b* Gerson de Nativit. B. Vir. circa med: *c* Seu habitum principiorum speculabilium de quo Aristot. 1. 6. Et hic. c. 6, ubi, *Omne totum magis est suâ parte.*

Animus quidem naturâ suâ dividi nequit, verum ob diversas actiones diversa sortitur nomina, diciturque Intellectus, Ratio, Synteresis, Conscientia. Sed ut discrimen inter synteresin & Conscientiam vel ipsis oculis explicetur, hoc addamus.

Non inèruditè synteresis comparatur scintillæ quam ignarius fomes concepit, conscientia sulfuratis schidiis quæ accenduntur: atqui plus certè luminis habent sulphurata schidia, quàm scintilla fomiti copulata. Et videte, quomodo hæc triplex animi facultas Synteresis, Ratio seu Intellectus, & Conscientia inter se nexa sint, quâ ratione syllogismus. Synteresis ait: Omne malum fugiendum: Subjungit ratio, sed mendacium, fornicatio, furtum, adulterium est malum: Conclusionem addit Conscientia, Ergo fugiendum. Hinc Conscientia identidem hortatur & monet: Hoc age, hoc cave, hinc contine, ab hoc abstinere, hoc fuge & execrare: Quod enim Synteresis in genere, hoc Conscientia in particu-

B 4

lari

lari vetat, vel imperat: quasi à facie colubri fuge peccata. *a* Eodem modo synteresis principium syllogismi hoc ponit: Divinæ Voluntati parendum in omnibus. Addit Ratio, sed hoc voluntas divina imperat. Concludit Conscientia; Igitur parendum ei. Hinc etiam, vt aliquibus placet, Conscientia velut concludens scientia nuncupatur; Hinc nomina sortitur tam diversa. Nos ordine duodecim recitabimus; è quibus penultimum maximè observandum.

I. Conscientia LIBER seu CODEX dicitur. Ita differens de eâ Chrysostomus: Habeto, inquit, codicem Conscientiam tuam, & scribe quotidiana peccata. *b* Fatali die mundi sedebit iudicium & aperientur libri, *c* Conscientiæ omnium patebunt.

II. LECTULUS. Rex David post flagitium geminum iam patrum: Lavabo, inquit, per singulas noctes

*a* Eccl. c. 21. v. 2. *b* Chrys. in Ps. 50.  
*Hom. 2. miki pag: 852.* *c* Dan. c. v. 10.







noctes lectum meum. *a* Lectum tantum? Conscientiam quoque fordida-  
tam, quæ his oculorum imbribus  
lavatur. Cælestis sponsa: In lectulo  
meo, inquit, per noctes quæsi  
quem diligit anima mea. *b* In lectulo  
sponsam cælestem sollicitè quærit,  
qui conscientiam noctu exactè dis-  
cutit, & totum secum ipse remetitur  
diem. De angustiore hoc lectulo I-  
saïas vates: Coangustatum est stra-  
tum, inquit, ita ut alter decadat *c*: Si  
Christus lectulum conscientiæ occu-  
pat, nulli vitio illic, nulli diabolo lo-  
cus est: Exeste monstra. Tam dispa-  
res inquilinos non capit una con-  
scientia. Nec in una sede morantur  
Christus & Belial. Vbi Christus ex-  
cluditur, satanas cum omnium vitio-  
rum choro admittitur.

III. SPECULUM est Conscien-  
tia, & quidem speculum sine menda-  
cio, quod vel afflatu levi contamina-  
tur. Hoc speculum & pulchra & fœ-  
da repræsentat, laudat & objurgat.  
Nec enim tantum dicit: *Hodie te be-  
ne gessisti*: Sed exprobrat ac reprehendit:

B 5

dit:

*a* T<sup>s</sup>.6.v.7. *b* Cant.c.3.v.1. *c* Isa.28.

VII. MURUS AHENEUS est  
Conscientia pura. Venusino vati hoc  
tutò credamus.

*Si recte facies ; hic murus aheneus  
esto.*

*Nil conscire sibi , nullâ pallefcere  
culpa. a*

Hac parte , si volumus , invulnera-  
biles sumus. Pecuniam, famam, vi-  
ram eripere quis potest , aheneum  
hunc murum deicere nemo potest.  
Conscientiam recti quis mihi eripiat,  
nisi ego ipse ? Bona conscientia mu-  
rus impenetrabilis.

VIII. GALLUS CANTANS,  
idque diu noctuque. Petrus Chri-  
stum sibi vaticinantē oculis siccis au-  
diit ; & non ingemuit : in area Cai-  
phæ Christum negavit , & non fle-  
vit ; negationem jurejurando confir-  
mavit , & non lacrimavit ; perjurio  
confirmationem adjecit , & nihil do-  
luit ; Gallus cantavit , & amarè fle-  
vit . Tum demùm fluunt lacrimæ,  
cum Conscientia suum sibi audito-  
rem vindicans , dirum flagitiorum  
carmen incipit cantare.

IX. CA-

*a Horat. l. 3. epist. ad Macen. med.*

**I X. CANIS** etiam vocatur Conscientia. Tobias natu minor profectionis longæ assiduum assecclam habuit canem. Ita sacra pagina narrat: Profectus est Tobias, & canis secutus est eum *a*. Cumque jam redux è regione Medorum festinaret in patriam, Præcucurrit canis, qui simul fuerat in via, & quasi nuntius adveniens, herilis filii præsentiam significabat. Conscientia canis vigilantissimus, præ illis Capitoli sopitis vigilibus, cum hostem advertit, non pane, non carne, non arte ulla sopiri se sinit. Vigilat & latrat.

**X. PÆDAGOGUS** est, quod Origenes diserte testatus: Conscientia, inquit, corrector affectuum, pædagogus animæ. Laudatissimus philosophorum Epictetus stylo prorsus Christiano: Parentes, inquit, pueros nos pædagogo tradunt, qui ubique observet, ne lædamur. Deus jam viros conscientie tradit custodiendos. Quæ quidem custodia nequaquam contemnenda, quoniam & Deo displiceret, & conscientie

*a Tob. c. 6. & c. 11.* tie

tia ipsi nostræ hostes essemus. *a* Nemo Christianus magis Christianè dixerit.

X I. ANTIGRAPHEUS est Conscientia, & quidem accuratissimus, nihil hic scriba dissimulat, fideliter notat, monet, vellicat, nec solum objicit quæ male commissa, sed etiam quæ negligenter omissa sunt. Officio suo fungens hic Antigrapheus: potuisses, ait, hoc non omittere, nil impar viribus fecisses: Debuiisses istud non facere, lex divina vetat, omnis ratio reclamatur. Hæc istius antigrapheus sunt notæ. Et quod olim Pilatus, idem hic pronuntiat Notarius; Quod scripsi, scripsi. Æternum non deletur hæc scriptura: Venia quidem noxarum impetratur, sed facti conscientia non tollitur. Quod scripsit, scripsit.

X II. DEUS est Conscientia in humano corpore. Erudite cecinit Menander: Mortalibus cunctis conscientia Deus. Cui accinens Theophilus Antiochenus: Bene, ait, quod Conscientiam divinum quid esse viderunt;

*a* *apud Stobæum form. de Conscientia.*

derunt, & non posse tale quid homini ab hominibus donari: sed insipienter, quod donum à donante non distixerunt. Bona Conscientia per Orbem secura ita ac redit: Mala conscientia, præsertim quæ se tueretur mentiendo, per Orbem licet tuta eat, non redibit certe tuta. Quisquis enim semel mentiri est ausus, sæpius id fecisse, sæpius facturum, facile convincitur.

Ita Deus suum veluti proregem in homine collocavit, Conscientiam. Mortalibus cunctis Conscientia Deus. Ita Christus Dei filius quemvis monuit: Esto consentiens adversario tuo cito, dum es in via cum eo; ne forte tradat te adversarius iudici, & iudex tradat te ministro, & in carcerem mittaris. <sup>a</sup> Quis adversarius iste? Conscientia, inquit Athanasius, seu lex Dei scripta in corde humano. Huic esto benevolus & consentiens. Compose, paciscere, transige cum eo, præbe te illi amicissimum. Cum enim creditor debitorem ad iudicis tribunal trahit, matu-

re

re debitor sibi ipsi consulèt, si cum creditore pacisci possit in via, ne ad Magistratum tractus compingatur in vincula, & ad novissimum quadrantem soluere jubeatùr.

Vetus & notus scriptor rem narratu dignam memorans: Cum in cænobio, inquit, Firmini abbatis agerem, unus aliquis è latronum manipulo venit ad abbatem Zosimum, rogavitque in domesticum & incolam admitti, à flagitiis se aliter non temperaturum. Admissus est. Non ita multo post abbas Zosimus humaniter illum affatus: Mi frater, inquit, in hoc monasterio vix diu securus eris, cædibus jam infamis ad macellum extraheris. Ducam te igitur Gazam ad monasterium abbatis Dorothei. Ductus est. Hic novennio agens omnes sanctissimi Davidis Hymnos a memoria complexus, quidquid est rituum inter monachos, addidicit. Exaëto novennio, conscientia etiamnum stimulante, ad Zosimum abbatem rediens: Oro te Pater, inquit, profanam mihi vestem redde;



de; hic persistere non sinor. Ecce obsecro, ait Zosimus, quid te injuriarum hinc expellit? Num religiosa vita paullatim desipit? Num te frangit corporis afflictatio? Cui religiosus latro: nil horum est, inquit, mi Pater, quod ad abitum me rapit. En novennium jejuniis, obedientia, precationibus, continentia transégi, nec dubito, quin bonus Deus flagitiis meis veniam concesserit. Nihilominus urit me Conscientia & foelicit, & urget: Videor mihi ante me videre puerulum, quem inter cæteros occidi, qui mihi dicat. Cur me occidisti? Hæc species assidue obversatur oculis: Hæc in templo, in cubiculo, in triclinio, in horto, in ipso cælesti convivio, inter orandum, inter legendum, psallendum, laborandum identidem me vellicat, & illas voces oggerit assidue: Cur me occidisti? Quapropter decretum est mihi, magistratum & judices ultro adire, & me occidendum sistere, ut moriar pro puerulo quem sine ulla causa occidi, Saltem hoc modo

vulturis me lacerantis ungues exar-  
mabo. Fecit quod statuit. Diospo-  
lim abiit, magistratui se stitit, in vin-  
cula ductus, & capite plexus est *a*.  
Vis ingens conscientia. Antigra-  
pheus accuratissimus, adversarius a-  
cerbissimus est Conscientia. Ideo  
Christus suadet & hortatur: *Esto con-*  
*sentiens adversario tuo*: cum hoc anti-  
grapheo conveni, & litem compone.  
*Cito*: ne forsan hinc subito auferaris  
à morte. *Dum es in via cum eo*: dum  
vivas, dum ad Christi tribunal per-  
gis. *Ne forte tradat te adversarius ju-*  
*dici*: quod certo fiet, nisi mature ita  
cum eo transigas, ut illum tibi con-  
cilies. *Et judex tradat te ministro*: Dia-  
bolo carnifici, justitiæ divinæ mini-  
stratori. *Et mittaris in carcerem*: non  
catenis solum, sed flammis horrifi-  
cum, in quo habitat æternitas. *A-*  
*men dico tibi, non exies inde, donec red-*  
*das novissimum quadrantem*. Summo  
& strictissimo jure tecum agetur.  
Teruncius vel minimus erit solven-  
dus. Ad assen pendes omnia.

Ite mortales, & vitam voluptati-  
bus

bus traducite; Antigrapheus vester vigilat, & quicquid cogitatu, dicto, facto delinquitur, sedulitate assidua notat, non tam ut antigrapheus, quam ut adversarius acerrimus. Quivis viderit, qua ratione cum hoc suo antigrapheo & adversario, dum licet, conveniat. Habemus Dei vicarium & proregem in cordibus nostris, Conscientiam nostram. Qui rebellis est Conscientiæ, nec obtemperat Deo.

## CAPUT II.

*Conscientia bona, thesaurus maximus  
summum gaudium.*

**D**ictaverat Deus summi sacerdotis vestem, tunicam hyacinthinam, ad vestis oram jussit appendi aurea tintinnabula, interjectis alternatim malis punicis ex eodem metallo. Gregorius Nyssenus mysterii hujus interpret: Aureis, inquit, campanulis vera fides significatur. In omnem terram exivit sonus eorum, & in fines orbis terræ verba eorum <sup>a</sup>.

C 2

Mata

<sup>a</sup> Rom. c. 10. v. 13.

Mala verò punica ex auro , Conscientiam puram designant . Quæ duo Paulus , ut supra diximus , commendat intime : Fidem vivam , & bonam conscientiam .

Quid synteresis , quid Conscientia , quam diversa Conscientiæ sint nomina , explicatum est . Præsertim antigraphicum & animo imprimendum monuimus , qui nihil dissimulat , omnia observat , non raro minima quæque notat . Progredimur , ostensuri summum in Orbe hoc nostro bonum esse , bonam conscientiam , thesauris & gaudiis omnibus antistare .

• Der Gegenschreiber.

## SCRIPTURA.

*Secura mens quasi juge Convivium.*

*Prov. 15. v. 15.*

## PICTURA.

*Christus in corde sedens læva librum tenet , oris autem amœnitate & sublatâ dexterâ modulos parat.*

**S** Alomonis oraculum est : Omnes dies pauperis , mali : Secura mens quasi





quasi jure convivium, & Mens secura, est Conscientia à gravioribus noxiis libera.

Hæc sibi domi plaudit, hæc sibi canit & Deo. Bona conscientia rectæ rationi semper consentanea, & divinæ voluntati in rebus omnibus subjecta est. Hic edax vultur, hic erodentes vermes nil loci habent; hic convivium beatum, suave, dissidiis nullis interruptum, perpetuum. Quæ Conscientiæ tam tranquillæ sint dictamina, quæ signa, suo loco, & tempore suggeremus.

Multa somniarunt prisca de Ambrosia & Nectare. At nugamenta & fabula omnia. Ambrosiam & Nectar nullus usquam cauponum vendit, sola suo domino Conscientia has delicias propinat: Hæc illius promus & condus est. *b* Erectæ conscientiæ homo, lætissimus canit: Nihil mihi conscius sum; in divinam voluntatem summa devotione feror, Deo meo toto animo vereque fido, hinc mihi faventem Deum promitto. Hoc nectar & Ambrosia. Hinc na-

C 3

feitur,

*a* Prov. c. 15. v. 15. *b* Kellerer,

citur, ut Petrus Cellensis abbas testatur, sabbatum ex sabbato, convivium ex convivio continuatione gaudii, uti inter filios Iobi *a*. Promtuarum eorum plena eructantia ex hoc in illud *b*. Hic liquida & pura voluptas, hic gaudium & triumphus, hic exultatio & lætitiæ cumulus, hic vere gaudetur in sinu, quoniam secura mens iuge convivium.

Plutarchi & Plinii *c* Elogiis celebratissima herba est Nepenthes, jam olim ab Homero plurimum laudata. Hæc poculis, ut agebant, addita, omnem tollit convivii tristitiam. Verissimum Nepenthes est bona conscientia, omnem vitæ sollicitudinem pellit, omnem abolet mœstitiam.

Petrus Cellensis, quem dixi, hoc etiam poculum subministrans. Bona, inquit, conscientia, est scyphus Ioseph, in quo augurari & inebriari solet animus. Erudite & apposite. Siquidem Ioseph augurabatur & naturaliter divinabat, cum suorum convivarum prudentiam, arcana, tem-

perantiam,

*a* Pet. Cel. libel. de Consc. *b* Ps. 143. v. 13.

*c* Plin. l. 21. Nat. hist. c. 21. med. Hom. Od. 5.



perantiam, pleno scypho exploraret, uti Ephrem Syrus aliique id explicant. Erecta & hilaris conscientia aureus est Scyphus, quo auguramur & divinamus non imperite, nobis cum Deo amicitiam esse, Deumque nos in suis habere. Hinc certe animum dulcis tranquillitas perfundit. Quod Ambrosius confirmans: Quis, inquit, puritate pectoris dulcior fructus, quis cibus suavior, quam is, quem animus bene sibi conscii, & mens innocentis epulatur *a*. Secura mens jure convivium.

Neque musica deest huic convivio, ubi cantum & modulorum numeros moderatur Christus. Citharædi septem Germanis musica censetur optima *b*. Compose citharædos mille, nil erunt ad illam bonæ Conscientiæ musicam. Siracides dilucide hoc testatus: Non est, inquit, oblectamentum super cordis gaudium *c*. Gaudere in sinu suavissima est musica.

Cum Themistocles ad Theatrum

C 4

spe-

*a* Ambros. in ps. 35 *b* Ist nichts über sieben Lauten. *c* Eccli. c. 30. v. 17.

ſpectaturus iret, familiariter interrogatus eſt, cujus fidicinis vocem, quam muſicam gratiſſimis hauriret auribus? Illam, aiebat, quæ meas laudes decantat. Quid laudum & encomiorum homo Chriſtianus ſuavius & honeſtius audiat, quam quod bona recitat conſcientia, quæ ſolum laudanda laudat. Laus hominum cantio frigidiffima ſæpius falſa, nihili facienda; laus Conſcientiæ laus vera, muſica dulciſſima, ſummi æſtimanda. Revera Paulus hanc Conſcientiæ harmoniam, hunc concenrum ejus jucundiſſimum vel mille citharædis præferens: Gloria noſtra hæc eſt, inquit, teſtimonium Conſcientiæ noſtræ. *a*

Et quamvis latratus canum, aut luporum ululatus hanc muſicam quandoque interſtrepere ac turbare videantur, Conſcientia tamen clamore prævalet, nec turbatur turbis, quamcunque abſonam vocum confuſionem ſuperat. Quo in genere Conſcientia velut echinus eſt inter allatrantes canes, qui aculeos explicat,

cat, spinas erigit, in securum se globum convolvit, & hostem provocat, quasi diceret: Huc adsit, cui pugna placet; Congrediamur: os cruentum mox referet quisquis vicinior accesserit. Ita illa inter convicia & contumelias, inter opprobria & calumnias, inter terrores & minas erecta & hilaris sermones hominum malevolos, velut minorum canum latratus, spernit; seipsam his animat: Non est quod cures iniqua hominum de te judicia; ululent lupi, latent canes, vano morfu in te sæviant, dentes non infigent. Contemne ista, ad unum respice Deum, unum illum attende. His semet Conscientia solatur & erigit. Huc notis scriptoris monitum spectat: Fili, humanum ne metuas iudicium, ubi te Conscientia pium reddit & inson-tem *a* Secura mens jure convivium ab hoc convivio facilis in paradysum transitus est.

Iucundissimam hanc conscientiae tranquillitatem gustans Augustinus:  
Lætitia

*a b Thomas de Kemp. l. 3. de imit. Christi: c. 36.*

Lætitiabonæ conscientiæ, inquit, Paradisus est. Tranquillitate conscientiæ nihil excogitari beatius potest. Verius atque jucundius est, gaudere hominem de bona conscientia inter molestias quam de mala inter delictias *a*.

De liquidissima bonæ Conscientiæ voluptate Bernardus eximie: Conscientia, inquit, cordis scientia; quando cor novit seipsum, appellatur conscientia; quando præter se alia, nominatur scientia. Conscientia bona, titulus est religionis, templum Salomonis, ager benedictionis, hortus deliciarum, aureum reclinatorium, gaudium Angelorum, Arca fœderis, thesaurus regis, Aula Dei, habitaculum spiritus sancti, Liber signatus & clausus, in die iudicii aperiendus *b*. Paria cum Bernardo sentiens Chrysostomus:

Hæc omnia luculente confirmans Siracides: Bona est, inquit, substantia,

*a* Aug. l. 21. de Civit. & l. de Catechis. Rudib. *b* Bern. l. de Inter. domo, c. 22. Chrysost. tom. 5. mihi pag. 347. & pag. 349.

tia, cui non est peccatum in conscientia *a*.

Tutissimum ergo gazophylacium, summus in hoc orbe thesaurus, sanctissimum simul ac opulentissimum ærarium pacata Conscientia. Etiamnum mihi in mentem est Bernardus, qui conscientia bonam omnibus thesauris præferens: Nihil est jucundius, ait, nihil tutius, nihil ditius bona conscientia. Premat corpus, trahat mundus, terreat diabolus, illa erit secura. Futuræ beatitudinis non est utilius remedium, nec certius testimonium bona conscientia. Cum Mundus circum rotetur, ploret, rideat, transeat, pereat, nunquam marcescit bona conscientia. *b* Hæc Bernardus verissime dixit nequaquam nimis in laudando. Non est oblectamentum super cordis gaudium: secura mens jure convivium.

Reperias hominem qui undeque infelix & miser est, fortunis & bonis omnibus evolutus fodere non valet, mendicare erubescit, favore prin-

*a* Eccli. c. 13. v. 30. *b* Bern. l. proxime laud.

principum omni destitutus, omnium odio exagitatur, sed gratis; insuper ægro corpore diversos patitur dolores; honore pristino spoliatus inter postremissimos jacet, & rebus omnibus urgetur, nam plurima sunt quæ illum eant depressum; nihilominus si hunc ipsum hominem, vndique calamitosum, bona Conscientia non deserat, etiamnum sat felix est; adhuc serenam ad DEUM frontem audent attollere, locum adhuc reperit, in quo illi bene sit, nimirum in seipso.

Fit nonnunquam cùm æstivi soles sunt flagrantissimi, ut homines æstus impatientes sudore diffluant penèque corruant. Est tamen nonnemo, qui in suâ domo gelidam umbram reperiat, eoque recens è cellâ vinum adferri iubeat. Huic homini, mihi credite, in æstu summo bene est, recentem potum & algidum habet locum; itaque valet & viget ceteris in æstu ferè tabescentibus. Ita prorsus sunt homines, de quibus Salomon: Omnes dies pauperis, mali: a Homines fortunis exhausti, curis

op-

oppressi, lacrimis infusi, rebus adversis vndique afflicti; hi nihilominus, lætante sunt animo; Conscientiam habent bonam, DEUM sibi credunt benevolum, quis est qui illis noceat? Ruat orbis, impavidos ferient ruinæ. Et hoc clarissimè Bernardus exprimens: subjiciatur, inquit, corpus in pœna, in jejuniis maceretur, verberibus lanietur, equuleo distendatur, gladio trucidetur, crucis supplicio affigatur, secura erit conscientia. *a* Secura mens, jube convivium, thesaurus maximus.

De pallio fanè admirando, & ultra quam æstimari possit, pretioso, tuum mi lector, judicium conveniam; scito fuisse pallium holosericum, laciniosum, *b* purpureum, phrygionis acu partem maximam pictum, extremitas omnis & margo pallii malis punicis ex auro solidissimis, non cavis, & arctè junctis vestita: Quid tibi videtur de hoc pallio? est, non dubitem, qui dicat: Majores ego divitias non optaverim, quam si tale mihi pallium donetur; Quis autem ille  
tam

*a* Bern. disto. 1. *b* Gloggenwest.

tam validus, qui moli tam pretiosæ  
sic ferendo? Bajulorum satis, nemo  
dubitet, sese offerent paratissimi  
huic oneri portando etiam succum-  
bere, etiam in nori. Notus à tali ge-  
statione Alcmaeon, quem Herodorus  
depingit, cui Cræsus rex tantum  
auri donavit, quantum asportatione  
una posset auferre *a*. At ille rerum  
suarum satagens ocreas prægrandes,  
tunicam multiplici sacculorum con-  
tignatione amplissimam, manicas  
laxissimas, thoracem & pileum ca-  
pacissimum, quæ omnia aurea mo-  
neta arcte fasciavit. Neque hoc satis,  
ipsum os implevit. Ita demum è ga-  
zophylacio progredi conatus vix pe-  
dem potuit protollere: demum re-  
ptando potius quam gradiendo, ma-  
ximum sed amabilissimum onus as-  
portavit: Ita pallium illud perquam  
pretiosum etsi ponderosissimum, ge-  
statores & dossuarios reperiret pluri-  
mos, qui beatos crederent sub onere  
tam charo deficientes: Ita prorsus  
homo patiens licet miseriis, calami-  
tatibus, ærumnis plurimis deprimatur,



tur, ille tamen erigit se, contraque  
 it audentior; pallium holosericum  
 acu pictum, tot poma ex auro facta  
 pallio appensa, conscientia noxarum  
 & scelerum pura solatur & recreat.  
 Huic homini quantumvis calamito-  
 so bene est, hic beatus est, quomo-  
 docunque demum res cadant. Ridet  
 ille fortunæ furias & omne diaboli  
 vaframentum generosa mente despi-  
 cit, quem conscientia bona volupta-  
 te pacis & veræ spei perfundit.

Isidorus, cum Bernardo, quemli-  
 bet lætitiæ inhiantem interrogat:  
 Vis nunquam esse tristis? Bene vive.  
 Bona vita semper gaudium habet;  
 conscientia Rei semper in pœna est *a*.  
 Non contristabit iustum, quidquid  
 ei acciderit *b*. Iustus est qui conscien-  
 tiam rectæ rationi conformem, qui  
 voluntatem divinæ voluntati habue-  
 rit subjectam.

Hinc nobilissimus martyr Tibur-  
 tius cum à Torquato iudice tormen-  
 tis variis afficeretur, ausus est dice-  
 re: Applica equuleos, suspendendos  
 Chri-

*a* Isid. l. 2 soliloq. & Bern. de inter domo 45.  
*c. initio.* *b* Prov. c. 12.

Christianos; percutere, damna, incendere, universa denique supplicia admove, decerne quicquid libet, omnis nobis vilis est pœna, ubi pura comes est conscientia *a*. Secura mens jube convivium.

Quisquis in hac vita epulum desiderat nunquam interrompendum, quicumque cælum extra cælum, quisquis tranquillissimam intra turbas beatitudinem anhelat, hoc unice agat, ut pura sit Conscientia. Hæc summum gaudium, maximus thesaurus, epulum est suavissimum, perpetuum. Cui conscientia est pura, miseras & calamitates universas multò facilius tolerat: nam admirandum illud pallium gestat, quod ei oneri non est, sed oblectationi. Homo tranquillæ conscientiae verè dives, vere beatus est. Militemus, hortante Paulo, bonam militiam, habentes fidem & bonam conscientiam. Conscientiæ puritas, vitæ felicitas.

*a Cornel. epist. 132. l. in.*

## CAPUT III.

*Conscientiæ, tormentum gravissimum.*

**H**Ebræus Rex Achab, quod Regum fâsti dicunt, Micheam vatem gravissimis verbis obstringens: Iterum arque iterum adiuro te, inquit, vt non loquaris mihi, nisi quod verum est, in nomine Domini. Cumque respondisset Micheas, quod minus placuerat, Achabus ad regem Iosaphatum versus: nunquid non dixi tibi, quia non prophetat mihi bonum, sed semper malum. *æ* Conscientia, de quâ sermonem instituimus, subinde nomen fortitur injuriosum sibi, cum appellatur mala conscientia, vti dicitur, *Vxor mala*. Quemadmodum autem Achabus rex injuriam intulit Micheæ vati, cui opprobavit in os, quod sibi nunquam nisi malum vaticinaretur: Ita prorsus Conscientia immeritò vocatur mala, quæ veritatem non dissimulat, quæ peccata

D

om-

omnium malorum vere maxima mala, exprobrat, quæ libere objurgat, quæ virtutem sine assentatione laudat. Hæc sanè non mala est conscientia, licet ea in hominibus malis, imò pessimis quibusque inveniatur.

Nihilominus nos eam sequemur legem, quæ docet, *sapere cum paucis, loqui cum multis*. Quando igitur Conscientia dicitur mala, quæ suum Dominum patrati mali arguit, nos eam etiam hoc nomine quamvis minimè proprio compellabimus. Superiori capite quantum sit gaudium Conscientia bona, explicatum est, hoc porro quantum sit tormentum Conscientia mala, exponemus.

## S C R I P T U R A.

*Tribulatio & angustia in omnem animam hominis operantis malum.*

*Rom. 2. v. 9.*

## P I C T U R A.

*Cor apertum, & in eo Gallus gallinaceus, Canis, simia, serpens.*

**C**onscientia mala tormentum gravissimum. Parricidæ olim in culcum





culeum vnâ cum simia, gallo gallinaceo, & serpente insuebatur & spargebantur in mare, vnde Poëta de Nerone.

*Quis tam*

*Perditus, ut dubitet Senecam præferre  
Neroni.*

*Cujus supplicio non debuit una parari  
Simia, nec serpens unus, nec culeus  
unus a.*

Dignum tanto facinore supplicium. Homo sibi pessimè conscius, serpentem, simiam & gallum gallinaceum, animantes scilicet amicissimas in animo digladiantes sentit. Quod prisci sapientes non ignorarunt. Seneca hac in re testis locupletissimus: Hic, inquit, consentiamus, mala facinora conscientiam flagellari, & plurimum illi tormentorum esse, eo quod perpetua illam sollicitudo urget ac verberat. *b* Orator Tullius cum Sextum Roscium defenderet, de Cæliis fratribus mentionem injiciens: sua quemque fraus, inquit, &

D 2

suus

*a Iuven. sat. 8. b Sen. epist. 9. mihi  
pag. 610. fine, & epist. 105. mihi pag. 105.  
fine.*

suus terror maximè vexat ; suum quemque scelus agitat , suæ malæ cogitationes conscientiaque animi terrent. *a* Insignissimè dixit Suetonius in Tiberio : nihil est miserius quam animus hominis , conscius. Sed omnium optimè dixit Seneca Philosophus : prima & maxima peccantium pœna est, peccasse, nec ullum scelus impunitum est. Malitia ipsa maximam partem veneni sui bibit. *b* Quid elegantius, quid verius ? Reverâ ea est indoles nequitia, vt ipsamet sui veneni quod miscet , maximam partem ebibat. Quod Severinus Boëthius non minus eleganter. Nequitia ipsa sibi supplicium est. Desit carnifex, desit omnis tortor : qui nequam est , suus ipse & tortor , & carnifex est.

Narrat Plutarchus Apollodorum hominem avarum & crudelem somniasse à Scythis se lixari prius , dein exceriari , & ex ipso lebetes cor sibi dicore: Ego tibi horum omnium causa sum. Et videte , vt diabolus miser

*a* Cic. pro Sex. Rosc. *b* Sen. epist. cit. & epist. 81, mihi pag. 540.



feros idololatrias fascinarit! Pausanias juvenis Byzantij virginem deperiit, quam etiam celando crimini post interfecit. Hęc dormienti sæpius sese spectandam exhibuit, dixitque.

*Perge ad supplicium valde est damnosa libido.*

Nec desijt mæsta hæc species pavefactum juvenem obturbare. Heracleam igitur locum procurandis manibus destinatum navigans, puellæ manes inferiis evocavit. At illa hanc Conscientiæ intemperiem prædixit finiendam, ubi Spartam venisset. Reversus Spartam Pausanias, continuo periit. Vide Delr. p. 312.

Monstrum immane Nero, Agrippinâ matre in navigio solutili occisâ, quod Dio refert, eas conscientiæ furias est passus, ut nullo amplius loco, matre semper obversante interquiescere potuerit. Rex Macedo Alexander, Clytô per vim occiso, illos conscientiæ stimulos sensit, ut consilium cepit seipsum interficendi, modò illos conscientiæ morsus

exiret: Ita & Orestes Clytemnestrâ  
matre interfectâ, sollicitante Con-  
scientiâ in rabiem est actus. Euri-  
pides hujus tragœdiæ scriptor quæ-  
rit: O miser Oresta, quid morbi te  
perdit? Cui Orestes: Conscientia;  
sum enim mihi conscius de malis  
perpetratis. Ita & Ericus Suecorum  
rex, Gustavi successor, cùm præce-  
ptorem suum hominem sexagenari-  
um pugione confodisset, furiatâ con-  
scientiâ pænè ad insaniam reda-  
ctus est, ut Florimundus Remun-  
dus memorat. *a*

Innumera talia. Verissimum quod  
prisca usitato metro ferebant.

*Bene nemini est nocenti, nemini malè  
est probo. b*

Nec minus verum est, quod sa-  
tyricus vetus Orbi occinit.

*Exemplo quodcunque malo committi-  
tur, ipsi*

*Displicet auctori. Prima est hæc ultio,  
quod se*

*Iudice, nemo nocens absolvitur; improba  
quamvis*

*Gratia fallaci Prætoris vicerit urnâ.*

Cer-

*a Flor. l. 4. de ortu hæresum cap. 16. n. 3.*

*b Troch. vet.*

**Certissimum:** Nemo gerit crimen in animo, qui non Nemefin in tergo. Quod Hesiodus eleganter hac sententiâ expressit: Cognatum est omni sceleri, sceleris supplicium. Cruciarii Romani cum ducerentur, suam ipsimet ferre crucem cogeantur, antequam in eâ penderent; ita Deus malè agentibus, hanc conscientia furcam imponit, non sine gemitu portandam, ut vel resipiscant, vel æternum in eâ pendeant, in orco crucifixi. Mala conscientia tormentum maximum.

Qua in re mirificus est priscorum Patrum consensus. Ponderosissima sunt Augustini verba, quæ pro tanti viri honore, optima fide curaque singulari soleo exscribere. Ita ille in psalmos: Veruntamen charissimi, ait, inter omnes tribulationes humanæ animæ, nulla est major tribulatio, quàm conscientia delictorum. Quo confugiet, cum cœperit pati tribulationes? fugiet ab agro ad civitatem? à publico ad domum? à domo in cubiculum, & sequitur tribulatio. A cu-

D 4

biculo

biculo jam quò fugiat non habet, nisi interius ad cubile suum, &c. Et ecce hostem suum invenit, quò confugerat. seipsum quò fugiturus est? Quocunque fugerit se, talem trahit post se: & quocunque talem traxerit se, cruciat se. Sed à seipso sunt tribulationes quæ inveniunt hominem nimis, acerbiores enim non sunt. tanto autem sunt acerbiores, quanto sunt interiores. *a*

Breviter Hieronymus sed nervose: Quot, inquit, vitia, tot invenies animæ tormenta. Hieronymo & prioribus omnibus accedens Gregorius ingenuè pronuntiat: Conscientia mala omnium afflictionum maxima. Nam inter multiplices animæ humanæ tribulationes & innumerabiles afflictionum molestias, nulla est maior afflictio quàm conscientia delictorum. *b* In expedito est ratio, si namque homo exterioribus urgeatur calamitatibus, ad interiora se recipit, intra seipsum sese involuit, hîc Deum invenit, si intus etiam pax nulla, fauciata conscientia, exclusa sit

fit Dei gratia, jam omne solatium homini ademptum est.

Hoc autem homines conscientiaē sanctioris, sat scio, non credunt, quia hoc tormentum vulnerati non sentiunt. Sed istud utique Bernardo credent, qui distinctissimè: Nulla, inquit, gravior poena est pravā conscientia. Mala conscientia propriis agitur stimulis. Si publica fama te non damnat, propria conscientia te condemnat, quoniam nemo potest se ipsum fugere. *a*

Chrysostomus prout oris apertissimi orator fuit, liberè dixit: Quid improbā conscientia molestius? quid spe meliori suavius? Nihil profectò. *b* Qui in vinculis est, (ausus capitalia,) jam certus mortis, cui supplicii dies jam dictus, hic profectò non solet esurire, quamvis ei epulæ apponantur exquisitissimæ, hoc unum cogitat: Cras ducar, cras pendebo. Hæc illum una cogitatio cogit mori ante mortem: sic homo reæ conscientiaē capitali carcere conclusus

*a* Bern. de inter. domo cap. 45. *b* Chrys. somo 5. sermo. de nequitia depulsa.

clusus est, quocunque tendat, quascunque terras adeat, secum fert carcerem, malam conscientiam.

Carthusianæ familiæ religiosi viri, sub candida veste perpetuis utuntur ciliciis, quæ noctes ac dies molesta sint, & mordeant. Rea Conscientia fetosum, hispidum, iuge cilicium. Non est pax impiis, non est dicit Dominus. *a* Prisci ut hæc oculis subjicerent, pingebant Prometheum ob ignis furtum in monte Caucaſo ligatum ab Aquila. Titium apud inferos à vulture, Actæonem in silvis à canibus lacerari. Hæc Aquila, hic vultur, hi canes, mala conscientia est, quæ assidue mordet, rodit, lacerat. Tribulatio & angustia in omnem animam hominis operantis malum. *b*

Minuta prorsus animalcula sunt, & quæ pæne oculorum fugiant aspectum, tinea & teredo, inhilominus à tinea vestes, à teredine consumuntur trabes, ob assiduam diu noctûque rosionem: Ita conscientia flagitiis infecta non facile unquam feriatur, vel-

U-

licat, rodit, mordet, pungit, lacerat.

Quod Isaias prædixit: vermis eorum non morietur. *a* Ideò morsus malæ conscientiæ, gustulus & prælibatio est gehennæ, ubi vermis eorum non moritur, quod beatus Marcus iterum iterumque ac tertium unico in capite inculcat. *b*

Hic conscientiæ vermis plus habet periculi & doloris quàm paronychia vel phagedæna. *c* Et nisi maturè persanetur malagmate pœnitentiæ, in extremam rabiem accenditur. Hic vermis Caino totum terrarum orbem reddidit angustum, hic vermis Iscariotem adegit ad restim, hic vermis innumeros alios aut aquis, aut laqueo, aut præcipitiis, aut districto ferro objecit. Iam olim minatur Siracides: vindicta carnis impii ignis & vermis.

Audite mira, inaudita. Joannes Taulerus Theologus è beati Domini disciplina, quem Ballarminus concionatorem piissimum appellat,

D 6

rem

*a* Is. c. 66. v. 2 ult. *b* Marc. c. 7. v. 43. *c* Nurm im Finger/oder Geschwer das biß auffe Bein hinein frisse. *d* Eccl. c. 7. v. 19.

rem sanè tragicam, & eventus horribiles, narrat hac tali præfatione: Non somnium aut fabulam, sed rem gestam, quam ipse deprehendi, narabo vobis, è quâ discere licebit, quid vulnus Conscientiæ, & quid peccatum sit luxuriæ. Cùm annum, inquit, trigesimum agerem, à maioribus meis ad studia missus sum, (locum cautè filet.) Eò loci in mercatorum duorum familiaritatem veni: uterque cum uxore familiam ducebat, uterque sibi amore mutuo conjunctissimus. Alterius Vxor Theologum illum, quem dixi, & virum religiosum adiit: Oculi copiosis lacrimis oppleti, etiam sine voce præfari cœperunt, quid vellet. Secuta vox singultiens & interficiens verba: Et, ò mi Pater, ait, femina ego sum flagitiis cooperta. Ita lacrimis os sibi totum opplens, fletu prohibita est loqui. Taulerus causam mæroris rogans: Quid te, inquit, ò mulier adeo afflictat? divina misericordia non solum magna, sed & infinita est. Ad quem illa: Filiam habeo adulterinam & subditam. Dein narrationem



nem orsa, quid ante annos quindecim contigisset, exposuit ordine. Ad-  
didit & illud: Interea temporis sa-  
cræ mensam toties accessi, & pec-  
catum illud semper suppressi, non  
melior proditore Judâ. Cui Theo-  
logus: Dic enim veritatem, si quidem  
juvari velis, num sæpius, id criminis  
commisum est? semel duntaxat, ait  
femina, & ambo aliquot florenorum  
millia facili manu expenderemus,  
modo rem factam liceret reddere  
infectam. Taulerus, vt opem ferret  
rebus afflictis. Hoc, inquit, consilii  
tibi do; vide, quæ mollem viri mari-  
ti, aditum explores, & illi hoc in se-  
creto indices. Mox femina: Non  
audeo, inquit, in hujus rei conscien-  
tiam maritum admittere; ambos, &  
me & criminis socium occideret. Er-  
go, ait Taulerus, hoc modis omni-  
bus age, vt filia tua se Deo conse-  
cret, & in Virginum collegium tran-  
seat, cavendæ in veros hæredes inju-  
stitiæ. Actum; successus nullus. Nam  
putatitius filiæ parens nullis rationi-  
bus persuaderi potuit, vt sineret Fili-  
am virginitatis sponsione in religiosa  
fami-

familia se obligare. Nec tamen monere cessans, urgere Theologus: Dic istud viro, aiebat, dic suavissime saltem antequam nubat filia. Sed missella Femina, de his nec mutire ausa, factum gembundo silentio preffit. Tandem Mercator alter, verus Filia Parens, Filium suum cum hac ipsa virgine, quæ prioris mercatoris illius putabatur esse Filia, & erat alterius, cujus & Filius Sponsus, nuptiis copulavit. Ita Soror Fratri nuptum est collocata. Taulerus maximam iniquitatem intelligens multa tentavit, nil profecit. Interim domum advocatus rem Superis, cum aliter mederi malo non posset, commendavit. Eliteris tamen post rescivit, calamitates & tragoedias hinc enatas non unas, atque matrimonium illud tam inauspicatum, pro merito suo, infelicissime successisse.

Hinc primo licebit discere, quam malorum Lernam Luxuria, quàm invehat adulterium flagitia abominanda. Mi Deus! quot ejuscemodi casus, quantæ, & quam crebræ committun-

tur in iustitiæ his solis sceleribus detestandæ Veneris ! Supremus iudicii dies deteget , & in oculis omnium collocabit , quicquid furtiva libidine patratum est ; aperientur libri , pandentur conscientiæ , omnia in lucem emergent clarissimam. Orbem , eheu , universum ignis libidinum involvit. Ah caveat , quisquis cælum amat , ne Deus de illo cogatur dicere : Non permanebit spiritus meus in homine , quia Caro est. Non sine causa Nicetâ orbi proposui qui morbos simul & remedia luxuriæ doceret. Ad hunc , mi Lector , te pateri ablegari. Libido , pestis nocentissima est.

Hinc secundo etiam discendum , quam vigilantis memoriæ sit conscientia , quæ post quindecim , sæpe post triginta & plures annos objurgationes suas ingeminat : *Male fecisti* : Conscientia ut ulcus Telephium , verminosum , tetrum , pure plenum nondum incisum urit , cruciat , prurit , mordet , pungit , furit ; dum incidatur , & quicquid puris latuit , exprimatur. Pus virulentissimum est peccatum , dum hoc conscientia clausum latet ,

latet, hominem angit, sollicitat, torquet, excruciat velut ulcus, somnum & cibum turbat, quod nec stare, nec sedere, nec ambulare, nec jacere commodè permittit, ob continuum doloris morsum. Repeto, vermis eorum non morietur. Tribulatio & angustia in omnem animam hominis operantis malum. Quot enim vitia, tot invenies animæ tormenta. Conscientia nocens velut culeus seu sacculus scorticus coniectis in eum homine, serpente, gallo gallinaceo, cane. Nec ullus hominum tam impius est, quin antigraphus ille ac concionator domesticus excandescat & clamet: Quid facis miser, quamdiu hærebis in hoc luto? Deus tuus hostis tuus est; omnes cælites oderunt te; cælum tibi clausum, inferi hiantes expectant te. Aut resipisce, aut illuc abi. Et quando finem facies nequitiae? Evigila, ultimum minatur tempus: surge, reconciliare Deo. Hunc lulum quem tandiu lusisti cum Deo, demum deinceps. Vomitam incide per veram ac stabilem poenitentiam. Conscientia læsa, tormentum  
gra-

gravissimum. Forcipibus discerpetur candentibus, qui ad hoc supplicii genus seipsum per flagitia damnat. Tranquilla conscientia sancti spiritus hospitium: Impura conscientia Diaboli diversorium.

## CAPUT IV.

*Conscientia errans, conscientia nulla.*

**I**acobi Patriarchæ Filii, Fratres Iosephi, non uno tantum scelere in fratrem impii, cum Ægyptiis institutoribus Iosephum jam vendidissent, tunicam illi detractam hædi sanguine tinxerunt, & transmiserunt patri cum hoc dicto: Vide, utrum tunica Filii tui sit, an non? & Nolebant nempe mentiri, ac dicere. Fera illum laceravit. O teneræ conscientiæ homines! qui in religionem traxerunt mendacium, & per risum jocumque perpetrarunt homicidium. Jam eis certè decretum erat germanum occidere, ideo in foveam dejecerunt, fame perimendum. Hoc omne laxissima eorum conscientia glutire at-

E

que

que decoquere potuit. Esse homicidæ non recusarunt, mendaces tamen dici noluerunt. Ideo renuntiari patri jusserunt, videret, cujus ea vestis esset. Cogitarunt enim, absit à nobis ut fallacias fingamus, mentiri non est nostrum. Cruentam vestem mittamus patri, qua visa senex ipse conclusionem faciat, quid factum sit Josepho. Ita nequiter tranquillare cogitarunt conscientiam. Hoc facinus eam nobis exhibet Conscientiam quæ passim Erronea vocatur. Quamvis optimi Theologi affirmant, a Conscientiam imperitè dici errantem vel etroneam.

Nos tamen hîc iterum eam sequemur legem, quæ jubet, sapere cum paucis, loqui cum multis. Primo igitur, quid Conscientia dicatur erronea? Deinde, quis modus sit illam gubernandi, explicabimus; ubi prius Scripturam inspexerimus & Picturam.

S C R I -

*a Præcipuè meus Præceptor in Theologia ex Hispania in Germaniam vocatus.*







## SCRIPTURA.

*Non in omnibus est scientia ; & Conscientia ipsorum cum sit infirma polluitur. 1. Cor. 8. v. 7.*

## P I C T U R A.

*Canis ad aquam cum frusto carnis , videns in aquis umbram illius, eique inhians utroque excidit.*

**C**onscientia errans seu erronea, è falso principio ducit conclusionem. Hinc vitiosi aliquid virtutis larvâ induit, & quod perperam fit, legitime factum asserit. Quod Paulus explicans: Non omnibus, inquit, est scientia. Quidam autem cum conscientia usque nunc idoli, quasi Idolothytum manducant: & Conscientia illorum cum sit infirma, polluitur. *a* *Ævo* Pauli Christianorum infirmiores aliqui, ea sibi religione videbantur obstringi, ut non licere crederent carnem suillam, aut idolo ante positam comedere. Conscientia hoc suasit, sed errans. Nam utrum-

E 2

que

*a 1 Cor. cap. 8. vers. 7.*

que illud licuit, nisi res offensione & pernicioso esset exemplo. Quod Paulus dilucide præmonuit: Si quis dixerit, hoc immolatum est idolis, nolite manducare, propter illum qui indicavit, & propter conscientiam; conscientiam autem dico non tuam, sed alterius *a* Ergo carnes idolis immolatas comedere nullum nefas, si absit offensio. Haud absimili modo, est qui furtum æstimet non vitiosum, si opulento simulque improbo subtrahatur aliquid, & pauperi detur. Falsum principium, errans conscientia. Est qui licere credat mendacium, devotioni augendæ, religioni propagandæ, aut vitæ servandæ factum. Falsum principium, errans conscientia. Est qui spuum in templo ejectum pro noxâ ducat, & tamen spuat. Num iste à culpâ immunis est? Neutiquam non quòd re ipsa contraxerit culpam, sed quia egit contra conscientiam, ut suo loco uberius dicemus.

Hic cum Theologis triplex genus obligantis conscientiae assignemus.

Est

Est Conscientia Recta; est Errans sed innocenter & absque vitio; est errans vitiosè & cum culpâ: Theologorum voces sunt: est errans vincibiliter & culpabiliter, & est errans invincibiliter & inculpabiliter. Conscientia Recta, Bibliorum & omnium Theologorum consensu sic obligat sibi hominem, ut ei non solûm non audeat contradicere, sed obsequi debeat, & facere quod ei conscientia faciendum præcipit, si quidem evitare noxam velit. Certum hoc & indubium. Conscientia errat sed innocenter, cum quis in opinionem falsam & errorem inevitabilem minimeque voluntarium devolvitur. Conscientia errat, quæ aliquid honestum credit aut inhonestum, non certo, sed dubio assensu, nec sine formidine oppositi, nam illi perpetuò observatur, rem melius considerandam. Conscientia quæ innocenter & sine culpâ errat, non minus hominem sibi devincit & obligat atque Recta conscientia, tam positivè, ut scholæ loquuntur, quam negativè. Exempli gratiâ. Est qui putet intra Natalem

Domini, & Epiphaniam incundum  
jejunium & tamen non jejunet. At ve-  
rò Conscientia, quæ vitiosè impingit,  
ligat etiam & obstringit, sed casu &  
ex accidenti, ut Theologorum voces  
sunt, seu negativè: nam dum hæc  
Conscientia durat, contrarium ipsius  
imperio faciendum non est. Exem-  
plo demonstratur quod dicitur: Er-  
rans Conscientia sputum prohibet in  
templum ejicere, ne peccetur. Qui  
contra istud propriæ conscientiæ di-  
ctamen expuit, peccat, non quod a-  
ctio hæc in se mala, sed quia consci-  
entiæ, licet erranti, sit contraria. Sic  
alteri errans Conscientia præcipit,  
ut huic honorem, isti vitam servet  
mendacio: rem hanc aliter confieri  
non posse, non debere; mentitur er-  
go. Num hoc rectè ac piè facit? Neu-  
tquam. Nam omne mendacium est  
peccatum. Sin autem non fuisset  
mentitus, etiam peccasset, quia con-  
tra conscientiam fecisset. Quid, in-  
quies, hoc monstri est: sive mentiatur  
hic homo, seu non mentiatur, delin-  
quit. Ergo necessarium est peccare.  
Respondent Theologi necessitatem  
hanc

hanc secundum quid, & ex accidenti contingere. Nam in hoc tali casu minimè quis obligatus est ad hoc vel illud necessario faciendum, sed ad rejiciendam errantem conscientiam, cui principium hoc opponendum: Mentiri non licet, nec ad suam quidem, vel alterius servandam vitam: In templi pavimentum expuere, vana, nulla religio est. Ita & in cæteris ratiocinandum. Hinc aliqui dicere solent, Errans vitiosè conscientia ligat, sed non obligat, adeoque prudentis viri consilio est mutanda.

Igitur Conscientia seu vitiosè seu innocenter errans, ita hominem obligat, ut contra illam agere sine culpa non audeat. Ratio est, qui contra conscientiam agit, contra legem Naturalem & contra synteresin agit, quæ identidem insusurrat: omne malum, (etiam existimatum) vitandum est. Quod dicimus, dilucide demonstramus. Voluntas à se cæca pro regula & lege, sed remota, voluntatem habet divinam: Proxima illius, & velut domestica lex, est Conscientia, per quam divina ei voluntas innotescit.

tescit. Ergo Conscientia quantumvis erret, ita suum Dominum ligat, ut legitimè contra dictamen ejus agere non possit. Quòd si conscientia non sine culpa erret, excutienda, emendanda, rejicienda est Satis hîc exemplorum.

Qui Apostolos Christi Discipulos jugularunt, obsequium se Deo præstare arbitrati, num sapienter, obsecro, & bene fecerunt, an verò malè? pessime utique. Sin eos occidere nolissent, ne sic quidem egissent bene, quia judicarunt eos occidendos tanquam religionis novæ satores Quid ergo? suam hanc errantem conscientiam corrigere debuissent tali ratiocinio: Hi Homines nec Prædones, nec Fures, nec Latrones, imò nullis vitiis obnoxii sunt, peregrinam solùm & ignotam spargunt doctrinam. videamus ergo, num ea rationi sit consentanea? ita luculentissimè deprehendissent, non esse jugulandos. Exemplo rem alio monstramus.

Videt quis mendicabulum à malè factis centonibus, seminudum. Huic spectat-

ſpectatori ſuggerit conſcientia. Male facis niſi veſtem huic homini dandam fureris. Furatur? peccat, quia falſo nititur principio. Non furatur? peccat iterum, quia contra conſcientiam agit. Quid igitur faciendum? Corrigenda eſt errans hæc conſcientia, ſeu potius ejicienda eſt cum hoc dicto: Non ſunt facienda mala ut eveniant bona. Objicias: Quis iſtas tot diſtinctiones capiat? Hic conſidera, mi Lector, quam utiliter explicatio peccatorum ſit inſtituta, præſertim ad dirigendas conſcientias, & quam is nequiter ac malâ fide agat, qui ſtudio ſacerdotem imperitum, conniventem, indoctum quærit, cui conſcientiam ſuam committat. Sed exemplum aliud ſubjungimus rei magis in lucem proſcendæ.

Jam annis quindecim bellis interſtinis ardet Germania, & quod deterrimum eſt, Chriſtiani conſigunt cum Chriſtianis, hinc & hinc fulgent Crucis labara & in Martem ſuos educunt. Utraque pars conſcientiâ ſe urgeri ait. Sed alterutrius neceſſa-

rio errans est conscientia, & quidem vitiosè, nec sine noxa errans: suos illi errores facile est commonstrare. Magistratui legitimo rebellem esse: capitales Christianorum hostes in auxilium vocare; pactis conventis non stare; omnia fusque deque vertere, in fontes sedibus undequaque pelle-  
re, errantis planè conscientia sunt indicia: ergo amovendæ.

Idem è divinis libris luculenter ostenditur. Existimavit Iephte à sua conscientia devinciri & adigi se ad jugulandam Filiam. *a* Errans Conscientia. Nicol. Serarius eum ab omni peccato, tam in voto concipiendo quam exequendo excusat. Ita Prophetes iussus eo loci, vbi Iero-boamus habitabat, nec comedere nec bibere: Persuasus tamen ab alio Propheta credidit sese divinis imperiis minimè adversaturum, illie locorum edit & bibit. *b* Errans Conscientia. Sic & Oza judicavit se optimè facturum, si bobus calcitrantibus ab everfionis periculo servaret, & ful-  
ciet.

*a* Iudic. cap. 11.

*b* 3. Reg. cap. 13. vers. 18.



ciret Arcani. *a* Errans conscientia. Mardocheus putabat sibi non licere aulica cęremonia genu flectere. *b* Ita Machabęorum ævo Iudęi qui ad solitudinem confugerant, cum regis Antiochi miles sabbato illis inferret bellum, duxerunt nefas resistere, & vim vi repellere. Hinc occultos aditus non oppilaverunt, & nec lapillum quidem in hostem miserunt. Ita mortui sunt ipsi, ait sacer historicus, & uxores eorum, & Filii eorum, & pecora eorum, usque ad mille animas hominum. *c* Et hęc errans conscientia. Ita & Herodes Antipas, propter iurandum iniquissimum, quo se saltatriculę puellę obstrinxerat, Ioanni Baptistę caput in vinculis præcidi iussit. *d* Errans conscientia quam maximę. Ita & Iudęorum plures quàm quadraginta in caput Pauli conjurarunt, nec cibum se nec potum sumpturos, dum Tarsensem illum Ecclesiasten occidissent. Nam ita Sacerdotum principes allocuti: Devotione

E 6

tione

*a* 1. Par. c. 13. v. 7. *b* Esth. c. 3. *c* Mach. c. 2. v. 36. *d* Marci 6.

tione devovimus nos, inquiunt, nihil gustaturos, donec occidamus Paulū. *a*

Conscientia supra modum errans cædem Pauli credens obsequium Dei.

Quæras primò : Qualenam peccatum est agere contra conscientiam? ajunt Theologi, tale id esse quale illud æstimet conscientia; leve, si conscientia videatur levius ; grave, si gravius ab eadem judicetur. Quod hoc sensu accipiendum : Si conscientia vitiosè, seu vincibiliter, errans minora putet esse piacula, quæ capitalia sunt ex se, piaculo capitali se obstringit. Sin autem hoc idem Conscientia innocenter seu invincibiliter errans minorem noxam censeat, talis erit. Quòd si conscientia temeraria nullum peccatorum faciat discrimen, optimorum Theologorum judicio, letalem noxam contrahit, quia sese periculo exponit lætaliter delinquendi. Res delicata & tenera est conscientia negotium, ideò cautè tractandum. Num verò gravius delictum sit, conscientiam errantem sequi, an eidem etiamnum per-

perduranti actione ipsa contradicere? Hoc ex rei attributionibus, & iis quæ actionem circumstant, intelligendum. Exempli gratia: Si errans conscientia iniquum bellum suadeat, absque comparatione gravius peccat, qui paret conscientiæ tam injusta suadenti, quam si non pareat. Nam bellum impium multa hominum millia tollit, ubi pænè tot peccata quot funera. Quorum causâ est, qui bellum sine causa justâ orsus est.

Quæras secundo, si quis adeo animi confusus, ut quicquid faciat, peccatum metuat. Mentior? ait ipse secum, contra veritatem ago. Non mentior? Contra charitatem. Quid hic homo faciat? Minus malum eligat. Hic geminum documentum intillamus. Pharisaicam conscientiam cavere & propriam unicè curare.

Conscientiam Pharisaicam appellamus, quæ camelum glutit, percolat autem vinum, in quod fortè illapsa est musca. Hoc genus hominû Christus singulariter notans: Væ vobis, inquit, Scribæ et Pharisei Hypocritæ, quia decimatis mentam, & anethum,

thum, & reliquistis quæ graviora sunt, iudicium & misericordiam, & fidem. Duces cæci, excolantes culicem, camelum autem glutientes <sup>a</sup> Iudæi & eorum Pharisei crimina capitalia non curabant, non vitabant, in minimis noxis solliciti trepidabant. Die parasceves Pilati prætorium ingredi summæ religioni habuerunt; innocentem cruci affigere negotii nihil penitus illis facessebat. Haud absimiles reperias inter Christianos, quibus grande piaculum est, in ægroti gratiam lixæ carnis iusculum die Veneris prælibare, at vero alios maledictis figere, aliorum laudibus obtrectare, invicem mordere, invicem comedere & consumere, itaque humanas carnes dentibus quasi concerpere, ludus & jocus est. Conscientia Pharisaica ex asse. Quod beatus Lucas in Hebræos Hypocritas scripsit, id in Christianos hos Phariseos dictum puta: Væ vobis Phariseis, quia decimatis mentam, & rutam: & omne olus, & præteritis iudicium & charitatem Dei. Hæc autem

tem oportuit facere, & illa non omittere. *a* Narrat vir eruditus, feminam illustrem genibus reptantem in sacrarium ingressam, singulari reverentię argumento, illud ipsum tamen rebus omnibus despoliavit. O Christiani Pharisei! qui relinquitis quę graviora sunt legis, in minutiis hæretis & solidas virtutes negligitis! Peregrinatiunculam omittere magnum censetur nefas, fortunis aliquem evolvere, famam illi deminuere, in ludicro & vili ponitur.

Quicquid exterioris cultus est, omnesque cæremoniæ accuratissimè servantur; interiores Fidei, Amoris, Spei actiones vix quidquam curantur. En tibi! quàm ampla etiam nunc Phariseorum familia!

Alterum ergo est propriam conscientiam unicè curare. Hoc certè Thomas Morus doctrinâ & sanctitare vir magnus, præstitit eximiè. Qui litteris, quas è fatali carcere ad alios misit, hæc quoque inseruit: Circa aliorum Conscientias curiosus non sum; meam solus diligenter curo. Et pro-

fectò

fectò in meâ curandâ (parcat mihi Deus!) satis superque quod agam invenio. Nobile prisce ævi monitum est:

---

*Tecum habita: Et nôris, quam sit  
tibi curta supellex. a*

Suam quisque conscientiam quam diligentissimè curet. Tametî totum Galliarum regnum pro domo tibi sit unica si tecum ipse habitare nescias, nusquam habitabis, etsi habites ubique. Ergo, Tecum habita.

*a Persius.*

## C A P U T V.

*Conscientia dubia peritè dirigenda.*

**C**Ælestis illa, quam Salomon depinxit, sponsa dolenter quæsta: Invenerunt me, inquit, custodes, qui custodiunt civitatem; percusserunt me, & vulneraverunt me. Tulerunt pallium meum mihi custodes muros. *a* Qui seipsum, ut Gregorius expli-

*a Cantic. cap. 5. vers. 7.*

explicat , & Nosse cupit ; qui in seipsum descendere, conscientiam rimari : & illic cum Deo suo loqui desiderat, ballium relinquat, ea nimirum impedimenta, quæ ipsum abstrahunt, quò minus vacet conscientiæ. Et quamvis vulneretur , hoc est , incommodis rerum fluxarum afficiatur, modò bene habeat & in tuto sit Conscientia ; salva omnia.

De Conscientiâ hætenus differentes, quid conscientia , quid Bona sit, quid Mala, quid Erronea , explicavimus ; ordo poscit , ut quæ Dubia sit Conscientia. exponamus: patientem, mi Lector, aurem accommoda , qua brevitate poterunt & claritate, in lucem dabimus præceptiones non multas. Illud primò dicendum, quid in omnigenis dubiis anceps & pendens conscientia decernat. In hanc rem præscripta seu regulas pauculas è quam pluribus seligemus , posteaquam è scriptura capitis argumentum & adumbrationem obiter fuerimus contemplati.

F

S C R I -

a Greg. lib. 26. mor. & in cap. 5. Cant.

## SCRIPTURA.

*Quidam autem dubitaverunt.*

*Matth. 28. v. 17.*


## PICTURA.

*Asinus inter pabulum utrinque la-  
tum, vix ossibus hærens.*

CONscientiam appellamus dubiam  
quæ fluctuat, hæret, & in incerto  
habet, quid potissimum è duobus eli-  
gat. Hæc velut in bivio est, igno-  
rans quam teneat viam ; duas  
ante se januas habet, deliberans  
quam ingrediatur. Opinans Con-  
scientia, suæ quidem opinionis certa  
non est, in unam tamen partem pro-  
pensiùs inclinat quam in alteram, &  
liberè pronuntiat : Cum his sentio.  
Et in hac quidem materiâ, quam  
Theologi tam Scholastici quam Mo-  
rales tractant, centum distinctiones,  
clausulæ centum connecti solent.  
Nos quinque ponemus regulas, ad o-  
pinantis ac dubitantis Conscientiæ  
regimen expeditiùs tractandum.

I. Regula universalis. *Indubiis*  
*pars*







*pars tutior sectanda*, si quidem sine graviore damno id fieri possit. Et nunquid homo prudens & sagax in rebus moralibus illud identidem apud se repetit: Sequar quod tutius est: Intuta semper periculosa. Si ea est ratio rerum fluxarum, quanto magis æternarum? Hoc certè synteresis & omnis dictat prudentia; ut si flumen pons nullus frænet, illud tamen nihilominus mihi transcundum sit, parte illâ transeam, quâ maximè vadari potest.

Regula juris civilis communissima est: In pari causâ, tutior pars est eligenda. Exempli gratia: Dubito, num opifici egeno pretium laboris enumerârim, sed & opifex ipse dubitat, tam vir bonus est. Igitur securius fecero, si pretium jam nunc representem. At dubito, inquit, num fundus aut prædium sit verè meum. Quid faciam? Ei reddere, qui te appellat de prædio, tutum quidem foret, nihilominus quia tibi grande hinc damnum infligeretur, fundum retinere potes, dum ex jure Quiritium, aut aliunde magis liqueat, cujus

fit fundus. Idcirco Regulæ conjunctum: si sine graviore damno id fieri possit. Explico. Prudenter herus dubitat num suis famulis aut subditis onus imponere, aut operam ab eis expetere possit, quam sine damno præstare nequeant; obsequium ergo differat, dum prudens hoc dubium durat. Quod si neutra pars dubii tuta, & tamen alterutra sit necessario amplectenda, tunc eligatur minus periculosa. Et hoc in dubiis, quæ vocant, practicis servandum.

Hinc inter dubia speculativa, ut appellant & practica discrimen assignandum. Speculativum est in philosophorum Lyceis, utrum testamentum sit legitimum, Matrimonium ratum, Bellum justum; Vtrum hic equus meus, utrum hic mercatus, hæc nundinatio, hic contractus licitus: Vtrum die festo molere, lucricausa scribere, typos seu formas æneas componere, piscatum exercere liceat. Vtrum agricolæ permissum die Dominico aut sacro alio currum purgare, falcem acuere, fruges conveyere, plaustrum onerare; Vtrum do-

dominus cui plures sunt famuli, necessitate non compellente festo die iter facere possit. Hæc practica sunt dubia.

I I. Regula. *In dubio vtrunque pari, locus est gratificationi* ait Adrianus. Subinde dubiam velut bilanx æqualiter utraque parte propendet, tunc sanè vel cognatis, vel mihi ipsi, vel amicis gratificando aliquid possum apponere. Exempli gratia. Centum Philippeos stipi vel muneri dare decrevi. Sunt autem duo æquè bene de me meriti, sed alter cognatus est; huic igitur dono, aut certe donum divido. In muneribus quidem largiendis liberi sumus; neque hîc tamen prudentiæ leges negligendæ; nam etiam de muneribus ac donis, tam acceptis, quam datis, Christo iudici ratio reddenda est, & nonnunquam gravissima.

III. Regula, *In dubio propriè practico semper peccatum est, vel omittere aliquid vel facere.* Sententia Theologorum certa, paucis explicanda. Dubito rectène, an malum, si hoc tale faciam: dum dubito, id facere non

possum sine peccato. Dubito, num in illis ædibus vino non obruendus sim: illas igitur ædes adire mihi non licet. Dubito an in illâ domo contra castimoniam non sim peccaturus: illam igitur domum vitare obligor. Nam homo aliquñd acturus, moraliter certus fit, se rectè agere. Nefas est agere conscientia prius non practicè determinatâ. Nam quamdiu conscientia hæret ac dubitat, nulla potest inchoari actio, aliàs periculo se se objicit, qui sic agit. Siracidæ dictum est: Qui amat periculum, peribit in illo. *a* Ita prorsus qui dubitat, an læsurus sit amicum importunâ exprobratione, & tamen exprobrat, hoc ipso amicum lædit. Pari planè modo, qui dubitat, num hoc vel illud faciendo, sit offensurus Deum, & illud nihilominus facit, Deum certè offendit: estque id peccatum omnino tale, quale est dubium. Qui dubitat, num letalem noxam committat, nec tamen ab actione cessat, is fanè letaliter peccat; qui de culpâ leviori ambigit, & in actione pergit, hic levius delinquit.

Dixi, in dubio propriè practico. Nam potest quis speculativè, ut loquuntur, dubitare, & tamen certi aliquid apud animum statuere. Bonæ mentis subditus vehementer dubitat, num bellum, quod magistratus movet aut rex, cui subjicitur, sit justum: Quia tamen evulgati belli causas ignorat, nec eas indagare potest, judicium sibi practicum hoc modo efformat: Subditus suo domino, civis suo magistratui obtemperet, dum nulla cernitur injustitia. Ergo, inquit, quod felix & faustum sit, ad bellum proficiscor: de belli causis viderint reges qui bellum suscipiunt. En, dubium istud huic subdito speculativum est, ei tamen prudentia suggerit militandum.

IV. Regula, *Indubiis melior est conditio possidentis*. Hanc Theologi non solum in rebus justitiam spectantibus, sed etiam in ceteris virtutibus servant. Quæ autem dicatur possessio, centum præceptionibus explicant. Nos exemplis rem declarabimus. I. Dubito ego, num votum fecerim, num matrimonium promiserim.

rum. Hic etiamnum meæ libertatis possessor sum, salva conscientia definire possum, me votum non fecisse, matrimonium non promisisse, adeoque nullis hîc obligor pactionibus. Sed muto dicta, & ajo: I I. Constat quod votum nuncuparim, quod matrimonium promiserim, sed nescio an votum perfecerim, an matrimonium seriò promiserim. Hîc ego & voto alligor & matrimonio, quia hîc tam votum quam matrimonium in possessione sunt. Meismet verbis ligatus teneor. III. Eleemosynæ mihi commissæ sunt, sed nescio an eas distribuerim: obligor; nam illæ in possessione sunt. IIII. Constat mihi mortiferam culpam à me commissam, sed dubito num eam conscientia meæ judici aperuerim, ergo eam aperire obstringor, quia hîc peccatum in possessione est, uti communior fert sententia. V. Dubito num jejunii dies, num sabbatum transierit, an hora noctis duodecima jam audita sit, num liceat comedere? Non licere ajunt Theologi, quia jejunium est in possessione. Sin autem dubitem



an Dies Veneris , an Cinerum Dies coeperit , esse licebit, si quid obsonii ad manum sit , quia ego & libertas mea etiamnum in possessione sumus.

VI. Dubito num preces Canonicas recitarim, aut illarum aliquid omiserim, hîc eas certe totas, aut quod omîssum dubito, recitare teneor. Siquidem Lex Ecclesiæ hîc in possessione est , itaque dubius dicenda non dixisse creditur.

VII. Dubitatur, num famulus hoc illudve sublegerit. Hîc Famulus etiamnum famæ suæ possessor est, ideoque insons judicandus , saltem negativè si non positivè, nec in crimen furti trahendus , nec probri insimulandus est. Dum res aliis constet experimentis. Dubia namque de personis in melius explicanda. Ah milles, iterumque milles temerariis hîc judiciis delinquitur. Cum levis dubitandi causa est , ingens oritur suspicio. Hinc flammæ & incendium. Revera judicandus est probus , qui certæ improbitatis insimulari non potest. Innumeræ hîc injuriæ committuntur temerariis suspicionibus,

præcipitatis judiciis, falsis accusati-  
onibus. Nisi ejuscemodi mille dubia  
hinc prudenter enodâris.

Intricatissima matrimonii arcana  
non tangimus, negotium enim tam  
perturbatum est, ut rectissimè dixe-  
runt apostoli: Si ita est caussa homi-  
nis cum uxore, non expedit nubere.<sup>a</sup>

V. Regula, *E duabus opinionibus  
probabilibus, licet pro arbitrio eligere  
alterutram, etiam minus probabilem.*  
Opinionem probabilem eam dici-  
mus, quæ veritati utcunque consen-  
tanea, quæ rationi ac eruditorum  
opinionem conformis est, etiam si pau-  
corum, aut etiam unius solùm Erudi-  
ti viri sit ea opinio. Exemplum nobis  
positum sit hujusmodi.<sup>b</sup> Est Sacerdos  
qui usuras quincunces censeat ini-  
quas & idcirco hominem de peccatis  
confitentem liberum ab iis pronun-  
tiare nolit. Huic si opponat confitens  
reus eruditorum judicio æquas sibi  
videri, gravissimè obligatur Sacerdos  
hunc noxarum vinculis eximere.  
Nec

<sup>a</sup> Matth. cap. 19, vers. 10. <sup>b</sup> 5. von  
100. gül. Germani vocant den Göttlichen  
Zins.

Nec enim vi legis obstringimur, ut semper eligamus meliora, alioqui virginitas præ conjugalibus tædis nemini non eligenda foret. Hæc assero, non ut conscientiam ullius perturbandam, sed angores, contractiunculas, & morsus præcaveam. Neque hæc primæ Regulæ adversantur: ibi de dubiis, hic de opinionibus sermo est. Hoc autē in arte medica nil loci habet, in qua tutior semper ac probabilior opinio sequenda. Iudex civilis inter opiniones æquè probabiles pronuntiet ut vult (secundum aliquos: ) at rectius ageret, si neutra pars litigantium in possessione sit, res componendo vel æqualiter dividendo.

Beati Pauli verbis finio: Omne autem quod non est ex fide, peccatum est. *a* Non de fide solum universalis, sed de practica prudentiæ, seu de credulitate, & conscientiæ dictamine pronuntiat. Hinc Ambrosii, Chrysostomi, aliorum effatum est. Quicquid contra conscientiam, peccatum est. Nam Paulus hoc loco de

iis locutus , qui cibos lege Mosis vetitos, non licere Christianis comedere censuerunt. His respondet Orbis Doctor , hos cibos optimo jure posse comedi ; peccari tamen, si vel adversante conscientia, vel alterius offensione comedantur. Vnde illa Pauli verba : Omnia quidem munda sunt, sed malum est homini qui per offendiculum manducat. Tu fidem, quam habes, seu practicum conscientiaë dictamen , penes temetipsum habe coram Deo. Qui autem discernit , si manducaverit , damnatus est , quia non ex fide. Omne autem quod non est ex fide , (*contra Conscientiam*) & peccatum est. Esto igitur consentiens adversario tuo citò , dum es adhuc in via cum eo. Tuam ipsius conscientiam summâ sollicitudine cura. alii curent alia, suam ille crumenam, suam iste voluntatem , hic suam dignitatem. Tu omnem operam, tu curas tuas & cogitationes in tua pone conscientia. Quicquid contra conscientiam est, peccatum est.

## CAPUT VI.

*Conscientia scrupulosa, tam erroris  
quam doloris plena.*

**C**Laræ vallis Apis Bernardus de  
domo interiore differens : con-  
scientia hominis, inquit, abyssus  
multa. Sicut enim abyssus exhauri-  
ri non potest, ita nec cor hominis ;  
mare magnum est & spaciosum. <sup>a</sup> Si  
quis ab alto subjectam contemple-  
tur terram, hîc segetibus vestitam,  
illic hortis pomiferam, istic silvis um-  
brosam, hic fontibus & aquis irrigu-  
am, illic pascuis & pratis floridam ;  
O Pomum pulchrum & eleganter  
coloratum! sed in hujus pomi medio  
fœdissima latet putredo. Siquidem  
priscorum Patrum testimonio terræ  
umbilicus claudit inferos. Cum igi-  
tur terra sit orbicularis & rotunda, ut  
Geometræ docent, & in terræ medio  
æternus Dei carcer ardeat, non malè  
dicetur : O rotundum & elegans po-  
mum, sed in visceribus hæret defor-  
mis vermium nidus.

Idem

<sup>a</sup> Tern. de domo interi c. 44. mihi pag. 1082.

Idem pœne plurimis de Homini-  
bus dixeris: O Hominem elegantem  
& ornatum, venustatis plenum ! sed  
arcana pectoris retegantur, suas con-  
scientia valvas pandat, & vitiorum  
carcer, inferorum sedes deprehende-  
tur, Conscientia mala, vel certè an-  
xia & *scrupulosa*. De mala dictum, di-  
cendum de *scrupulosa* à quæ angit, tor-  
quet, urit gravissimè, velut Oreus.  
Hunc tormentorum locum in hoc  
capite scrutabimur, ita quidem, ut  
primò dicamus, unde oriantur scru-  
puli, dein quomodo sint curandi.

## S C R I P T U R A.

*Illic trepidaverunt timore ubi non erat  
Timor. Ps. 52. v. 6.*

## P I C T U R A.

*Populus alba foliis, quæ intus nigra,  
semper tremula : sub arbore tym-  
panum & Lepus.*

**C**onscientia pavida, prætrepida,  
anxia, vario metu suspensa, vulgò  
nominatur *scrupulosa* à lapillis ac  
serupulis, qui calceis inhaerentes  
mise-







miserè affligunt viatorem; magis tamen vexant quam vulnerant. Ita scrupulus est mentis anxietas, quæ levi aut nullo fundamento aliquid ceu malum apprehendit. Hoc autem non est dictamen rectæ rationis vel præcticum judicium, sed animi figmentum, phantasia mera, timiditas indocta, Panicæ formidines. Ideò adversus hanc conscientiam omni modo positivè & negativè, ut Theologi loquuntur, nitendum. Hæc enim vana formidatio, reddit hominem inquietum, turbidum, animi inopem, confusum, dubium, incertum, negotiis malè vacantem; lædit quandoque valetudinem, & ab exercitiis melioribus abducit. His obstaculis fortiter reluctandum.

Atqui, dices, contra conscientiam agere nunquam licet, uti suprà demonstratum est. Sed negamus hanc mentis trepidationem esse conscientiam, seu rationis judicium, sed sine judicio vanam opinionem. Hic tamen cavendum, ne fiat è scrupulis errans conscientia, quæ vero nomine appelletur scrupulosa.

Origo

Origo scrupulorum varia. I. Instinctus cacodæmonis, hic enim cum bonæ mentis hominem gravioribus vitiis irretire ac fallere nequit, hanc sanctimonix larvam induit. II. Imbecillitas capitis, aut atra bilis. *a* III. Imbecillitas animi, & inscitia. IV. Diffidentia de divina bonitate ac misericordia. V. Abdita nonnunquam superbia, quæ suæ inscitix magis credit quam ullis eruditorum monitis. VI. Divina providentia & dispositio, quæ sæpius aut in priorum noxarum poenam, aut in humilitatis, patientiæ aliorumque promeritorum augmentum hos animi angores immittit.

Non solum autem probiores Homines his scrupulorum aculeis punguntur sed nonnunquam negligentes etiam & vitiosi, qui de commissis nimium anxii, nihil autem solliciti sunt de cavendis, ægitudine horribili cruciantur quòd malè egerint; ne malè agant in posterum pessimè securi marcent & oscitant. Majorem tamen partem scrupulis infestantur probi.

probi. Sed undecunque tandem orientur scrupuli, si permittantur agere radices & invalescere, ita demum occupant & affligunt hominem, ut is conferri possit terræ, cujus umbilicus inferos complectitur. Ipsimet fatentur scrupulosi homines, malle se malis onerari quantiscunque, quascunque perpeti ærumnas, modò animum Deus scrupulis liberaret. Ideo proclamat Cajetanus. Væ væ Confessario habenti verum scrupulosum pœnitentem.

Originem scrupulorum scimus. Sed quid remedii est? quâ juvandi sunt tam inani religione obstricti? Præceptiones quinque suppeditamus.

PRIMA. Origo scrupulorum accuratè observanda. Si namque in causâ sit atrabilis, aut alia quæcunque corporis malignior dispositio, pharmacis expugnandum hoc malum. Sermonibus solis hunc talem nemo curaverit. Sin à DEO immitti censeantur hæ morsuunculæ; oratio, sed perpetuata & constans, unicuique est remedium. Augustinus olim et-

jam talis sed moderate talis, cum Deo ita loquitur: Multum timeo occulta mea, quæ norunt oculi tui, mei autem non norunt. In his omnibus periculis & laboribus vides tremorem cordis. <sup>a</sup> En & Augustinus populus trepidula fuit, sed ad Deum se se erexit, preces iteravit, auxiliatorem quæsiit. Subinde scrupili ex occultâ oriuntur superbiolâ, quod sine ambagibus dicendum scrupuloso, ne solum se credat sapere. Ego tamen existimo creberrimam scrupulorum originem esse, quod de bonitate Dei ac misericordiâ nimis abjectè ac exiliter sentiamus, atque hinc providentissimo Deo non satis fidamus. Vir sapiens & sanctus homini nimium scrupuloso & diffidenti non immerito exprobens: Quem quæso, inquit, tu tibi Deum fingis? num ergastularium <sup>b</sup> putas?

SECUNDA. Intelligendum probè quid sit *voluntarium*, quid *minus voluntarium*. Quam primum homini implicato scrupulis objicitur cogitatio,

<sup>a</sup> Aug. l. 10. Confes. c. 28. <sup>b</sup> Haltestu Gott für einen Stockmeister?

gitatio, tametsi sint motus primò primi, ut in scholis loquuntur, mox ille tamen pestiferæ cogitationi se consensisse suspicatur, aut etiam credit. Hunc talem Augustinus in spem meliorem erigens: Nullum est, inquit, peccatum nisi sit voluntarium. At homo scrupulosus, inquires, se cogitationi pravæ consensisse putat. Obduco ego: Putare, non fatis; scire aliquid est. Prima cogitatio, quæ animo se se objicit, peccatum non est, sed in eâ cogitatione morari, hæ-  
rere, oblectari, hoc peccatum est, & consensus saltem in oblectationem: Si quis ulterius progrediatur & dicat: Si mihi non deesset occasio facere, quod cogito, certè facerem; hic demum verus est in ipsam peccandi actionem consensus. Examinandus est igitur homo scrupulosus: Num placuit tibi maligna illa, seu blasphema, seu immunda cogitatio? Minimè verò, dicet; nil æquè displicuit. Quid ergo trepidas? peccatum, ut Augustinus docet, est dictum, factum, vel concupitum contra legem Dei.

TERTIA. Diffidendum est iudicio proprio Cautissimè monuit Hebræus sapiens : Ne innitaris prudentiæ tuæ. *a* Nullus hominum sibiipsi satis sapit , quantò minus ille qui ignorare vix potest , in extremo margine , se periculose incedere. Scrupulosi autem proprium est, opinionem falsam mordicus tenere, nec permittere, ut ab ullo ea eripiat.

Matthæus memorat Christi genibus provolutum ægri Filii Parentem cum hoc supplice libello : Domine miserere Filio meo , quia lunaticus est , & malè patitur. Nam sæpe cecidit in ignem , & crebrò in aquam. *b* Ita sanè homo scrupulosus lunam gerit in pectore , ex unâ in aliam cogitationem raptatur , vel enim de præteritis peccatis angitur , vel de futuris. Hic facilè metum omnem eximam menti, si obsequentem nanciscar aurem. Quod igitur confessionis mysterium , & peccata præterita spectat , si quis sincerâ fide , animoque candido , & sine dolo malo ausit dicere : Tametsi furta, cædes, adulteria,

teria, hisque commissem graviora, nihilominus hæc meæ conscientiæ judici detegerem ingenuè, ad usque maximam, minimam noxam. Hic certè tam sinceri animi homo nil habet quod metuat: Non enim errabit, si velit, prout discentem decet, credere; nec suo sese arbitrio regere; nec deerit vir prudens, qui ei dicat, hoc peccatum est, hoc non est: hoc peccatum grave, hoc levius est: hic primus motus, & incursus diaboli, hæc delectatio morosa, hic consensus est. Quod si quis seipsum hîc satis putet sapere, intricabit & præcipitabit se miserè. Vnde omnium tutissimum parere, & viri prudentis arbitrium suo præferre, nec detrectare manu alienâ duci ac dirigi.

QUARTA. Fugiendum omnibus modis otium. Nam præter tot nobiles, scilicet, otiositatis fructus, sunt & scrupuli. Homines scrupulis malè accepti, ignavâ se macerant quiete, imaginoli, meditabundi multa secum animo volutant. a mæsti & per-

occupati, si non penitus otiosi. Scis, mi Lector, cui hominum præsertim divitum afflictiones sæpe tam graves ac pænè intolerabiles videantur? Non satis occupationum habent, commentantur, sedent, & meditantur de rebus variis, & miseras suas cogitationibus suis plurimum augent. Egenus opifex totus in suis laboribus est, hoc unum dies noctesque cogitat, quâ se aliat; quid ad farinam faciat, quid pani lucrando expediat; non vacat ipsi alia cogitare. At opulentus non satis occupatus, dies noctesque vanissimis, nonnunquam & nequissimis mergitur cogitationibus, nunquam facta, nunquam futura sibi fingit, & mente agitat, & licet documentum aliquid & solatii accipiat, mox illud inter animi sui figmenta perdit. si molendino non offundatur triticum, aut melioris generis frumentum, quicquid sordium rapit, commolit; ita mens humana instar molendini eas cogitationes volvit, quas illi bonæ, vel malæ, vel nullæ occupationes suppeditant. Multa millia hominum percunt, non tam malè



malè agendo , quam nihil agendo. Quamvis qui aſſolet nihil agere , non poteſt non etiam malè agere. His ingerendum illud poëtæ: *Salmaci vel jaculum, vel pictas ſume phareras.* a Age aliquid, corpus exerce, ingenium acue, memoriam excole, occupationes utiles diſpone , & ſcrupulorum ac vanarum cogitationum tota fugabis agmina : age aliquid.

QUINTA. Sequitur è veſtigio præceptionem quartam. Quando enim homo ſcrupulis infeſtatus , arbitrio ſuo & judicio nequaquam fidere poteſt, totum ſe alterius & judicio & arbitrio committere ac ſubjicere debet, nec aliter , quàm ſicut jubetur, agere. Tobias filium ſapienter erudiens : Conſilium , inquit , ſemper à ſapiente perquire. a Hoc ipſum Auguſtinus ſuadens Paulino : Conſule bonos prudentesque viros , ait, & acquieſce eis. Conſilium ſaluberrimū ſcrupuloſis ; ſinant ſe regi ab eo , cui ſuam commiſerunt conſcientiã, ejuſque ductum in omnibus ſequantur, & velut Angelo rectiſſima monenti mo-

G 4

rem

a Ovid. *Metamorph.* b Tob. c. 4. v. 19.

rem gerant. Hac parendi ratione certus esse poterit scrupulosus, se non erraturum, etiam si erret, qui suadet & jubet. Quod non solum Cajetanus & Navarrus, sed Vasquesius, Filliuzius, Pesantius aliique recentiores theologi docent. Hinc liquet quam Deo sit grata subjectio & obedientia, quâ alter alteri sese regendum credit. Propter hoc obediendi studium nonnunquam Deus extra legem & naturam mirificè opitulatur.

In beati Bernardi cœnobio, ut divus Antoninus memorat, homo religiosus adeò scrupulis agitabatur, ut sacris operari constanter refugerit. Hunc Bernardus imperio miti allocutus: Quæso te, inquit, mi frater, tu rem divinam perage; cetera meæ curæ relinque; hoc ego quicquid est criminis, in me recipio; ego defensor tuus pro te rationem reddam. Tu ita perge, ut jubeo. Paruit, fecit, & ab omnibus conscientiae stimulis liber evasit. *a*

Huic affine narrans Climacus:  
Annis

Annis viginti, ait, spiritu blasphemie gravissimè impugnatus est quispiam; quicquid remediorum adhibuit, frustra fuit, quia hanc vomicam viti-oso silentio texit. Demum quod maligni puris in pectore latuit, sermone candido aperuit. Cui religiosus senex super collum meum aiebat, sit hoc peccatum tuum; tu illud tantum floccipende. Statuit obedire; & antequàm abiret, liberatus est. *a* Ergo, ne innitaris prudentiæ tuæ, & consilium semper à prudente perquire. Ita sanè liberari possunt ex mitioribus his inferis, qui porrectam dexteram non respuunt. Plurimi sic adiuti sunt, qui totos sese aliis commiserunt: multi aliter juvari non potuère.

Nec tamen silendum hoc loco, sæpe scrupulos videri, & veros esse morsus conscientiæ, quæ hominem identidem vellicat & monet sceleris admissi. Theodoricus Gothorum Rex, duos principes viros & exfortes culpæ, Symmachum Consulem, & generum suum Severinum Boëtium ob levem affectati regni suspicionem

G 5

iussit

jussit interfici. Eodem die prægrandis piscis caput in cœnam allatum est Theodorico: quo conspecto ita territus est, perinde si capita Symmachi & Boëtii sibi minantium aspiceret. Hîc utique non defuerunt homines ad omnem adulationem facti, qui dicerent: Rex in æternum vive: Non est, quod Majestas tua hîc quidquam metuat, merum hoc oculorum ludibrium est; contemptu vincitur. Hi mores aulæ sunt etiamnum hodie, cum adulationibus omnia inaurantur. Sed reverâ hîc conscientia revixit, quæ flammâs, velut Ætna, sursum jaculata regem adegit ad extrema. Theodoricus namque à terribili illo in mensâ prodigio in conclave proximum secessit, intra triduum extinctus. <sup>a</sup>Discite justitiam moniti, & non temnere Divos. Latranis conscientiæ morsus non semper scrupuli, sed veri sunt hortatores, ut vitiis emergat, qui se iis temerè submerisit.

Vnde Theodorico Theodosius Imperator pius quantò melior! Visus est

<sup>a</sup> Procopius l. 1. Crantzius l. 3. c. 19.

est sibi optimus Cæsar in agmine fornicarum confidere, & undique torqueri, adeo illum conscientia stimulabat. Hos conscientia ignes subiecit præceps in Thessalonicenses ira Theodosii. Ruffinus, vir ad aulæ ritum factus, monitricis conscientia incurius, Imperatori hilares animos suggerere, facinus extenuare, scrupulos inanes dicere. Ambrosii sacrum fulmen eludere, fasces, diadema, purpuram monstrare. At Theodosius domo clausus, flens & orans: O Ruffine, ait, tu mea vulnera non sentis: ego lamentor & gemo calamitatem meam; quia servis quidem & mendicis aperta sunt Dei templa, quæ ingredienti illi proprium Dominum licite exorant: Mihi verò ingressus ad eum non est; insuper etiam cæli mihi sunt obsecrati. Hæc verba singultibus, velut infans præfocabat, nec quietem ullam capiebat, dum sese Ambrosius vinculis Ecclesiæ solveret, & ablato anathemate in Societatem piorum reciperet. Igitur verissimum est illud Ambrosii: Nullus major est dolor, quam

is, qui peccati mucrone vulnerat conscientiam; neque ullum gravius est onus, quam peccatorum sarcina & pondus flagitiorum. *a* Cura valetudinem, mi Lector, sed præ omnibus cura conscientiam, non anxiam, non scrupulosam, non errantem, non dubiam, non laxam, sed cauta in habeas & morigeram.

## CAPUT VII.

*Conscientia cauteriata plus errat,  
quam dolet.*

**E**ques Romanus vir ingenii facti calceos suos passim ab omnibus laudari audit. Quibus ille: sint, inquit, elegantes hi calcei, & os populi mereantur: sed nescitis, ô amici, quâ parte me urant. Ita non raro florentes alteri genas gratulamur, tanquam indubitatum valetudinis bonæ indicium, qui latentem ægri pectoris æstum ignoramus: vel contra invidemus aliis Bacchanalia, quæ vivunt, signari morsuum, quibus interim animitus discruciantur: Fucata mul-

multorum probitas, ut nos in admirationem pariter & venerationem sæpissimè trahit! qui pelliculam nitentem præferunt, doctrinam contemptam spargunt, blandos mores ad omne vaframentum fingunt, homines spirituales se vendunt: cum verò ad eorum venit conscientiam; CAUTERATA invenitur. Quid hoc portenti est, inquires, & quo cauterio inuritur Conscientia?

Hic necessario pluribus differendum super hac re. Et quidem si de conscientia hujus nomine sit sermo, varium est, res eadem. Nam Conscientia surda, dormitans, nimium laxa, propemodum extincta, & cauteriata, vix quidquam differunt. Hoc igitur capite docebimus, quænam à Paulo Cauterata dicatur Conscientia, & quo ea cauterio inuratur.

## SCRIPTURA.

*Conscientiam habentes cauteriatam*

*1. Tim. 4. v. 2.*

*Dolium fatiscens cum cribro largiter  
perforato, & mandato ad va-  
luas discerpto.*

**C**onscientia cauteriata à beato  
Paulo ea dicitur, quæ stupida  
jam, & insensilis tam peccati com-  
missi, quam amissæ gratiæ sensum  
amisit; sicut pars brachii aut pedis  
cauterio inusta. Hoc potissimum o-  
lim conquestus Hieremias vates de  
civibus Hierosolymæis: Percussisti  
eos, inquit, & non doluerunt, attri-  
visti eos, & renuerunt accipere disci-  
plinam; induraverunt facies suas su-  
pra petram, & noluerunt reverti, a  
inustam scilicet & cauteriatam in-  
sensilem habentes conscientiam.

Videte & inspicite conscientiam  
Esau, quam ea cauteriata, surda, stu-  
pida, Capitali odio germanum in-  
sequebatur, & iratas animo cædes  
coquebat, vivo tamen parente nihil  
attentare ausus: Venient, inquit,  
dies luctus patris mei, & occidam  
Jacob.



Jacob. *a* Sinamus senem suo defungi fato, & sentiet frater, me non obliuiosum esse vindicem injuriarum. Vltionem ex fratre petiturum se negat vivente patre, sed mortuo, ita patrem plus timuit quam Deum. En conscientiam, sed cauteriatam! en cribrum, sed perforatum quod dimittit, quicquid recipit. *b*

Videte & inspicite conscientiam Pharaonis, qui diu lusum impium cum Deo lusit. Nam sæpius Mosi dixerat: Ite & sacrificate. mox manumissos iterum retraxit. Sed eos iterum dimisit, iterumque detinuit, idque novies repetiit. Tandem toties ictus piscator cœpit sapere. Cum enim Ægypto totâ omne primogenitum Angeli rhomphæa cecidisset, Pharao supplicii diritate, tamque immensi strage territus, Ite, inquit, Ite, & immolate Domino sicut dicitis: Oves vestras & armenta assumite, ut petieratis, & abeuntes benedicite mihi. *c* Vixerat in eo adhuc scin-

*a* Gen. c. 27. v. 3. *b* Ein Gewissen dadurch man fündet junge Hunde beutten.

*c* Exod. 12. vers. 32.

scintilla conscientiae: dimisit populum, sed coactus: benedictionem petiit, sed non valde ferius.

Videte & inspicite conscientiam Hebraei Regis David. Post adulterium & homicidium patratum, decem mensibus minimum dormitavit ejus conscientia. Tacuit Rex David, non doluit, non ingemuit, vulnus conscientiae dissimulavit, medicam manum non expetiit; nullum *Misere*, nullum *peccavi*, auditum. Vtique conscientia eum subinde monuit; Hoc fecisti, & haecenus non doluisti. Vbi poenitentia, ubi gemitus & fletus? Cui David, Tace tu, & quiesce. Si Deus conniveat, cur nos turbemus quieta? Tandem adfuit, Nathan Propheta & dormitantem conscientiam excitavit his omnino verbis: Quare contempsisti verbum Domini, ut faceres malum in conspectu meo? Uriam Hethæum percussisti gladio, & uxorem illius accepisti in uxorem tibi. Itaque hæc dicit Dominus: Ecce ego suscitabo super te malum de domo tuâ. *a* Hic gemitus

gemitus & fletus, hîc audita vox illa dolentium, *Peccavi*. Hîc vigiliæ, preces, jejunia, cineres, cilicia sumpsêre initium; Hinc orti clamores illi, *Miserere mei Deus; Tibi soli peccavi; Ne projicias me á facie tuâ.* *a* Hinc largi oculorum imbres illi: Lavabo per singulas noctes lectum meum, lacrimis meis stratum meum rigabo. *b* Singulis noctibus fonticulos tam largos depluam ex oculis, ut lecti mei operimentum non madefacere solúm, sed & lavare possim; imò, quod phrasis Hebræa docet, natare faciam, eâ diuturnitate atque abundantia fundam lacrimas. Neque hoc tantum per unam alteramve noctem, sed per totas noctes longo tempore has mei lectuli thermas ex oculis emittam. *c* Ita dormitans conscientia evigilavit, ita cauteriata sibi integrè restituta est.

\* Noëmus ubi crapulam nullo usu cognitam edormisset, temulentum &  
H male

*a* Ps. 50. vers. 3. 6. 13. *b* Ps. 6. vers. 7.  
*c* Ita lectio Hebræa, ita Hieronymus vertit.  
Vide Bellarminum in ps.

male tectum se fuisse comperit: dum dormiit, vini potentiam, temulentiaë vires, filii nequitiam planè ignoravit: Qui dormitantem fovet conscientiam, non cogitat quam infinita sit cujuscunque letalis noxæ turpitudine; quæ gratiâ divinâ omni spoliât, cælum eripit, dæmonibus illudendum propinat, inferorum suppliciis addicit. Vbi autem Noëmus evigilat ex vino; ubi, qui improbè egit, ad sese redit, hæc antè ignota sibi, agnoscit. Ita David regi contigit; altum & diu dormiit, monitus evigilavit, & resipiscentiâ illustrissimâ omnem priorem vitam correxit.

Hebræus Hercules Samson in urbe Gazâ hostium formidabili coronâ cinctus, nocte intempestâ subito consurrexit & ambas portæ valuas velut geminos afferculos apprehendens in montis fastigium asportavit. Hic ipse, funibus novis ligatus in amicæ sinu dormiens, hos autem evigilans ut telarum fila rupit: Ita non rarò conscientia quæ diu videbatur surda, stupida, cauteriata, tandem consurgit in iras, & quod celaverat, ostendit robur. — Epi-

Epiphanius narrat doctissimum Originem sub ipsa concione quam ad frequentem populum habeat, ad illud psalmi devenisse: Peccatori autem dixit Deus; quare tu enarras justitias meas, & assumis testamentum meum per os tuum. *a* Hic Origenis conscientia, velut terra movit insolito succussu. Nam Origines librum quem manu tenuerat, clausit, & ubertim illacrimans abiit è cathedra, quod meminisset se Alexandriæ vi tyrannidis attactum Diis obtulisse thura. Auditores omnes sui oratoris miserti cum flente flentes concionem soluerunt. *b*

Habuit divinus Paulus nobilissimos olim auditores, Romanum præsidem Felicem, & conjugem ejus Drusillam, quæ maritum verum Emesenorum regem Azizum deseruerat. *c* Hi duo conjuges surdam ceteroqui & stupidam, imo & cauteriatam conscientiam gerebant, ho-

H 2

mines

*a* Ps. 49. vers. 16. *b* Epiphan. de Originistarum hæresi. *c* Ita Iosephus l. 20. Antiquitat. cap. 5. & de bello Ind. l. 2. cap. 10.

mines fictorum Deorum cæci cultores. Sed Paulus eo spiritu & dicendi ardore de fide in dominum JESUM, de justitiâ, castitate ac judicio futuro peroravit, ut tremefactus Felix responderit. Quod nunc attinet, vade; tempore autem opportuno accersam te. *a* Ita etiam dormitans, ita cauteriata etiam conscientia evigilat quandoque, & incipit post suam ipsa sepulturam vivere.

Sed quodnam illud est, inquis, cauterium quo conscientia inuritur, & fit stigmatias? Consuetudo, & inde nata peccandi libertas. Toties tamque crebris actibus peccatum iteratur, dum obsurdescat conscientia; non quòd illa ægrè audiat, sed quia homo in peccandi licentiam abjectus, velut in conscientiæ aures digitum immergit, & oculos obducit velo, dum absque censurâ sui anti-graphi liberè peccet. Ita delinquendi licentia & assuetudo velut cauterium, seu, candens ferrum Conscientiam inurit, ut ea vix tenuissimè spiret, surda, cæca, muta & pænè mortua.

Hebræorum Regum fasti memorant idolo Moloch vel Melchom filios & filias per ignem consecratos, & quod hoc fiebat ritu. Moloch ærea & fusilis fuit statua, intus cava, huic subiciebantur ignes dum incandesceret. Porro infantuli, Molocho immolandi, cum statua jam incanduisset ignibus, in idoli brachia ponebantur: Ne autem parentes tam tetro sacrificio adstantes, miserabili ploratu parvulorum percellerentur, ingenti strepitu personabant tympana, ut voces morientium non possent exaudiri. Parentes parvulorum minimè surdi sed bene auriti, mugientibus tympanis expirantium fletus tamen neutiquam percipiebant: Ita prorsus, conscientia cauteriata vitiorum inconditos ululatus probè perciperet, si tympanorum strepitus abesset. Homo peccandi consuetudine illectus, aures sibi ipsi hoc tympanorum fremitu obtundit: Quid angeris? Bellè omnia succedunt. Facis, quod multi, quod faciunt omnes; Nunquid tu solus habitabis

H 5

cælum?

cælum? Bonus est Deus, & misericordia illius super omnia opera ejus. Erit poenitentiae tempus, venit dies expiandi animi. Vnâ tunc liturâ catalogum longum delebimus. Nunc carpamus gaudia; jucundè ac hilariter agamus; curemus, ut nobis beneficit. Aude aliquid brevibus Gyaris dignum. Tempus ridendi, tempus poenitendi: Vivamus.

Tympanistriam ejusmodi sacrae litterae nobis depingunt in Iezabele Regis Achabi conjugem, quae semisopitam mariti conscientiam novit in profundissimos dare Rhonchos, & residuam bonae mentis favillam funditus extinguere. Rex vicinam in vineam exarserat, sed cum illa negaretur licenti, ad insaniam propè homo incolumis redactus est; cum quia spe inopinatò dejectus, tum etiam quod injuria gravi, ut ipse interpretabatur, affectus esset. Vi tamen & regiâ potestate abstinerebat, reverentiâ Conscientiae bene monentis: donec Tympanistria supervenit uxor, & tristitiae causam expiscata classicum canere coepit: Næ tu homo, inquiebat,



bat, antiquus & albæ mentis es, qui capat gentis isthæc ab hominum ultimo pateris ! Grandis auctoritatis es, & bene regis regnum Israël : surge & comede, & æquo animo esto <sup>a</sup> Origo doloris errorisque pariter est, quod ignores quid Regem inter & subditum intersit: id nempe unicum, ut ille agros & oliveta optima tollat, iste jacturam patienter ferat: hæc lex iam olim lata est cum à iudicibus populus ad regem appellaret. <sup>b</sup> Tu modó æquo sis animo, surge & comede: Ego tibi vineam dabo. Ad hos Tympani sonitus & bombos altissime obdormiit Achab, ut nec animaduertèret quid fæmina nequam, Regis abusa nomine contra insontem scriberet, quid regio annulo signaret: verbo, non sentiebat se vendari, ut malum faceret in conspectu Domini donec irati Numinis fulmine per Eliam excitatus, vestimenta scindere, carnem cilicio operire, jejuniis vigiliisque sese afflictare, atque demisso in terram capite se re-

um

um profiteri aggressus, Deo sibi que ex integro est restitutus.

Quam Jezabel Achabo inculit mali pestem, conscientia aures obturando, ab intestino sibi quisque nostrum hoste quod metuat, habet; à Philautia tympanistriarum pessima: cui hæc talia in promptu & semper ad manum sunt tympana:

Quæ dum strepunt, conscientia velut surda, nec commonentis Angeli, nec dehortantis Christi voces percipit; sed in sylvam itur, è quâ sæpissime non reditur; noxarum in dies plurimum committitur, & nihil expiatur; fauciatur conscientia, & non curatur plaga, quia non sentitur. Ut callosæ manus strictum gladium attrectant, & non vulnerantur; ita conscientia surda quid divinæ leges jubeant, non ignorat, sed nosse dissimulat; atque ad frugem si subinde sese recipit, mox in sylvam antiquam redit. Ideò Christus tam seriò à noxis liberum commonuit: Ecce sanus factus es, jam noli peccare, ne deterius tibi aliquid contingat. <sup>a</sup> Nam qui

qui è sordibus toties emergit, voluntariâ tamen infaniâ in easdem semper recidit, hunc Deus demum deserit. Inde ruina & labyrinthus, præcipitium, exitium.

Hæc cauteriatæ, dormitantis, surdæ conscientiæ sunt mala, nî præcaueantur maturè. Militemus, obsecro, bonam militiam, habentes fidem & bonam conscientiam.

## CAPUT VIII.

*Conscientia tam bona quam mala,  
potentissima.*

**A**Rgus Pastor centoculus, ut prisci fingebant, unam solùm pecudem accepit custodiendam, etsi centeno lumine in eam curam posset incumbere. In Colchide insulâ, ut ferebatur, ovem auream dies noctesque pervigil draco servabat. Anima hominis simplex, innocens, sincera ovi aureæ non immeritò confertur, cui Diabolus perdius & pernox insidiatur capitalibus technis. Orbis terrarum universus etsi voluptatum omnium refertus, Diabo-

lo sparsivæ instar pilæ est, quâ expul-  
sim & datatim luditur. Hanc ille pi-  
lam curat, sed curat ovem auream,  
curat animam, hæc illi præda est gra-  
tissima. Incredibile prorsus est, quam  
implacabili esurie Apostata hic An-  
gelus in animas feratur. Fames rapi-  
endarum animarum insaturabilis, &  
quod dixit Habacuc, Cibus ejus ele-  
ctus. <sup>a</sup> Hoc sapientissimus Deus ab  
omni æternitatis principio futurum  
prævidit, ideò huic ovi aureæ, suum  
velut centoculum custodem posuit  
qui interdiu noctūque vigilaret, & in  
commissam sibi ovem curam om-  
nem defigeret.

Fidus hic custos tot oculis orna-  
tus, est hominis Conscientia, quæ si  
suo jure sinatur agere, & facere offi-  
cium, sollicitè ac vigilanter attendit,  
ne quid domestica Respublica detri-  
menti capiat, & ubi quid periculi no-  
tat, mox monet, ne ovis aurea Orci-  
niano prædoni in prædam cedat.  
Diximus, quid Bona sit Conscientia  
quid Mala, quid Erronea, quid Du-  
bia, quid scrupulosa, quid Cautiona-

ta.

<sup>a</sup> Habac. cap. 1. vers 16.





ta. Ordo nunc poscit ut Conscientiæ vires & actiones explicemus.

## SCRIPTURA.

*Habentes mysterium fidei, in Conscientia pura. 1. Tim. 3. v. 9.*

## PICTURA.

*Gallus gallinaceus Tubam insistit: Duo sunt hæc Horologia; Militiæ & Pacis.*

**G**ermani Fratres Josephi, Ægyptii proregis, genus hominum indoctum, agreste, impolitum, rude, incultum, nihilominus in eis singulariter eluxit quantarum esset vitium conscientia. Res eis in Ægypto malè cessit, acriter examinati, rigide excussi, exploratores proclamati, triduū in vinculis attenti. At illi collatis capitibus & fermunculis: Meritò, inquiunt hæc patimur, quia peccavimus in Fratrem nostrum, videntes angustias animæ illius, dum deprecaretur nos, & non audivimus. Idcirco venit super nos ista tribulatio. Ad quæ subjungens Ruben: Nunquid non

non dixi vobis, inquit, nolite peccare in puerum; & non audistis me. En sanguis ejus exquiritur. *a*

Quis vobis, ô viri, hoc dixit? quid Conscientia? Quis vestræ afflictionis & sanguinis exquisiti causam vobis exposuit? an non Conscientia? Quis crimen tam vetustum, & pænè jam oblitteratum in memoriam revocavit? Certè Conscientia. Vingt-tres anni abierant, cùm illa in Fratrem perfidia est designata, nihilominus post tot annos in hominibus imperitis ac rusticis etiamnum monet Conscientia, & officio suo fungitur. Reverâ hic creditor tenacissimæ est memoriæ, debitorum non obliviscitur. Verissimè dixit Tullius: Magna vis Conscientiæ *b* Magna vis.

Porrò Conscientia tria potissimum observat tempora quibus potentiam ac vires suas exercet. Primum est *Futurum*; siquidem Conscientia non parcit operæ, nec quidquam prætermittit, omnibusque viribus elaborat, ut hominem à peccato committendo abducatur. Nimirum noxas cavere summè



summè studet. Ecquis enim illas conscientiae voces non subinde audit? Omitte hoc, obsecro, cave hoc, vide ne istud feceris, pedem retrahere, latet anguis in herbâ; manum abstinere, latet ignis sub dolofo cinere; brevis est voluptas, longa poenitentia: momentaneum quot delectat, æternum quod cruciat, æternum. Cogita ergo quanta malorum series è peccato unico nascatur: cogita & cave malum.

Alterum tempus quod observat conscientia, est *Præsens*. Nam si monitum reprimere, & abstinere noxam non possit, saltem vellicat hominem dum peccat, & melli aliquid admiscet fellis, & absynthium attemperat Apiano. & ut quem penitus ab improbitate arcere non potest, eum saltem citius reducat ad poenitentiam. Christus modis omnibus egit ne sui Discipuli in Olivario monte dormirent, damnum è somno secuturum prædixit; jam dormientes non semel monuit: cum autem suos in excubiis continere non posset, tandem eos vi excitavit: surgite, eamus. Ita ferè  
a Muscadet Trauben. Con-

Conscientia si primo alteroque tempore nil promoveat, nec coercere possit á libidinibus abreptum, tandem vi excitat, & peccati abominanda monstrat, angit, torquet, cruciat; terrores ingerit & vociferatur: Inferi te expectant, aut ergo resipisce, aut peri.

Augustinus eleganter hac de re differens: Quomodo, inquit, magna est poena, impiorum conscientia, sic magnum gaudium piorum ipsa conscientia. Quem pungit mala conscientia, retrahit se à spe, & non sibi sperat nisi damnationem. Vt ergo speret regnum, habeat bonam conscientiam, & ut habeat bonam conscientiam, credat & operetur. *a* Credere fidei, operari charitatis est.

Illud admiratione dignum, qui tandem nos imperitissimi rerum Æstimatores peccatum nondum perpetratum extenuemus, nihili pendamus, nugas æstimemus & ludicrum. Hîc quisque sibi ipse dicit: Res factu facillima, nil est periculi; perge & au-

*a Aug. tom. 8. in ps. 53. mihi pag. 211. & in ps. 31. mihi pag. 76.*

& aude. Sed cælum perdo? Tu perge. Sed ad orcum propero? Tu perge; facilis venia his culpis. Ita cæci ruimus, quò nostrę nos trahunt libidines

At ubi peccatum est perpetratum, jam crevit in immensum suoque pondere jacentem pænè ad desperationem trahit. Ita primi parentes nostri dixerint: De pomo agitur; quantillæ hoc culpæ sit, pomum libare? Vbi verò pomum admorsum est, Aperti sunt oculi amborum, & videre miseri, quam malè sint vestiti. Ideò in vestem rapuerunt folia, & latebris se occultarunt. Ita qui peccat, ante commissum peccatum, amentia & libidine cæcus, cæcissimus est; scelere jam suscepto aperiuntur oculi, & peccatum quod antea nullum videbatur, incipit esse maximum. In Romanis olim spectaculis pegmata viscebantur, seu ambulantes machinæ, mobiles montes, gradientes domus, quæ initio plerumque humiles & depressæ, subitò in admirandam excreverunt altitudinem: Ita peccata initio visa exilia & veniæ facillimæ, ubi in opus prodierunt, jam gigantes sunt

sunt terribiles ad animi abjectionem impellentes. Quæ metamorphosis advertit Ethnicum, ut scriberet, perfecto demum scelere, magnitudo ejus intelligitur. *a*

Quemadmodum ingentia plerumque flumina exili oriuntur scaturigine, & angusto fluunt alveo, quem anus transfiliat; paulatim inde ita dilatantur, ut qui principio fluebat rivulus, post aliquot decursa spatia, fiat fluvius. Ita Danubius modicâ origine nascitur. *b* Sed eundo sic crescit, ut brevi navigiorum patiens fiat: Ita prorsus antequam impuritas & flagitium suscipiatur, appellari solet humana fragilitas, facilis lapsus, malignior indulgentia, negligentia solutior: ita improba cupiditas, flagitiosa obscœnitas, impura voluptas, initio tenuis scaturigo est: at ubi cogitata prodierunt in opus, ubi cupidines transierunt in facta, jam rapacissimum flumen minantur. & hominem subinde non anxium tantum, sed desperabundum reddunt.

Iscariotes proditor videbatur sibi  
sum-

summum facinus non difficulter posse concoquere. Ita rem animo expedito aggressus, faciles sibi conficiens rationes: pecunia dixerit, quam à summis sacerdotibus sum accepturus mihi proderit; magistro meo non multum oberit hæc delatio: ille faciles extricandi se vias inveniet. Cæpimus; dimidium facti est; pergamus. Videns autem quod damnatus esset, poenitentia ductus retulit triginta argenteos, dicens; Peccavi, tradens sanguinem justum. <sup>a</sup> Deus bone: immanè, ingens, execrandum facinus visum est infelicissimo mercatori tam modicum, tam facile excusandum delictum: jam laqueus, præcipitium, Orcus nocentem hauriunt. E tali rivulo tam falsum profluxit mare.

*Noxa caput sequitur.* Quod vetus poëta eleganter explicat hoc metro

*Raro antecedentem scelestum,*

*Deservit pede pœna claud.*

Cor fontis palpitat nemine concutiente. Adeò Conscientia urget; stimulat, impellit, ut reus sæpillumè non meliorem sui proditorem inve-

I

niat

niat seipso : seipsum Judas accusat, damnat, enecat. Dignus carnifex tam scelesto capite.

Memoria est Norimbergæ duos è Mercurii profapiâ laverniones ante urbem in prato (*Alberwis* vocant) confedisse. Forte fortunâ duo lictores illuc tendebant, nil minus cogitantes, quam fures capere. At duo illi Zonarii sectores, quam primum geminos venatores vel eminus observarunt, malâ moniti conscientiâ utique sese tanquam patibulum jam dudum meritos quæri existimârunt; unde de fuga sollicitè cogitare, & in aquas, cum aliud effugii non esset, sese præcipitare : argumento malitiæ plus quam certo. Fugit enim impius nemine insequente. <sup>a</sup>Hoc factò, quoniam seriam facinoris suspicionem, importabat, miseri in vincula rapti & non multo post in Crucem acti sunt. ut vel hinc liqueret verum esse, quod germani dicunt maturum patibulo furem cursu lictor etiam claudus assequitur. Impedita scelere conscientia facilè tremuit, inhorrescit,

rescit, fugit. Et ut optime dixit Tertullianus: Nullum maleficium sine formidine supplicii, quia nec sine conscientia sui. Cui astipulatur Polybius: nullus testis, inquit, tam formidabilis, neque iude x tam gravis quam conscientia, quæ menti cuiusque infidet & inhabitat. Quare merito Annæus Seneca; exclamat; O te miserum, si contemnis hunc testem. *b*

Pacatus in panegyri Theodosianâ memorat, in eo bello quod contra servos Domini gesserunt, pro ludium prælio factum flagellis ante aciem concussis. Perinde si fecialis proclamaret: Hæc arma vos nebulones ad officium faciendum adigent; ipsa vos conscientia & innatus flagellorum metus ad pristinam servitutem reducet.

Tanta nimirum vis est conscientia, sicuti cum infanti reo monstrantur virgæ, mox tremor, pallor, aut rubor palpitantis animi notas loquuntur. Quod Isidorus eruditè illustrans Omnia, inquit, fugere poterit homo

1 2

præ-

a Ein zeltigen Dieb ertlaufft ein hinfender Schörg. *b* Seneca in epist. 43.

præter cor suum. Et quamvis humana judicia subterfugiat omnis, qui malè agit, judicium tamen conscientiae suae effugere non potest. Nam et si alios celat, quod egit, seipsum tamen celare non potest, qui plenè novit malum esse, quod gessit. Deinde illud psalmi explicans: Abyssus, inquit, abyssum invocat in voce cataractarum. *a* Abyssus conscientiae, abyssum gehennæ. Sua hominem conscientia cruciat, accusat, judicat, sententiam pronuntiat, capite damnat, quid mirum si damnatio eum ad se rapiat. *b*

Maxima vis conscientiae in utramque partem. Si ea bona & erecta sit, nulla humana judicia metuit, neminem nec hominum nec angelorum extimescit, sed nec mortem, nec inferos, nec omnes Diabolos pavet, Deum solum eatenus duntaxat timet, ne offendat. Quamdiu propitium ac benevolum sibi arbitratur Deum, tandiu ei salva sunt omnia.

Quâ in re liber de imitatione Christi animositatem suggerit & monet:

Humana-



Humanum non metuas iudicium,  
 ubi te conscientia pium reddit & in-  
 contem. *a* Quo usus clypeo Augusti-  
 nus, Secundinum Manichæum im-  
 pugnans: senti, ait, de Augustino  
 quicquid libet, sola me conscientia  
 non accuset. Ita quilibet erectioris  
 conscientia homo de seipso pro se-  
 ipso dixerit: Vos alii de me loquimi-  
 ni, judicate, spargite, fabulamini,  
 blaterate, criminamini, quicquid lu-  
 bet, tenacem & fastuosum, menda-  
 cem & litigiosum dicite, nomen me-  
 um dentibus convellite, labores me-  
 os floccifacite, sola me conscientia  
 non accuset, salva mihi omnia; nec  
 os vestrum maledicum, nec morda-  
 ces dentes vestros quidquam curo;  
 una me conscientia tutetur, sat tutus  
 ero; hic murus aeneus esto adver-  
 sus omnes criminantium phalangas.

At verò contra, si conscientia sit  
 mala; vel cadente foliolo, vel prore-  
 pente musculo, vel latrante catello,  
 vel sibilante myagro. *b* vel musti-  
 tante homunculo, terrefiet malè sibi

I 3

con-

*a Thom. de Kemp. l. 3. c. 36. b Serpens  
 innoxius circa domos versans. Nicandro.*

consciis. Prædixit olim Deus: Ter-  
rebit eos sonitus folii volantis. *a* Dif-  
ficile, vultu facinus dissimulare; oculi  
pavidi & inconstans in ore color, &  
lingua titubans, aliæque animi notæ  
in facie relucentes, scelus eloquun-  
tur. Reperias homines, qui neminem  
rectis oculis, conscientia id agente,  
audeant intueri. Nam nimis quam  
verum est, quod poëta cecinit.

*Heu? quàm difficile est, crimen non  
prodere vultu?*

Cum Tullio sentimus, Eam esse  
vim conscientia, ut nihil timeant,  
qui nihil commiserint, & poenam  
semper ante oculos versari putent  
qui peccarint. *b* Sed Tullio melior  
multò Augustinus: Quod alienum  
est, inquit, ab opere, alienum est à  
conscientia; quod alienum est à con-  
scientia, alienum videtur & à scien-  
tia. *c*

Igitur cum beatissimo Paulo pro-  
fe quisque dicat: In hoc & ego ipse  
studeo sine offendiculo conscientia-  
am habere bonam, ad Deum & ad  
ho-

*a* Levit. c. 26. v. 36. *b* Cic. pro Milone  
erat med. *c* Aug. in ps. 34. mihi pag. 104.

homines semper. 4 Et miserrimum credat illum, quicumque spernit hunc testem suum; testem qui coram orbis iudice loquetur; qui auctoritatis plus quam potentis, & nullis ambagibus eludendæ! nullis rationibus elidendæ!

## CAPUT IX.

*Conscientia inextinguibilis.*

**L**Aurus, ut ajunt, fulmine non afflatur, veluti amica Cælo arbor. Hinc Imperator Caligula qui nunquam non scelestæ fuit conscientia, tonitrua, tempestates, fulgura, fulmina supra modum extimuit. Tranquillus testis illaudatæ hujus timiditatis: Ad minima, inquit, tonitrua caput obvoluebat lauro. Laurus inprobæ conscientia videbatur pro clypeo esse. Vnde etiam apud stobæum Bias: Sicut laurus, inquit; non timet fulmen, ita bona conscientia nulla pallescit culpâ: non meticulosa, terroris expers, colorem non mutat, animosa est. Bona conscientia

I 4

lau-

laureum fertum est adversus fulmina omnia, undecunque advolantia.

*Integer vitæ scelerisque purus.*

*Non eget Mauri jaculis nec arcu. a*

Potentissima est Conscientia, seu bona sit, seu mala. Bona quidem neminem mortalium timet, Deum ut summum bonum diligit, peccatum ut summum malum metuit, odit, fugit: Mala timet omnia, vel ipsius umbræ umbram; nec unquam cessat suo homini occinere: Meritò hæc patearis, quia peccasti in Deum tuum. Difficillimum opprimere conscientiam, penitus illam extinguere, nemo potest: Quod hoc capite declarabimus.

a *Hor. l. 1. od. 22.*

## SCRIPTURA.

*Rursus tolle volumen aliud, & scribe in eo omnes sermones priores*  
*Jerem. 36.*

PICtu-

## P I C T U R A.

*Phœnix in Flammis.*

**C**UM Hebræus Rex Joachim sub hiemis auspiciis, Novembri mense, in suo conclavi consedisset, misit aulicum famulitium, ut è templo volumen legis ad se deferret. Delatum est, & lectum audiente Rege & universis principibus, qui stabant circa regem, Rex a. ut sacra pagina testatur, sedebat in domo hiemali, & posita erat arula coram eo plena prunis. Cumque legisset Iudi tres pagellas vel quatuor, rex illud scidit scalpello scribæ, & projecit in ignem, qui erat super arulam, donec consumeretur, omne volumen igni. Ex omni numero principum tres solum conabantur inhibere regem, ne sacros libros flammis donaret. Sed nihil effectum. Rex insuper Baruch scribam & Hieremiam prophetam comprehendi & in vincula dari iussit. Sed frustra. Nam Deus Hieremiæ vati mox imperans: Rursum, inquit tolle volumen aliud & scribe in eo omnes sermones

I s                      mones

mones priores. *a* Hos Baruch ex ore Hieremiæ, Hieremias ex ore dictantis Dei accepit. His excidium Solymanæum præcipuè prædicebatur; nec aboleri poterant prædictiones istæ. Quod Deus scribit aut dictat, penitus comburi non sinit, novos scribit, alios dictat, post aliquot etiam centurias annorum. Ita conscientia admonitiones, etsi sæpius velut comburantur, mox tamen aliæ iterumque aliæ iis commonitiones succedunt, *scribit conscientia omnes Sermones priores*, quia Deus hos dictat. Conscientia non potest extinguï. De hac rectissimè Tertullianus: potest obumbrari, quia non est Deus, extinguï non potest, quia à Deo est. Tot improbi affectus possunt quidem conscientia velut speculo velum præpandere, illam tollere non possunt, & præpansum hoc velû suo tempore amovetur.

Justus Lipsius Conscientiam eruditè vocat *Characterem indelebilem*. *b* Afferculus in aquâ millies submersus usque tamen ad summum redit & supernatat. Premi potest, conscientia & mergi,

& mergi, non opprimi potest non submergi. Herodes quotquot erant, omnes nefarii homines, & variis sceleribus infames, conscientiam tamen abolere non potuerunt. Herodes Aſcalonita tyrannorum coryphæus, notæ crudelitatis Rex, qui quatuordecim millia. *a* infantum, velut unicâ sicâ per unicum jugulum immerſâ trucidavit. Herodes Antipas Joannem Baptistam aulicum concionatorem suum obtruncavit gladio, Christum. Pontio transmissum morionis veste induit, & ad Pontium remisit. Herodes Agrippa Jacobum Apostolum occidit, & ad populum superbissimè verba fecit. Hi omnes conscientiam miserè preſſerunt, sed opprimere nequiverunt. Combusserunt sermones Domini, sed scripsit Dominus omnes sermones priores. Herodes Aſcalonita pollicetur se venturum ad cunas novi Regis; Quis ei veniendum dixit? Conscientia. Herodes Antipas Joannem Baptistam magni æstimabat, & metuebat eum, sciens eum virum justum & sanctum,

& audito eo multa faciebat, & cetero-  
 qui omiffurus. Cur iftud obfecro?  
 Confcientia hoc ei perfualit. Hero-  
 des Agrippa non otiofus Rex fuit,  
 pro tribunali fedit, ubi non folùm  
 judicem fed & concionatorem egit:  
 Quis illum hoc docuit? Confcien-  
 tia. Confcientiæ liber in ignem ab-  
 jicitur, fed non omnino comburitur.  
 Aliquando quidem in hominibus ne-  
 quiffimis combuftus creditur, fed à  
 fuo ipfe funere revivifcit, & fub vitæ  
 finem panditur, quando confcienia  
 fub mortis tempus evigilans fcribit  
 omnes fermones priores.

Hîc ego fpeculum ponam iis om-  
 nibus qui confcientiam premunt, &  
 illam ad turpe filentium adigunt: fi-  
 ve hi Aulæ feu Bellonæ five huma-  
 næ gratiæ fint feâtores: feipfos in  
 eo fpeculo, quoties libuerit, contem-  
 plari poterunt.

Ante annos quadraginta vir ma-  
 gni nominis, uni principum à cubicu-  
 lis, in aulâ non unâ tam charus quam  
 notus, homo ad mundi leges exactè  
 factus, natus, ftaturâ infigni, formâ  
 gravi



gravi & mascula, moribus comis, & ad amissim aulicus: nec linguarum rudis; Musicâ Orpheus, & inde nemini non admirandus, pecuniæ & fortunarum si eas regere scisset, non modicus; gratiâ dominorum, quæ divitiis omnibus præfertur, singulariter abundans. Nam etsi clavem auream à principe suo habuerit, tamen non nisi ter quaterve in anno ad obsequium se stitit, principali gratiâ nil inde imminutâ. Et quod mireris, ad plurimum dominorum ingenium sese attemperare calluit. & quidem plus æquo. Nam in unius domini gratiam miserè afflixit suam conscientiam, cum hominem, domino exosum, Venetiis intra domesticos canales per jocum suffocari curavit. Dominus tam secundum necis eventum gratulatus, litteras misit quibus pæne gratias egit, quod avem nimis garrulam filere docuisset, suam porro gratiam ob patratum facinus in ævum omne obstrinxit. Sed innocenti sanguini vindicta non defuit manifestaria. Nam etsi perillustis ille dominus litteras suas comburi voluerit, vir ta-

men

men ille aulicus, non ignarus dominicam gratiam, ut odoratum vinum, & amorem impurum nocte unâ evanescere, *a* litteras sibi missas cautè servavit, ut si Dominus languefcente olim benevolentia desineret esse graciosus, & Famuli favorem ejiceret, ipse tabulis signatis agere, & se ipsum in gratiam posset reponere (Post aulici mortem inventæ litteræ tragœdias horribiles excitarunt.) Porro conscientia palatini hujus scèdè fauciata monendi spacium rarissimè habuit, quia Dominus ipsius præne quotidie bacchanalia vixit. Contigit nonnunquam ut probè appotus domum rediens, organum accesserit, fides tentarit, psalmum quinquagesimum (Miserere) numeris concinuerit, oculis interim liberaliter lacrimantibus, nemini nisi cognatâ femina præsentē, nec leviter mirante hanc musices & lachrimarum mixturam. Denique patuit quid nocturnus hic oculorum nimbus sibi voluerit.

Apud

*a Germanorum proverbium, Herren Gunst  
Grawen Lieb / Regelenwein / riechen über  
Nacht auß.*

Apud hos tales, cum sobrii sunt, Conscientia vix unquam loquendi copiam petit, quin ei respondeatur: Tace tu, & quiesce, nil istud ad te; tace, & meam mihi tranquillitatem ne turba. Vbi verò ejuscemodi homines plus paullo adbiberunt, vino jam semigraves, præsertim si soli sint, hinc evigilans confurgit Conscientia, & clienti suo acerbis ingerit voces: Nunc ego te deprehendo improbe: velis, nolis, audire me debes. Hæc, & hæc, & hæc etiam fecisti: diu dissimulavi, diu tacui. Quid adhæc habes dicere scelestum caput, & jam pridem Orco debitum? Hinc gemitus & suspiria, hinc etiam quandoque lachrimæ. Scintilla Pietatis hinc gliscit, sed temulentæ.

Reverâ tales Conscientia per cuniculos aggreditur, sed pessimum illud, quod domesticus hic concionator ebrium habet auditorem, qui postridie dictorum non amplius sit memor.

Ita ille, quem dixi, Palatinus, nocte quandoque mediâ conscientiam audiit loquentem. Secutus dein somnus

nus in plurimam lucem ad horam diei nonam aut decimam. Iterum convivia & hilaritas pristina, iterum ludus jocique omnia nocturni concionatoris monita extinxerunt. Hoc autem vitæ genus diu durabile non est. Appropinquant anni, de quibus dicitur: Non mihi placent. *a* Sentitur tandem, sed plerumque nimium serò, quid noxæ tulerit, monitricem Conscientiam non audisse. Venit ergo Palatinus ille ad lectum, & unâ ad letum: morbo gravi & mortifero affectus est. Reviserunt ad ægrum Veteres Sodales Combibones, venerunt & viri religiosi: utrique pergrati, si una caliculos sorbere, si quid novum rumoris ex Hispaniis, è Belgio, è Galliis narrare, si subinde etiam fritillum & abacum lusorium movere voluissent. Narratiunculæ de cælo, de morte, de inferis ab hoc ægro proscriptæ: hæc enim ut mæsta, constanter jussit facessere à colloquiis donec ad extrema devolutus hic eger, nulla pœnitentis animi argumenta relinquens, ipsam imaginem Christi crucifixi

cifixi sputo petiit, atque ita obiit. Funus cum duceretur teterrimum in templo foetorem sparsit, utinam non indicem ejus odoris, quem in vita flagitiis suis Deo & Cælitibus præbuisset ! sic vivitur, sic itur, sic interitur. Quid illi Clavis aurea ad angustam Cæli portam conduxerit, Deus nō-rit : nobis jus gladii non est in defunctos ; ideo sententiam continemus. Est judex, qui Cælo & orco homines addicat : hæc arcana nobis scrutanda non sunt. Potuit enim ille Palatinus æger ob vim dolorum imaginem Christi conspuisse ; potuit cadaver naturali causa odorem tam gravem halasse. &c. At nolim saltem ego cum talibus vivere, multo minus mori. Hic solum, quod oculi & aures præsentium testabantur, narravi.

Scis mi Lector, quem hîc depinxerim ? dicam tibi, sed in aurem quem mihi minus notum velim fuisse : tibi autem in documentum altissime animo tuo impressum, ut memineris, domesticum Concionatorem tuum, Conscientiam non audire, aut contemnere periculosum, nimisque va-

K

num,

num. Conscientia enim, etsi centies iterumque centies non audiatur, abdicetur, repellatur, usque tamen redit, queritur, monet, clamat, hortatur, dehortatur, increpat. Bernardus hanc Conscientiæ pertinacem assiduitatem observans: Peccata mea, inquit, celare non possum, quoniam quocunque vado, conscientia mea mecum est. secum portans, quidquid in ea posui, siue bonum siue malum. Servat vivo, restituet defuncto depositum, quod servandum accepit. Si malè facio, adest illa: si autem bene facere videor, & inde extollor, adest illa. Adest vivo, sequitur mortuum, ubique mihi gloria vel confusio est inseparabilis pro qualitate depositi. Sic sic in domo propriâ, & propriâ familiâ habeo accusatores, testes, iudices & tortores. Accusat me Conscientia; testis est Memoria; Ratio iudex; voluptas carcer; timor tortor; oblectamentum tormentum. Quot enim fuerint oblectamenta mala, tot erunt tormenta dira. Nam inde punimur unde delectamur. a Quid verius

rius & pulchrius, quid enim etiam dulcius hoc Claræ-vallensi melle?

Hæc omnia Chrysoſtomus ſacrâ ſacundiâ confirmans: unicuique noſtrûm, inquit, inſitum indepravabile iudicium conſcientiæ, quod poſſimum omnem nobis deſenſionem tollit, quòd non per ignorantiam in peccata incidimus, ſed per animæ deſidiam, & virtutis negligentiam. *a* Oratore hoc antiquior alius è Latio, ducentis annis, ita finit dialogum ſuum, OCTAVIUS inſcriptum. Conſcientiam ſuam non decipit, qui fallit alienam. Apud nos & cogitare, peccare eſt. Vos conſcios timetis, nos adeò ſcientiam ſolam, ſine qua eſſe non poſſumus. Ita Minucius Felix.

Conſcientia non raró facit quod plebeja femina, quæ maritum violentum & in cauponis potitantem ſubinde domum reducere conatur, ſed plerumque fruſtra. Nam ebrius decoctor has uxori voces reddere ſolet. Quid tu hîc rerum agis, femina?

K 2

na?

*a Chryſ.tomo. I. in cap. I. Genef. hom. 5. mihi pag. 23.*

na? quid mihi usque & usque & usque odiosa & molesta es? Mox abi ad colum, lanam carpe, duc fila. Hinc te actutum ejice. Aut ego. Illa quia sapit, tacet, & abit. Vbi domum vir redit, aut luce posterâ, cum crapulam maritus edormiit, iras illa resumit, pridianum potatorem exagitat, malè accipit, convexat, eum eò redigit, ut quò se vortat, nesciat. Coram aliis hæc concio vires nullas habuisset, at domi, audacter jure suo uxor utitur: Ita conscientia inter epulas & symposia, inter affectuum varios & rixosos strepitus se se inhumanè, durius, contumeliosè dimitti patitur: at ubi quis in seipsum descendit, & velut domum redit, tunc provolat conscientia, & concionari incipit, tanquam acerba mulier marito.

Hac de ebrioso homine & ejus uxore, similitudine Augustinus in Psal. 33. usus: Beati, ait, qui gaudent quando intrant ad cor suum, & nihil mali ibi inveniunt. *a* Qui garrulas, stomachantes, litigiosas uxores habent,



bent, in foro malunt quam in domo  
 versari. Cùm meridies ad prandium  
 vocat, esuriunt quidem; sed redire  
 domum est grande tormentum; mox  
 enim uxor tonare, stomachari, ful-  
 minare, debacchari incipit. Hic miser  
 maritus utroque versum occisissimus  
 est. Domum redit? concionem au-  
 diet amarissimam. Non redit? La-  
 trabit stomachus, nec enim ad fo-  
 rum deferetur cibus. Quantò sunt  
 miseres, inquit Augustinus, qui ad  
 conscientiam suam redire nolunt, ne  
 ibi litibus peccatorum evertantur. Er-  
 go ut possis libens redire ad cor tu-  
 um, munda illud. <sup>a</sup> Suam quisque do-  
 mum, suas certè latebras habet, qui  
 à laboribus & negotiis fessus se re-  
 cipiat ac respiret. Si & illic inquires  
 & rixæ sint, ubi quiescet? saltem er-  
 go in cubili cordis tui pax sit, ut tol-  
 las te ad interiora conscientiae tuæ.  
 Ajunt proverbio, tecta perstillantia,  
 mulier litigiosa, ligna fædum fuman-  
 tia exigunt domo. <sup>b</sup> Tu vide, qui-  
 escas intus in cubili tuo, non ejiciat

K 3

te

<sup>a</sup> *Ideò ibid in ps. 35. ante ued. mihi pag.*  
 103. <sup>b</sup> *Prov. 19. v. 13. & 27. v. 15.*

te inde fumus malæ conscientiæ. Ad tuam ipse conscientiam sis attentissimus: os sibi non semper obligari sinet; subito profiliet velut acerbissimioris mulier, & clamabit & vociferabitur, & accusabit. Attende tibi & conscientiæ, ne tecta tua perstilent, ne pluviam ac nives sese infundant, ne omnigenæ libidinis cogitationes penetrent. Attende tibi ne fumus graviorum noxarum tuâ te domo pellat. Summa summarum hæc erit, ab Augustino tradita: Vt possis libens redire ad cor tuum, munda illud.

## CAPUT X.

*Conscientiæ vultus in morte hominis.*

THRACUM & SCYTHARUM morem in congerendis calculis memorat Philarchus. In Thraciâ urnulas, in Scythiâ pharetras ponebant, in eas quotidie albos vel nigros lapillos injiciebant. Si dies fuisset prosper & lætus, lapillus injiciebatur candidus; si tristis & infaustus, calculus ater & piccus in urnulam vel pharetram

tran immittebatur. Vbi quis dñem suum obiisset, prolata ejus urnula vel pharetra, numerati calculi tam nigri quam albi; si isti numero superassent felix ac beatus judicabatur mortuus; si nigrorum fuissent plures, miser & infelix censebatur. Hoc ritu monet Aulus Persius:

*Hunc Macrine Diem numera meli-  
ore lapillo, &c.*

*Quæque sequenda forent, & quæ  
vitanda vicissim.*

*Illâ prius cretâ, mox hæc carbone  
notasti.*

Antigraphus noster, Conscientia nostra, per omnem hominis vitam diligentissimè hunc morem servat: quicquid laudabile ac honestum, cretâ signat; quod malum & culpabile, carbone notat. Quid porrò calculorum in vitâ congestum sit, in morte potissimum patebit. Distinctè ac clare cernet moribundus, quid carbone, quid cretâ signatum sit. Hic etiam apparebit, quam præstantis sit memoriæ antigraphus noster, qui ante sexaginta, septuaginta & plures an-

nos patrata scelera habet in memoria, & suum moribundo proponit iudicium. Ita hoc quidem capite de statu Conscientiæ in morte agemus.

## S C R I P T U R A.

*Hæc est scriptura, quæ digesta est.  
Dan. 5. v. 25.*

## P I C T U R A.

*Liber apertus in mensa, super librum  
clausum, juxta cereus ardens, è regio-  
ne ventus in cereum pug-  
nans.*

**N**Unquam adulari solet Conscientia, omnium tamen minimè in morte. Sub vitæ finem non audacissima solum sed & potentissima est; tunc certe, si unquam, loquendi libertatem obtinet. Cùm homo incipit mori, illa incipit loqui.

Climacus rem etiam oculis testatissimam commemorans. Stephanus, inquit, in hoc cænobio egit; sed quia seductum vitæ genus & solitudinem amavit, aliò se contulit. Et primò quidem

quidem tuguriolum suum ad radices montis Horebi posuit : Inde migravit in locum Anachoretarum, cui nomen *Fides*. Locus hic inaccessus & ab omnibus humanis solatiis desertissimus est. Aliquot annos in hoc secessu summâ vitæ severitate consumpsit : sub vitæ finem ad primam casam rediit, ubi alii duo religiosi viri è palæstina habitarunt. Hic ille senio & jejuniis confectus valetudine cœpit corripui extremâ. Vno ante obitum die, subitò velut attonitus & fulminatus obstupuit, oculos insolitum diduxit pavideque circumspexit, qui adessent, & rationes poscerent ? Denique cunctis audientibus, velut computationem postulatus suis exactoribus respondit. Ita est, reverâ; sed hanc noxam tot annorum jejuniis abolere studui. Paulò post addidit : Non certè, istud non feci, Dein iterum sic verè; sed ministravi, sed fleui, sed incommoda multa toleravi. Post breve temporis spatium : Ita sane, ait, verum objicitis, & adhæc, quod dicam, non habeo, sed Dei misericordia est infinita. Erat

perfecto ait Climacus, spectaculum  
horribile ac terrificum. *a*

Ah, mi Deus! homo religiosus an-  
norum quadraginta monachus, soli-  
tarius, jejuniis exhaustus, dono la-  
chrimarum præditus, precandi stu-  
dio assiduus, sed & ceteris virtutibus  
ornatus, sanctimoniâ clarus, qui Leo-  
pardum è sua manu aluit, tam seve-  
rè rationes poscitur? sic obiit, ut  
quis acceptæ rationis exitus, quæ ju-  
dicis sententia, quale habitaculum  
migraturo animo destinatum fuerit,  
penitus incertum!

Si totâ priori vitâ conniveat, dor-  
mitet, aut filere cogatur conscientia,  
sub Æternitatis aditum, hoc est, sub  
mortis tempus loquitur, testatur,  
clamat, tonat, fulminat. Quàm verè  
concinit mortualis Lessus.

*Lecticam premis, ingemisque pressus,  
Angit spiritus undique, angiturque. b*

Estheris res gestæ memorant de As-  
suero Rege: Noctem illam duxit rex  
insom-

*a Climac. gradu 7. mihi pag. 121. b Du  
legst im Bett / vnd seuffzhest stett / das Ge-  
wissen thut dich brennen.*

insomnem , jussitque sibi afferri historias & annales priorum temporum *a*. Cùm quis adversâ , maximè cum letali premitur invaletudine , tunc noctes sæpe pervigilat insomnes , horas & quadrantes horarum numerat , urgent dolores , exercet fittis , mæror fatigat. Nox talis hebdomas aut annus videtur. Hîc temporum , totius scilicet vitæ historia profertur , historia sanè prolixa & intricata , cùm quis omnia vitæ cogitata , dicta , facta relegit. Biennii aut triennii noxas omnes , aut quid à sexennio aut septennio quis dolendum egisset , exponere , historia prorsus longa fuerit ; quanto longior erit illa & impeditior , quæ ab annis quadraginta , quinquaginta , sexaginta & pluribus est repetenda. Antigrapheus noster , nostra conscientia hîc agit historicum. Scriptor iste astutiis , blandimentis , & fallaciis circumveniri se non sinit. Liberrimus est , & veritatis amantissimus. Cuivis in os exprobrare audet : En , talis , & tantus es nequam , quid sanctum

K 6

teja-

te jactas? vitæ tuæ historiam inspice, & deformitatem tuam agnosces. Hic vel it nolit moribundus, legere debet historiam, quam ipse condidit.

Hilarion Tabathensis, in eremo annis septuaginta Deo serviit vitæ sanctimoniâ & austeritate maximâ; tot ægros sanavit, tot obsessos liberavit, tot patravit miracula, verè Thaumaturgus. Nihilominus cum jam annum ageret octogesimum, & in ultimis esset, hanc vitæ historiam legit, & adeò expavit, ut animus tot virtutibus insignis videretur horrere ac refugere mortem & migrare nolle. Modicus calor, ait Hieronymus, a tepebat in corpore, nec præter sensum quidquam vivi hominis supererat, tamen apertis oculis loquebatur: Septuaginta prope annis serviisti Christo, & mortem times? In hæc verba exhalavit animam. Mi Deus amantissime, quâ fiduciâ moriatur ille, cui Conscientia objicit: Quadraginta annis serviisti mundo, mortem cogitasti rarò, & jam præmium speras in cælo? a quam verissimum est illud



Illud Senecæ: Venientem mortem nemo hilaris excipit, nisi qui ad illam se diu composuerit. Mi Christiane, quid respondebis, obsecro, Conscientiæ tuæ, si ea tibi liberè objectarit? Tu Deum nunquam magno æstimabas, tu Deum semper rebus omnibus posteriorem ponebas: Tu ipse jam ex necessariâ consecutione simplicem conclusionem confice. Reverâ ex propositis efficitur, ut & te Deus non magno æstimet, ut & te rebus omnibus posteriorem ponat. Quid ad hunc Conscientiæ syllogismum habes respondere? Hîc forsitan dices, sed nimium serò: Quid ergo dicam, quid faciam, quò ergo fugiam? Ita fugias, ajebant prisci, sed vide ne præter casam. *a* Ah quoties huc illuc volitamus & oberramus licentiùs, cùm verò conscientia mone-re incipit & reprehendere, aures occludimus, & à molestâ concionatrice nos avellimus atque proripimus, vitiorum dulcedinem cupidissimè sectantes. Tandem hospes est domi,  
cretâ

*a* Lauff hin wo du wilt/den Wûrth wirstu  
allzeit daheim finden..

cretâ rationes conficit, exigitque symbolas: Tantum & tantum debes. Hinc moribundorum aliqui, accusante conscientiâ seipfos prius damnant, quam vitam finiant, & decretoriam á Deo sententiam accipiant.

Notum est, quod scriptor Anglus Beda, vir eruditus juxta & sanctus, posteris memoriæ tradidit. Homo equestris Coenredi regis famulus aulicus, in morbo lethali curam conscientiæ nullam habere sustinuit. Rex ad hominem sæpius revisit, piacularum criminum dolorem suasit, de mortis insidioso aggressu monuit; æger ad hæc subridere, verbis non resistere, nec regi quidquam negare, ad omnia obsequiosum se offerre, sed tamen rem differre: Tandem sub ultimum vitæ tempus apertè dicere: Actum est; Perii. conscientia sceleribus onusta in oculis est; & hæc me damnat nondum á Deo damnatum. Sic inter lamenta in locum suum abiit, & utique suum hóspitem, vel potius judicem suum domi invenit.

In re

In re textoria si stamen *a* sit inutile, & trama seu subtemen *b* nihil valeat, quomodo bonus inde pannus fiat? juvenus hominis, instar staminis, ætas virilis & constans velut subtemen est; si verò nec juvenia nec senium virtuti studeat, in morte quid solatii erit Conscientiæ? Cum morimur, opus textile quod in vitâ fecimus, oculorum examini subjicimus. Malum textum, nulla vel mala merces: Sanus Deum vix unquam quæstisti? ægrotus, mihi crede, invenies difficillimè. Pulsantem sæpius non audiisti, pulsabis & tu, sed non audieris, æquo & pari calculo. Actiones præteritas ipsa damnabit conscientia: erit accusator, testis, judex, carnifex. Tunc regredi non licet; consistere non concessum; progredi nimis horrendum. Mature igitur cum Antigrapheo tuo depaciscere; vide ut verbis factisque cum tuâ conscientia consistas.

Quod si bonæ sit Conscientiæ moribundus, quantumvis alia omnia discrucient & torqueant, solatium  
tamen

*a* Zettel und *b* Eintrag.

tamen conscientiae malis omnibus malagma est, quod rosaceam aquam, quod vinum & unguentum pretiosissimum longe superat, atque egrum mirificè refrigerat & beat ante beatitudinem. Hoc Bernardus tam sanis, quam moribundis suaviter instillans: Bona conscientia, inquit, secura erit, cum corpus morietur, secura cum anima Deo praesentabitur, secura cum utrumque in die judicii ante tribunal terrificum justis iudicis statuetur. *a* Bona conscientia regium est diploma. *b* & commendatio illustrissima, quae nullas Diabolorum insidias metuit, quae angelorum habet comitatum. Bona conscientia praetoris summi syngraphum est, quod tutissimum praestet iter in orbem alterum, in terram sanctam Beatorum. De hoc diplomate seu syngrapho idem Bernardus: Anima, inquit, cum de corpore egredietur, nullum alium praeter conscientiae suae librum secum portare poterit, atque in illo cognoscet, quò debeat  
ire,

*a* Bern. l. de inter. domo cap. 22. *b* Patent/ Passport/ Politten.

ire, & quid debeat recipere. *a*

Atheniensis Dux Pericles, quod Plutarchus memorat, cum fati dies instaret, ingens à conscientia solatium accepit, eam potissimum ob causam, quod nullus Atheniensium à se adactus pullam vestem induerit. *b* Hoc agebat Pericles: Neminem turbavi, neminem offendi aut læsi, in angustias neminem adduxi, nec depressum ivi. Utinam ô Christiani, in mortis viciniâ pro quisque possit dicere: Sciens volens mortalium neminem perturbavi aut afflictiavi, atratus mei causâ nemo incessit; pecuniæ potius jacturam ferre malui quam concordie.

Sunt homines ingenii ferocis & turbulenti, qui unum hoc norunt artificium, vexare alios & affligere. Caveant hi; terrificum experientur judicem, severum sentient judicium. Sub mortem illos certissime anget spiritus illorum undique, angeturque. Hoc saltem Christi monitum

L

ser-

*a* Bern cap. 28. *b* Alibi in *Resis* nostris hoc narramus.

servemus: Nolite judicare, & non judicabimini: nec judiciis nostris: nec sententiis ullum feriamus; suum cuique stet pretium, parvum, magnum, quod censor posuerit cælestis. Conscientia profectò hominis illius, qui nec rigidus censor, nec temerarius iudex, nec violentus oppressor fuerit, spem habebit in novissimo. *a* & iudicem mitissimum experietur. Hoc agamus, & omnem impendamus curam conscientiae. Qualis quisque invenietur, talis judicabitur.

## C A P U T XI.

*Conscientiae vultus in funere orbis.*

**C**VM singulis annis sub studiorum instaurationem præmiis donantur insigniora ingenia, fuit inter ceteros ingeniosus juvenis, sed piger. Huic excitando aureus quidem liber est datus, sed cum hoc aculeo: Librum tibi do, sed clausum: Molestiâ te levare volui, sciebam enim te clausurum. Quemadmodum ve-  
rò

rò Adolefcens defidiofus fuos libros, ita feignis & frigidus Chriftianus fuam tractat Confcientiam : Adolefcantis libri pæne femper claufi pulveribus & fitu obducuntur: Chriftianus tepidus cum confcientiâ fuâ rarò loquitur, rariffimè illam examinat & difcutit, vix unquam penetrat & totam infpicit. Sicut officina mercibus vacua, aut mercatore abfente folet effe claufa, ita confcientia omni cultu diftituta, plerunque virtutibus eft obferata. At venient dies, quos velut jam præteritos geminivates, Daniel & Ioannes, prædixerunt, his omnino verbis: Judicium fedit, & libri aperti funt. *a* Et vidi mortuos magnos & pusillos, ftantes in confpectu throni, & libri aperti funt. *b* Tunc fanè omnium hominum confcientiæ velut libri omnium oculis expofitiffimi.

De ftatu Confcientiæ in morte, fuperiore capite dictum. Nunc ordo poſcit, ut Confcientiæ in fupremo iudicio ftatum exponamus, tum calamo tum penicillo.

L 2

S C R I -

*a Dan. c. 7. v. 26. b Ican. c. 20 apoc. v. 12.*

## SCRIPTURA.

*Libri aperti sunt. Apoc. c. 20. v. 2.*

## P I C T U R A.

*Duo grandes & explicati libri ab Iride  
circundati ; inter istos geminæ  
manus sententiam fe-  
rentes.*

**C**hristus Matthæi ore nobis vatici-  
natus : Nihil opertum est, inquit,  
quod non reveletur, neque abscon-  
ditum quod non sciatur. Quo die  
gens humana in vitam revocabitur,  
& pro se quisque apud tribunal di-  
vinum causam dicet, non solum acti-  
ones omnium, sed & cogitationes  
latentissimæ patebunt. Quæ tandem,  
inquies, hoc fieri poterit? Christus  
dixit: Nihil ultra quæramus. De  
actionibus quidem pronuntiavit il-  
lud: *Nihil opertum*. De cogitatio-  
nibus: *Nihil absconditum*. Tunc,  
*Aperientur libri*, pandentur consci-  
entiæ. Nunc magnam partem vivi-  
mus velut somniantes, Tunc frater  
noster Joseph, Christus Dominus or-  
bis



bis iudex somnia hominum vanissima explicabit. Iosephi fratres annis viginti tribus facinus suum celare poterant ; Tandem germanus illorum , prorex Ægypti : Ego , inquit , sum Ioseph frater vester , quem vendidistis in Ægyptum : Haud aliter Rex Regum : Ego sum Christus frater vester , quem flagellastis , quem spinis coronastis , quem cruci affixistis. Quod olim Davidi Nathan , hoc improborum singulis dicet Dominus : Tu fecisti in abscondito , ego autem faciam hæc in conspectu solis , & coram omni Israël. Quicquid nunc remotis arbitris altissimo silentio Conscientiæ inscribitur , tunc omnibus non solum Angelis , sed & hominibus patebit. Nihil absconditum , quod non reveletur & sciatur.

Fatali die Mundi sciatur ab omnibus quid Adam annis nongentis triginta fecerit : quid Enos nongentis quinque , quid Mathusalem nongentis sexaginta novem annis egerint ; quid Cain , quid Absolon , quid Ioab scelerum delignarint : quid Noë ,  
L 3                      quid

quid Job, quid Tobias tolerarint; quid Herodes, Tiberius, Nero, Caligula, Diocletianus, quid tyranni omnes, quid probi omnes, quid omnes omnino homines, cogitarint, dixerint, fecerint, quid Christus humanæ gentis servator agendo & patienti docuerit.

Quapropter, ô mortales peccate nunc in immensum, & peccata peccatis cumulate, celate, excusate, propugnatæ. Interim scitote, nihil operum quod non reveletur, nec absconditum quod non sciatur. In libris illis, qui aperientur, legemus hæc omnia. Augustinus in memoriam revocans novissimum diem, qui diebus omnibus lucem affundet & solem: Ecce, inquit, coram tot millibus populorum nudabuntur omnes cogitationes meæ: & tot agminibus Angelorum patebunt universa scelera mea, non solum actionum, sed etiam cogitationum, simulque locutionum. *a* Vbi Achitophel inaudivit machinationes suas in regem David detectas, è castris se proripuit.

it

it & gulam fune fregit. *a* Ita & Is-  
cariotes proditor, cum magistrum  
cruci addictum, perfidiæ suæ faci-  
nus jam apertum esse intellexit, ar-  
gentum retulit, & infelici arbori se-  
ipse suspendit. *b* Incredibiliter cor  
humanum concutit, crimen patra-  
tum sciri, rem emanasse ac pervulga-  
ri. Atqui tunc nihil omnino, nihil  
erit absconditum, quod non sciatur.  
Ipsa etiam beatorum hominum pec-  
cata, quæ à primo rationis usu com-  
miserunt, omnibus aperta erunt. *c*  
Neque singuli suas tantùm cogita-  
tiones, dicta & actiones, sed & om-  
nium aliorum sunt visuri. Nam sicut  
unus omnium, ita omnes unius cogi-  
tata, verba, facta omnia habebunt  
perspectissima.

Ideo Bernardus preces allegans  
Deo: Eripe me Domine, inquit, ab  
homine malo, hoc est, à quo recede-  
re non possum. Nam quocunque me  
verto, vitia mea me sequuntur; ubi-  
cunque vado, conscientia mea non  
me

*a* 2. Reg. 17. v. 13. *b* Matth. 27. 5.

*c* Vide Francis. Suarez tome 2. in 3. partem  
D. Thomæ, disput. 57. sect. 9.

me deferit, sed præsens assistit, & quicquid facio, scribit. Idcirco quamquam humana subterfugiam judicia, judicium propriæ Conscientiæ fugere non valeo &c. In die illâ cum Dominus ad judicium venerit, cogente conscientia unusquisque erit accusator, & judex suus. Propterea statuum me ante me, & judicabo meipsum, ut illius extremæ & tremendæ diei judicium evadere possim. Damnat me Conscientia mea, quamquam divinum judicium nondum me damnet. Et paulo post persequitur suam accusationem efficacibus verbis.

Hæc vero intra me abscondebam, & in meos cruciatus enutriebam. Proditor secretorum, tenax malorum suspicionum, utrobique perversus, multis velut amicus fui in obsequio, hostis in animo; Comptus in verbo, turpis in facto. Piissime Domine, unde possum esse bonus, qui in bono sic fui malus. *a*

Ante annos non adeò multos, in Hispaniis commissa est cædes clandestina.

stina. Cædis suspicio vehemens fuit de pluribus, qui omnes expedire se crimine moliebantur. Ceteris audacior unus, vultus severos induens summam in ea re innocentiam simulavit. Judex loco confurgens omnium pectora nudari jussit, & ipse singulorum curiosa manu palpans exploravit; in illo autem, qui volebat à culpa videri remotior, cor singulariter salire sensit. Et mox atrocibus verbis: Tu fecisti, ait. Ille convictus conscientia & exterritus, vel vultu prodente se reum confessus est. Nec dilatum diu supplicium. Tulit quod fecit. Sic orbis judex cunctorum corda nudabit; nec opus erit admoveere manus ad arteriarum pulsus & palpitationem cordis explorandam; Nuda & aperta erunt omnia. *a* Bernardus dixit: Cogente conscientia unusquisque erit accusator & judex suus. Quod Ezechiel prædicens: Displicebitis vobis, inquit, in conspectu vestro, in omnibus malitiis vestris, quas fecistis. *b*

L 9

Ah,

*a* Hebr. 4. 13. *b* Ez. 20. 43. Hierem. cap. 17. vers. 1.

Ah, quâ trepidatione stabunt damnati? Desperatissima eorum conscientia ut canis rabidus mordebit. Nam illi in se ipsos ita exardescunt, ut si fieri posset, seipsos etiam dentibus discerperent. Nimium fera est, ô miseri, atrocissima hæc pœnitentia. Vos olim vel mediocris dolor in gratiam reposuisset. Gemitus, suspiria, lacrimæ locum habuerunt in orbe altero. Nunc res & spes decollavit omnis. Actum est. Ite, perite, flete & ardete æternum. Hieremias vates minatur improbis, & : peccatum Iuda scriptum est, inquit, stylo ferreo, in ungue adamantino, exaratum super latitudinem cordis eorum, & in cornibus ararum eorum. *b* Quod Theodoretus explicans : Nihil, ait, potentius conscientia, in quâ scilicet infixæ litteræ sunt solidæ. Robusta sanè scriptio, & ævum ferens, cum ferrum charta, cum adamas est penna. In eandem sententiam Origenes : Nudabitur, inquit, pectoris mei conscientia, & aperto corde videbuntur litteræ peccatorum, quæ stylo ferreo ungue adamantino scriptæ sunt. Hoc

innuit Ecclesia quando in inferiis canit.

*Index ergo cum sedebit,  
Quicquid latet apparebit,  
Nil inultum remanebit.*

*Liber scriptus proferetur  
In quo totum continetur,  
Vnde mundus judicetur.*

**H**ic liber Dei memoria est, capacitatis infinitæ. At Daniel, inquis, & Ioannes non de libro, sed de libris loquuntur. Responderi potest, id quod breviter & succinctè notatur, etsi decem, etsi centum scribæ illud excipiant, unus tamen est liber: nam quod iste habet, habet etiam iste, & hic & alius, & decimus, & centesimus: ita prorsus quod in universorum hominum conscientiis scribitur, id omne Dei memoriâ continetur.

Nihil absconditum quod non sciatur, nihil opertum quod non revelatur: Omnes hyprocrises, proditiones, libidines, turpitudines quæ corde solo delitescebant, nunquam per os egressæ, tunc in lucem protrahentur omnium oculis in hoc libro inspec-

endæ. Tunc omnibus falsis fratribus insidiosis amicis, fictis Christianis, infidelibus servis, personatis nebulonibus detrahetur larva: intus & in cute notissimi stabunt. Si quis coram sex septemve millibus hominum peccata vitæ antea actæ omnia, quæ vel à pueritia meminit, aperire cogeretur, quantum erubesceret miser? mori mallet quam hac ignominiâ inuri. Enim verò novem aut decem millia Hominum quantilla pars sunt humanæ gentis? totius mundi? Ah, bone Deus, quomodo quis audebit flagitium committere, si credat illud exactissimè sciendum, & penitissimè inspiciendum ab omni humana gente, ab orbe toto! Et tamen res nefarias quotidie committimus; ergo revera non credimus sciendas, non cogitamus detegendas. O præfidentes nimium & increduli! nihil operum, quod non reveletur. Bernardus jam crebrius laudatus: In die judicii, ait qualem unusquisque habuerit conscientiam, talem judicem habebit. Angustia undique & undique. Hinc peccata accusantia, inde

terrens



terrens justitia, subtus chaos inferni, supra iratus judex, intus vrens Conscientia, foris ardens Mundus. Latere impossibile, apparere intolerabile. Si justus vix salvabitur, peccator sic deprehensus quò se vertet? *a* Cogitate hæc ô mortales, cogitate ac perpendite.

Christus Dominus nunc in terrâ scribit & fileat, uti olim Hierosolymis, adulterâ in jus vocatâ, digito velut calamo scripsit & siluit. Ita nunc Deus in cujusvis conscientiâ scribit & tacet. Æquissimè olim dicturus: *Hæc fecisti, & tacui.* *b* Die judicii eriget se, atque ostendet, quid in cujusvis conscientiâ scriptum. Hic nongenties ebrius fuit. Hic mille adulteria commisit reipsa, centena millia cogitatione solâ. Hic quindécies millies injustitiam exercuit. Hic vigesies millies invidiam fovit. Hic trigesies millies iratus fuit. Hic sexagesies millies impura & obscœna sciens volens cogitavit. *Hæc, & hæc & hæc, & hæc fecisti, & tacui.* Nunc tacere

*a Bern. de modo bene vivendi, serm. 71. & de inter. domo c. 30. v. 1. b Ps. 49. v. 21.*

tacere tuum est & audire, meum loqui & punire.

Nunc, ô Christiani, scripturam hanc corrigere licet; nunc eradere, delere, restituere, omittere, substituere, emendare concessum; Nunc scribere possumus quod volumus: Cùm erimus jam præsentes iudici; nec litterula, nec apex litterulæ negligetur.

Nostri nunc arbitrii est scribere quod placuerit, scriptorum Deus neminem cogit. Volumen autem, quod nunc operâ scribimus occultissimâ & plane furtiva, in iudicio excudetur, Orbis leget universus. Occultissimas fraudes, secretissimas libidines, pellicatus arcanissimos, abditissimam invidiam, omnes & singuli scient. Quicquid latet apparebit. Christi vita, lex nostra est & liber noster: Ad hunc igitur librum nos nostros corrigamus libros. Pro se quisque dicat: Hæc menda, hos errores & nævos in illo divinissimo libro non reperio, nec igitur in meo sint; deleantur, expungantur.

De hoc clarissimè Bernardus: Ex his,

his, inquit, quæ scripta erunt in libris, judicabimur, & ideò scribi debent secundum exemplar libri vitæ, ut si aliter habent, corrigantur, ne in illâ ultima collatione (velut minus correcti) abjiciantur. *a* Hoc prævidens Iobus: librum scribat ipse, qui judicat. *b* Scio quam pronum sit errare, & quam facilè in libros irrepant turpes noxiæ, ideò calamum iudici meo in manus trado, perfectissime illi gubernandum me subjicio, ita scribat ipse qui judicat.

Gregorius Magnus sapiens & sanctus, & solio tam sublimi dignus, nihilominus suam ipse Conscientiam veritus: sic vixi, ait, ut accusatorem exterius non timerem: utinam sic vixissem ut intra meipsum accusatorem conscientiam non haberem, *c* O Cælites, vir tam notæ sanctimonix, & qui vitam inter studia & morbos partitus, patriæ & pauperum pater, ab eleemosynis semper laudatissimus extitit, nihilominus hunc accusatorem domesticum formidat!

Intelli-

*a* Bern. l. de Conscientiâ 1099. *b* Iob 31. v. 35. *c* Greg. l. 2. moral.

Intelligite hæc qui obliviscimini Deum, ne quando rapiat, & non sit qui eripiat. *a* Judex nunc placidissimus, brevi opprobrabit in os: Existimasti inique quòd ero tui similis: Arguam te, & statuam contra faciem tuam: Fatuè putabas me semper fore taciturnum, omnia à me dissimulanda. Hactenus te variè arguebam, nunc statuam te contra faciem tuam, & disceptabo causam tuam. Quod olim Propheta meus te monuit, nunc exequar: Nunc finis super te, & immittam furorem meum in te, & judicabo te juxta vias tuas, & ponam contra te omnes abominationes tuas. Et non parcet oculus meus super te, & non miserebor, sed vias tuas ponam super te. *b*

Esto igitur, consentiens adversario tuo citò, dum es in via cum eo: ne forte tradat te adversarius judici & judex tradat te ministro, & in carcerem mittaris. Amen dico tibi, non exhibis inde donec reddas novissimum quadrantem. Verùm, (quod probe intelligas) in isto carcere nunquam

quam solvitur quadrans novissimus, nunquam ergo exitur. Atque hoc sibi volunt dominicæ minæ, hic geminus verborum sensus est. Ergo dum in viâ sumus, adversario & antigraphæo nostro, nostræ conscientiæ consentiamus, & rectè monenti pareamus. Penes nos est die novissimo Conscientiam habere accusatorem & testem adversus nos, vel fautorem & maximum pro nobis Patro-  
num.

## CAPUT XII.

*Conscientiam non audire, principium interitus.*

Naturæ panegyristes Plinius ex fide recenset quibus locis Ægyptium flumen Nilus ex alto sese præcipitet, & accolis auditum eripiat; aitque ea loca Nili catadupa nominari. Simile quid in molendinis nostris fieri amat, ubi molitores eorumque famuli plerumque hebeti & obtuso sunt auditu ob continuos strepitus, pulsus & fragores.

Conscientia majorem partem cla-

râ & sonorâ voce loquitur, nec difficile est eam loquentem liquidè audire. Sed quia non pauci habitant ad catadupa Nili, vel in pistrinis <sup>a</sup> occupantur, ubi inquietas æterna imperat, fieri fanè non potest, ut Conscientiam docentem audiant. Assiduus tumultus ac strepitus gravitatem auditus creat. Hinc paulatim Surdastrifunt, demum penitus exsurdantur, sed damno suo maximo iterum auditum recepturi.

Repente ad mortis adventum ita clamabit Conscientia, ut eam surdi illi, velint nolint, audire cogantur. Diximus, qualem se Conscientia in morte, qualem in iudicio sit exhibitura. Sequitur ut ostendamus quantum sit mali ad Conscientiæ monita obsurdescere & quam æquè dicturus olim Christus: surdus sum surdis.

<sup>a</sup> Stampfmülen.

# SCRIPTURA

*Audient in die illa surdi verba libri*

Isa. c. 29. v. 17.

P I C T U -

## PICTURA.

*Christus capitis sui, spinis coronati, aure  
res manibus obturans.*

**Q**Uicquid contra conscientiam fit, male fit. Omne enim, quod supra diximus, quod non est ex fide, peccatum est. Effatum Augustini verissimum: Quod fit contra conscientiam, ædificat ad gehennam. *a* Theologi duas in homine partes assignant. Unam cui nomen dedere *Concupiscibilis*, alteram cui *Irascibilis*. Concupiscibilis pars in illud fertur quod bonum delectabile, voluptarium videtur: Irascibilis odit & arcet quicquid adversatur voluptario. A Cane id discimus: Si os carne vestitum projiciatur cani, mox sese prodit pars concupiscibilis, os namque dentibus avidissime invadit, hoc illi volupe est; ossa cani gratiora quam manus gemmarum plena. Et adeo appetitus concupiscibilis hinc vivit, ut conjunctissimum habeat irascibilem; ita quidem, ut cani os rodenti, neque

canis alius, neque homo, etiam familiarissimus illud ausit ereptum ire, nisi dentibus expositum se velit; nam appetitus irascibilis amotum vult hostem, ideo ad pugnam confert omnia. Eadem est ratio in homine, qui cum brutis animantibus magnam habet cognationem.

Verum duplicem hunc appetitum Moletrinæ ac Catadupis Nili confesso, hæc nos ita exfurdant, ut loquentem conscientiam non audiamus. Nam appetitus Concupiscibilis verè ut Molendinum est, ubi pulsus, fragor, strepitus perpetuus. Exemplum monstramus. Est qui cupiat discere. Ohe malam cupiditatem, & radicem malorum omnium! Paulinum illud novimus: Qui volunt divites fieri, incidunt in tentationem & in laqueum diaboli, & desideria multa inutilia & nociva, quæ mergunt homines in interitum & perditionem.<sup>a</sup> Siquidem ex hac una nummorum cupiditate centum iterumque centum innumeræque aliæ cupiditates nascuntur. Pari modo qui ambitiose



tiose auram honoris captat, cupiditate sanè malâ laborat, unde cupiditates aliæ oriantur infinitæ. Ita prorsus qui carnis voluptates sectatur, appetitiones adversus rationem innumera- biles nutrit & libidinibus inflam- matus ac furens fertur in plurimum nefas; nam una ex aliâ libido & infa- mis appetentia progignitur. Hi illi pulsus, hi fragores & strepitus illi sunt quorum assiduitas auditum dies no- ctesque sic obtundit, ut conscientiæ monita non percipiantur.

Et plerumque ubi Concupiscibilis est appetitus, illic & irascibilis locum invenit. Nam homini prava appē- tenti varia occurrunt obstacula, sunt adversarii, qui vel honores vel num- mos vel voluptates eant imminu- tum. Hinc fremit ac perstrepat pars Irascibilis. Hinc turbulentæ voces illæ: Hoc mihi prohiberi non patior, hoc mihi non sino eripi, hoc de me dici, sic mecum agi non fero. Ita mo- lestias omnes & quicquid dolori est, amolimur appetitione Irascibili, quæ arduum oppugnat.

Hæc illa vitiorum & affectuum

moletrina inquietissima, quæ ad voces Conscientiæ facit obsurdescere. Quod Jacobus Apostolus clarissimè affirmans: Unde bella, inquit, & lites in vobis? nonne hinc? ex concupiscentiis vestris? Concupiscitis & non habetis. Hinc appetentia Concupiscibilis & Irascibilis exsurgit, quia non habemus quod cupimus, aut habemus contrarium quam cupimus. Unusquisque vestrùm tentatur ait Jacobus, à concupiscentiâ suâ abstractus & illectus. *a* Atque hoc exfurdatur hominem.

Josephi proregis Ægyptii fratres, cum in vinculis essent, non tantum diuturnæ furditatis insimulati sunt à Conscientia, ut supra demonstratum est, sed etiam post parentis obitum instigante Conscientia male sibimet vaticinari cœpère: Jam perimus; Frater hactenus senem reveritus, pepercit jugulis nostris. Nunc parente mortuo, quem vereatur? veterem injuriam utique vindicabit. Ideò legationem adornarunt, miseruntque qui dicerent. Pater tuus  
præce-

præcepit nobis, antequam moreretur, ut hæc tibi verbis illius diceremus: Obsecro ut obliviscaris sceleris fratrum tuorum, & peccati atque malitiæ quam exercuerunt in te. Nos quoque oramus; ut servis Dei patris tui dimittas iniquitatem hanc. *a* Nec satis afflictæ illorum conscientiæ: nam postquam aditum sibi ad gratiam præmunierunt, demum & ipsi venerunt, proni adorantes in terram, se fratris servos professi sunt. Ita mei, jam tandem adestis veniam petituri? Annis viginti & pluribus ad omnes Conscientiæ reprehensiones furdi, Nunc demum recepistis auditûs usum? Meriti quidem fuissetis dignum flagitio supplicium: At ea est fratris vestri humanitas, ut non aures tantum, sed ipsa præcordia vobis patere voluerit, qui ejus innocentiae olim & vestræ conscientiae huc usque tam pertinaciter obscuruistis.

Hebræus Rex Joachim postquam Hieremiæ vaticinia combussit, Deus non tantum eadem illa priora iterum dictavit, & insuper, *additi sunt*

M 4

*sermo-*

*sermone multò plures: quam antea fuerunt; sed & regi dici jussit; Hæc dicit Dominus Deus contra Joachim regem Juda: non erit ex eo, qui sedeat super solium David, & cadaver ejus projicietur ad æstum per diem & ad gelu per noctem, & visitabo contra eum & contra semen ejus, & contra fervos ejus iniquitates suas, & adducam super eos, & super habitatores Hierusalem, & super viros Juda omne malum. a Cur Deus tantopere iratus? quod illud tam grave flagitium tot suppliciis puniendum? Rex combussit, quod Deus dictavit. Ita non minus indignatur Deus, & pœnas irrogat, si ea, quæ dictat conscientia, rejiciantur, & velut comburantur. Surdum se surdis exhibet, & diu non auditus auditum denique ipse oppilat. Exemplum admodum recens Academia Complutensis subministrat, quod ab Æmyliano Garcia narratum, fidei scripto ad me transmissum est. Et en conscientiæ non auditæ nobilissimum paradigma!*

Juve-

Juvenis fortunis & claro sanguine insignis, vivendi genere non laudatissimus, ad vitam sanctiorem sapius ac vehementius impellebatur a conscientia, quæ illi identidem occinebat hanc cantilenam: Redi ad te, & nosce te. Via quam insistis, ad inferos ducit. Valedic cælo, si gradum revocare nolis. Quod agis, mature age. Dies hodierna, sed forsan non tota, in manu tua est; utere, Secuturum cras incertissimum. Deus veniam resipiscentiæ tuæ promisit, dilationi tuæ diem crastinam non promisit. Quid cunctaris & differs? si è vivis te subito mors exturbet, quò migraturus es? Circumspice; brevi ad ostium Æternitatis stabis. Qualis vixeris, talis & judicaberis. Mores igitur emenda, & viam, quam monstro meliorem, ingredi. Non placet hæc via? nimis arcta & horrida videtur? Ergo viæ finem considera, paradisum anhela. Huc sola ducit virtus. Nec solus hunc callem tenebis. Multi præeunt, sequuntur multi. Unicum VELLE tuum obstat quò minus seriò bonus sis. Vicisti, si

audeas velle. Me rectissima monentem non audis? Maximum tibi ipse malum accerfis: periisti, si furditatem hanc perseveras. At bonus ille juvenis hæc quidem audiebat, sed audire dissimulabat. Eadem iterum iterumque monitus subinde conscientiae respondebat. Nondum omnium dierum soles occubuerunt. Sanctior vita, grave negotium. Quid propereamus? studiis meis ad finem deductis, tum demum dispiciam quod vitæ genus placeat. Studia ad finem deduxit, sed emendationem vitæ inter postremas curas habuit, sacerdotium opulentum ambiit & obtinuit; in curiam sacram aditum sibi patefecit. Verbo dicam: in cogitationibus suis evanuit. Catadupa Nili, & molendinum illud Concupiscibilis & irascibilis appetentiæ ita hominem exfurdarunt, ut conscientiae hortatus, velut inanis auræ sibilos transmiserit. Quod pejus, genio paullatim indulgere, sed cautè: carnis lasciviam non reprimere, sed tectè: libidinibus se se dedere cæpit, sed furtim: Modò nihil honestati publicæ adversum fieret;

ret; modò boni nominis ratio constaret; modò nihil emanaret in vulgus; Deum & cælum perdere, jactura non tanta videbatur. Et quod longè pessimum, cùm remedium vertitur in scelerum patrocinium: Unica confessio, ajebat, nequitas sexcentas delet. Potentissimum hoc cacodæmonis vafrementum est: Exomologesis unica, inquit, noxas innumeras levi compendio abstergit: pergamus. Hoc animos addit ad protervissimè peccandum. Ita juvenis ille animatus ibat & suaviter peribat. Æmylianus, Sacerdos, quem dixi, sanctitatis non ignotus, juvenem ad faciendam exomologesin invitavit. Juvenis humanus & comis nequaquam asperè respondit, nec sese refractarium exhibuit, blanda verba miscuit, quæ humanis tergiversatiunculis distinxit. Facturum se dixit, non fecit. Intereà febriculâ corripitur homo; quem licet Medicus in spem aliquantulam, ut fieri solet, erigebat; id tamen sui moris & officii esse ajebat, suadere, ut æger prius cum Deo in gratiam rediret, quam pharmacum sumeret, ita

ita fore ut tanto efficacius conduceret laboranti. Nec injuria prius animum quam corpus curari. Ita Medicus valedicit & abit. In habitu Patrem Æmylianum habet obvium, cui candidè aperit morbum illius domini levem videri, sed revera esse letalem. Proinde videret, qui à confessionibus est, quomodo ægrotum disponderet ad æternitatem. Ergo Pater Æmylianus omnem movet lapidem ut ægrum ad veram de noxis pœnitentiam perducatur; Rogat per omnes Christi cruciatus, ut animæ vulnera patefaciat, & vitæ noxas confessione deleat. At ægrotus suaviter reluctari, & aliò sermonem divertere, ac verò etiam sperare post triduum è lecto se abiturum: quid enim opus in morbo frustra cruciari? Quapropter alter aries in ægrotum intorquendus. Scias igitur, ait Pater, morbum hunc letalem esse nec differendam in crastinum pœnitentiam. Ridet æger, nec credit aliter quam vānum, ut putarat, vaticinium. Utique Conscientia illi non obscure dixit: Quid tu de morbo tuo judicare nosti?



fi? Quod si esset letifer, quid faceres? Hic audacem esse, periculosissima est insania. non igitur salutem animi æternam tam formidolosæ committas alex. Non audiit æger. Ita tertius incutiendus fuit aries. Pater Æmylianus cum domesticis omnibus summe, ac per Christi amorem enixissime rogavit, in ea morbi mortisque viciniâ mature sibi ipse consuleret, à momento vitæ ultimo totam pendere æternitatem. Surdo fabula. Quæ dicebantur, humaniter accipiebantur. Sed ne tantulum quidem promotum. Quartus ergo & ultimus aries fuit vibrandus. Pater Æmylianus imaginem Christi crucifixi arripit & opponit ægro, atque unâ circumstantes compellans: Quæso vos, inquit, sequimini, præibo vocem: De profundis clamaui ad te Domine, Domine exaudi vocem meam: Fiant aures tuæ intendentes in vocem deprecationis meæ. *a* Hic imago Christi velut sentiens visa est geminas manus clavis subducere, auribus admoveere, easque immixtis digitis

gitis obturare, perinde si Christus clare diceret: Quia vocavi & renuisti, ego quoque in interitu tuo ridebo. Ad taciturnum hoc prodigium attonitus æger sudare, tremere, oculos huc illuc circumferre, altum ingemiscere, ita demum cunctis inspectantibus expirare. Hic illud verissimum esse visum est: Surdus sum furdis; non auditus, non audio, repulsam toties passus, repello.

Cum scriptore prisco hinc meritò exclamem: O peccata quam faciles aditus habetis dum suadetis, & quam difficiles exitus? Dum suadetis inungitis, sed postquam suaseritis, usque ad mortem animæ pungitis. Intelligite quam amarum & malum sit, relinquere Dominum, vos qui peccatis. Tandem adest Christus, olim frater & patronus, jam adversarius & iudex proclamat. Surdus sum furdis, despectus toties despicio. Vos auditum in molis vestris, hoc est, in libidinibus vestris perdidistis; Vos Catadupa Nili, tot affectus vitiosi & mali exfurdarunt: Vos conscientiam à me datam non audistis. Jam nec  
ego

ego vos audiam. Ite, abite, perite.  
Surdus sum surdis.

## CAPUT XIII.

*Quotidianum Conscientiæ examen.*

**C**hristus jam rediivus ad discipulos suos, non manè, non meridie revisit, sed sero vespere, cum dies jam vergeret ad finem, imò jam nox præcipitaret cælo. Cur istud, obsecro! Toti dies Christo Domino vacui erant, ita quavis horâ ad eos penetrare poterat. Censet Chrysostomus id eam etiam ob causam, ut discipulis sub vespèram congregatis integer adesset numerus, eorum nemine absente. Quod interdiu vix poterat fieri. Nam homines erant egeni, quibus per diem victus & alimentorum aliquid quærendum. Ita sub noctis ptincipium convenerunt; noctu sunt congregati.

Hoc nocti proprium est, negotiosos homines, huc illuc sparsos, domum compellere. Viator qui totos dies accelerat gressum, hoc unice contendit, ut vesperi sub tecto esse liceat.

liceat. Domum quærit, hospitium indagat, quietis locum desiderat, ubi pernoctet. Qui totos dies negotiismersus discursat, hospitalem & amicam noctem optat, quâ respiret. Non raro convivæ ad umbilicum noctis tam strenue perpotant, ut quandoque etiam monendi sint, sat poculis datum, domuitionem parent, somno vacent. Et hoc discriminis est inter homines & feras. Nox hominem ad cubile revocat, illas cubilibus educit. Quod hebræus Psaltes adstruens: Posuisti tenebras, ait, & facta est nox, in ipsa pertransibunt omnes bestię silvæ. Ortus est sol, & congregati sunt, & in cubilibus suis collocabuntur. Exibit homo ad opus suum, & ad operationem suam usque ad vesperam. *a*

Vesper compellit domum. Ite domum saturæ, venit Hesperus. Vesper in cubile revocat. In illud scilicet quò regius vates digitum intendit. Et in cubilibus vestris compungimini. *b* Nec ego aliud monebo quam domum vesperî eundum, cubile

bile ingrediendum. Ita omnes & singulos moneo: Ingredere cubile tuum, descende in te ipsum, Conscientiam excute. Jam suprà dictum, quid sit Bona Conscientia. Hic quaestio sit: Quid faciat bonam Conscientiam. Cui rectissime responderim: Creberime, imo quotidie illam examinare. De examine Conscientiæ copiosius disserui in Trismegisto, ubi de cultu Conscientiæ actum. Nunc isto ac sequenti capite decem rationes ac causas breviter exponam, cur Conscientia quotidie cum cura & solerter sit examinanda.

## SCRIPTURA

*Quod si nosmetipsos dijudicavimus, non utique judicemur. 1 Cor.*

1 I. v. 31.

## PICTURA.

*Fons cum erectâ columna, in qua Cor sublime, è quo V. fonticuli salientes.*

**C**ausa I. cur Conscientia quotidie sub nocte examinanda, est exemplum

emplum eorum, qui gentilitatis tenebris oppressi, Conscientiam examine quotidiano non solum explorandam docuerunt, sed & explorarunt. Pythagoras unumquemque discipulorum suorum frequentius monuit, ut cum ædes subiret, sibi ipse diceret: Quò prætergressus? quid gestum in tempore, quid non? *a* Apollonius Thyanæus secum ipse in eum modum loqui solitus: Novi, aiebat, videtur mihi; quò ferimini? sciendum est. Et plura talia, quæ Conscientiæ faciunt scrutandæ. Illustrissimè omnium Seneca, qui modum excutiendæ conscientiæ à se traditum secutus ipse: Animus, inquit, quotidie ad rationem reddendam vocandus est. *b* Quis, obsecro, istud Christianæ religionis arcanum philosophis istis aperuit? Fortassis, inquires, aliter docuerunt in scholis, aliter vixerunt domi, quod de se Lacides philosophus est factus. Non ita fauè illi: Sed dicta facta per diem diligentissimè recognoscebant. Sextus in quotidianâ conscientiæ per-

*a* Suid. mihi pag. 845. & pag. 21. *b* Sen. 3. de Irâ c. 30.

perscrutatione : Quod hodie, agebat, malum tuum sanasti ? Cui vitio obstitisti, qua parte melior es ? Seneca apud suum ipsius tribunal : Quotidie, inquit, apud me causam dico : cum sublatum è conspectu lumen est ; & conticuit uxor, moris mei jam conscia, totum diem mecum scrutor, facta ac dicta mea remetior. Et quod mirius est, Annæus intar Sodalis Parthenii aut hominis religiosi, non capitalia crimina, sed minora etiam piacula noxa que minimas persecutus : Hodie, dicebat ipse sibi, disputando nimiam in adversarium acrimoniam strinxisti : Alium graviore verbo appellasti. In convivio quod non principe loco collocareris, excaudisti ; limis illum & iniquis oculis aspexisti. Ita Seneca quotidiano examine Conscientiam suam exploravit. Idem alii fecerunt. Ah, Christiani, nondum erubescimus, nondum colorem ducimus ad hæc exempla ? Idolatrae conscientiam examinarint quotidie, Christiani vix semel in mense ? & negligent isti, quod illi accuratissimè fecerunt ?

*Secunda causa.* Conscientiam diebus singulis excutiendam, ipsa docet ratio. Ubi domus mundities curatur, pavimentum quotidie verritur; tutò navigatur, si sentina identidem exhauriatur; nam etsi navigium sit novum & firmum, aqua tamen rimulas invenit, quas penetret: lectus qui non quotidie componitur, somno iniquior efficitur. Conscientiam cupis habere puram? quotidie illam excutiendo purga. Vis navigiolum tuum non mergi? subeuntem aquam identidem exantla. Somnos optas pacatos? Lectulum conscientiae tuae quotidiana industria compone.

Narrat Pelagius senem optimum religioso fratri sollicitè inculcasse, Domum conscientiae semper purgandam esse. Diabolus est inimicus & tu domus: ille non cessat super te jactare quidquid sordium invenerit; tuum est, non negligere, ut foras propicias, quod ille jactaverit: alias replebitur tibi domus sordibus, ut nequeas in eam intrare. *a*

At hoc nunquam commodius fiet,  
quam



quam vespertino sub examine. Discrimen sit inter hominem & pecudem. A pecude alienum non est, sed ab homine, in stratum irruere nullis precibus, nullâ conscientiae discussione præmissa. Hebræus psalter hortatur: Quæ dicitis in cordibus vestris, in cubilibus vestris compungimini. Cum soli estis noctu, errores præteritæ diei resumite, eosque dolendo & ingemiscendo expungite.

*Tertia causa.* Sanctissimorum quorumque hominum exemplum. Beatus Ignatius horis singulis in se se descendit, & conscientiae latebras penetrare institit<sup>a</sup>. Beatus Franciscus Xaverius sæpius in die conscientiam omnem pervestigavit, in eo perfectæ vitæ cardinem verti arbitratus. Istud hi viri religiosissimi è sanctorum hominum libris, è Chrysostomi, Hieronymi, Ephremi, Dorothei, Bernardi, Bonaventuræ scriptis didicerunt. Hinc etiam sanctus Ignatius lege sanxit, ut sui omnes quotidie bis Conscientiam perscrutatione accuratâ excuterent. Quod

N 3

etiam

*a Ribadencira in vita illius l. 5. c. 2.*

etiam aliæ religiosæ familiæ observant, & quidem cum eâ curâ, ut singulis vicibus dimidiam horam perlustrandæ conscientiæ impendant, sic universè per diem hora integra huic mentis exercitationi tribuitur. Quod mihi ante annos non multos antistes in suâ familia fieri certa fide asseveravit. Hoc autem ab homine profano & negotioso nemo exegerit: modò vesperi pars horæ unica tam piæ consuetudini assignetur.

Hic ego quam possum contentissimè vociferor, & omnes illos, qui volunt piè vivere in Christo JESU, exhortor, & rogo amantissimè, ut in Christi Domini honorem, & in animi salutem è viginti quatuor horis, vel unicam particulam, vel quadrantem unicum decerpere non graventur, eumque lustrandæ conscientiæ assignare. vestrum est reliquum viginti quatuor horarum spatium: Satis erit temporis quod cibo sumendo, quod somno capiendo, quod negotiis tractandis detur, vel unica saltem pars horulæ dematur, obsecro, quæ conscientiæ purgandæ insumatur. Hoc fanè

sanè profectum in virtutibus plurimum juvabit. Nec difficilis est modus excutiendæ. Sume tibi, mi ~~Christiane~~ Christiane, Christi crucifixi quinque vulnera. Ad primum, Age Deo pro beneficiis gratias. Ad alterum, pete à Deo lumen in diem transactum inquirendi. Ad tertium lateris vulnus, diei præteritæ cogitationes, dicta & actiones inspicere. Ad quartum, noxarum eo die commissarum veniam posce. Ad quintum, emendationem firmam propone. *a* sed progrediamur.

*Quarta causa.* Cur conscientia vesperi cum Deo sit concilianda. Multa millia hominum in æternas tenebras dejecti non fuissent, si conscientiam vesperi per horulæ partem examine quotidiano emaculassent. O bone Deus ! quanti letalibus noxis obstricti cubitum eunt ; illic subito extinguuntur, & pertrahuntur ad supremi regis tribunal, sententiam audituri in omnes æternitates immutabilem ! si tales in examine versper-

N 4

cant,

*a Hac fufius docentur in Trismegisto l. i.*

cant, exercuissent, & peccasse doluissent, æternis suppliciis addicti non fuissent. At verò morte subitâ occupati, è lecto migrarunt ad inferos, defectu pœnitentiæ. Tantillum est quod felicitatem æternam aut acquirit, aut perdit. Sed dices hominum religiosorum, aut sodalium partheniorum est, dicta per diem & facta vesperi recognoscere. Respondemus primò, exercitationem hanc sacram summè necessariam iis, & nemini magis, quam qui flagitiis vitam inquinant, & eâ insuper temeritate sunt, ut conscientiam noxis letalibus foedatam deferant ad lectum, ac securè dormiant, Orco sanè proximi. Respondemus secundo: conscientiam statò tempore, certoque ritu ac modò in jus vocare, religiosorum hominum est; ad arbitrium hoc facere, aliorum omnium est, qui Deo placere cupiunt. Optima ad subitam mortem dispositio, quotidiana conscientiæ perscrutatio.

*Quinta causa.* Examen conscientiæ quotidianum confessionem sacram reddit expeditam & securam.

Sacrum

Sacrum Confessionis mysterium ritè obire, & crimina sua apud sacerdotem exponere, res plena horroris & anxietatis videtur esse plurimis. Quomodo, ajunt, meminisse possim quid trimestri aut quadrimestri, quid anno medio aut integro deliquerim? Potes, mi Christiane, potes, neque adeò difficulter. Quotidie in teipsum inquire, & rem omnem habebis factam. Nam qui sedulò conscientiam interrogat, is errores deprehensos aut chartæ aut pugillaribus mandat; ita cum dies animi expiandi adest, confessionis series jam perscripta est. Nec opus hîc longâ sollicitaque memoria. Rationibus collectis facilè subducitur summa. Ubi paterfamilias accepti & expensæ rationes quotidie sollerter inscribit, hebdomade finitâ facillime perspicit, quo loco res sint: ita prorsus qui diebus singulis paullò accuratius conscientiaæ nævos annotat, post hebdomadem aut mensem exactum nullo negotio noxarum summam colligit. Hîc rationes expeditæ sunt, ubi quotidiana vigilat industria.

Lex ditefcendi optima eft, nihil cuiquam debere. Qui autem nulli debere vult quidquam, is argento præfentario, pecuniâ numeratâ diffolvat omnia. Nos quotidie Dei debitores conftituimur; in multis offendimus omnes; *a* quotidie nova recipimus beneficia, nova contrahimus debita. Nihil hîc confultius, quam explicatâ folutione nomen contractum ftatim eo ipfo die tollere: quod verifimè fit in confcientiæ quotidiano examine, gratias agendo, culpas deprecando, emendationem ftatuendo. Ita finis diei reftituit, quicquid dies totus perdidit.

Beatus Dominicus, religiofiffimæ familiæ auctor, mirificam fibi fpeciem vidit obiici. Cænobium cacodæmon obiit, & diverfas illius partes curiofiffimè luftravit, quantumque meffis hîc illic haberet, non fine acerba infultatione faffus. Compluribus locis, ajebat, non modicum lucror: Nam hîc garriunt; hîc ludunt; hîc potant; hîc otiantur; hîc dormiunt: ubi ad locum religiofi fenatus, Capitulum.

lum & vocant, pervenit: Hic perdo-  
nquit, quicquid lucratur alibi. Idem  
de nocturno examine conscientiae af-  
firmari potest, quicquid ille hominum  
vexator Diabolus, toto lucratur die,  
id omne perdit vespere, cum quis se-  
natum in pectus convocat, & pero-  
rantem audit Conscientiam.

Hoc autem non tantum tranquil-  
lum somnum, ut dicimus, sed etiam  
mane beatum efficit. Unde maximi  
refert vigilias diei pie ac sancte ordi-  
ri. Dimidium enim facti, qui bene  
coepit, habet. Atqui hoc pendet à  
somni præcedentis principio, quod  
omnes pii scriptores affirmant. Nam  
qui cogitationibus foedis involutus  
est cubitum, iisdem nondum expedi-  
tus cubitu surget; adeo matutinum  
tempus pendet à præcedente vesper-  
tino, ut somnum malè finiat, qui eun-  
dem malè cæpit. Ideo nullus sit Chri-  
stiani sanguinis qui non ante initium  
Somni in seipsum descendat, cum  
Deo suo calculum ponat, & intimos  
animi recessus inspiciat.

CA-

## CAPUT XIV.

*Continuatio de necessitate & utilitate  
quotidiani examinis  
Conscientiæ.*

**N** Usquam est, qui ubique est; ait Romanus sapiens. a foris Argus, intus talpa. Sunt mercatores, qui in regiones pœne omnes excurrant, qui Italiam, Belgium, Galliam, Hispaniam peragrent, & circulentur Orbem: hinc modò Romæ, modò Mediolani, jam Parisiis, jam & Constantinopoli agunt. Hi totos ferè annos extra patriam degunt, nec quid in familia sua rerum agatur, sciunt. Verbo, vix unquam domi sunt. Hoc idem prorsus affirmari potest de homine illo, qui in seipsum rarò descendit, aut nunquam: curis implicatus, adversis dejectus, negotiis occupatus & merfus, omnia sibi commissa fideliter curat, tantummodò seipsum negligit: Huc illuc comneat, has illas urbes pervagatur, domi est rarissime, omnibus optime notus, sibi ipsi solùm ignotissi-



ignotissimus. De hoc tali homine prae-  
 dicti verissime, cantabant. *Notus nimis  
 omnibus, ignotus moritur sibi.*

Adolescens ille prodigus inter in-  
 fame contubernium adulterinâ mo-  
 retâ notior, sibi solùm ignotissimus  
 vixit. Denique ubi rem omnem con-  
 coxit, animum suum ingressus, cum  
 conscientia sua cœpit colloqui. Mera  
 prius vixit bacchanalia, tristia de-  
 mum secuta sunt cineralia; ille in se  
 reversus, a pectus planxit, conscien-  
 tiam excussit, patriam suspiravit. Hoc  
 fessum lasciviis domum compulit,  
 hoc apud parentem in gratiam resti-  
 tuit, hoc vestiit, hoc fami subtraxit.  
 Citius hoc fecisset, ad eam rerum  
 omnium inopiam non devenisset, nec  
 enim sui oblitus, sibi que ignotus in  
 miseras extremas incidisset. Verum,  
 quamdiu numos habuit, conscien-  
 tiam non audivit, ad incitas redactus  
 conscientiae monitis obtemperavit.  
 Conscientia cur, ab omnibus sub no-  
 ctem examinanda sit, quinque causas  
 assignavimus; sequuntur quinque alię  
 quas brevitate summi explicabimus.

S C R I -


## SCRIPTURA.

*Vade in domum tuam, Marci. 2.*

## PICTURA.

*Lampas ardens in cavo monte, seu specu,  
in quo noctua, lacertus, animal-  
cula, serpentina & re-  
pentia.*

**S***exta caussa.* Post illas quinque præ-  
missas, examen conscientia, verè  
schola est, ubi ars artium discitur.  
*Nosce teipsum.* Hac arte ignorata,  
nil prodeit viginti duas linguas cum  
Mithridate nosse: scire omnia non  
fatis est, si istud nesciatur, sed ina-  
nis, & vana est omnis scientia, si ple-  
na vitii sit conscientia. Divinus Rex  
David notitiam sui ipsius, princi-  
pium virtutis judicans: Cogitavi vias  
meas, inquit, & converti pedes meos  
in testimonia tua. <sup>a</sup> Quisquis cogi-  
tat vias suas, facile convertit pedes  
suos in vias rectas. De prodigo juve-  
ne illo beatus Lucas memorat: *In se  
autem reversus dixit.* Hoc cogitatio-  
num





num bonarum initium fuit: diu miser, hinc demum se esse miserum deprehendit.

Plutarchus narrat à Cræso Lydorum rege potentissimo Delphicum oraculum sollicitè consultum, Quæ via ad felicitatem tenderet? Responsum est: si te ipsum cognoris. Hinc idololatræ cæci sapientissimum hoc effatum Apollini suo tribuerunt. Sed refellens id Ambrosius: Jam pridem ante, inquit, hoc dictum: si ignoras te, ô pulcherrima mulierum, egredere & abi. a Juvenalis veterum Romanorum falsus concionator, vel inscius dixit, quod res est:

*E cælo descendit: γὰρ ὅθι σεαυτὸν.*

*Figendum, & memori tractandum pectore, rebus*

*In summis minimisque.*

Si autem uspiam actuosis præceptionibus doceatur divinum illud, *Nosce te ipsum*, profectò in examine conscientiæ id seriò docetur. Necesse est igitur, si Augustino creditur, ut per singulos dies vitam nostram ad judi-

judicium vocemus, & quid egerimus, per noctem & diem examinemus. Hinc namque sui ipsius notitia discitur.

*Septima causa.* universalis priscorum Patrum doctrina est. Hæc autem compendiosa via est ad omnes virtutes. Qui se ipsum novit, sibi ipsi concionatur, unde se ipso quotidie fit melior. Sed locus non sit; tempus non sit; somnus urgeat; curæ avocent, nihilominus pia hæc consuetudo non penitus intermittenda. Animi salus potior est omnibus. Quærite primum regnum Dei, & cetera omnia adjicientur vobis. *b* conscientiam quotidie ad tribunal citandam esse, Gregorius Magnus explicatissime: Electorum est, inquit, actus suos quotidie ab ipso cogitationis fonte discutere. Illustre illud Augustini monitum, sæpiusque decantatum? quis nescit? In tribunal mentis tuæ ascende contra te, & reum te constitue ante te: noli te ponere post te, ne Deus ponat te ante te. cui addit, quod

*a Augustinus, vel quisquis est auctor. lib. de Spiritu & anima cap. 52. b Matth. 6 33.*


quod sequitur: Quia te non vident, placui tibi, displicebis & mihi & tibi; mihi cum iudicaberis, tibi cum ardebis. Hugo Victorinus auriculam obliuioſo conuellens: Redi ad cor tuum, inquit, & ſubtiliter diſcute teipſum, non ſolum qualis ſis, verum etiam qualis eſſe debeas. Ita Hiſtoricorum quidam laudarunt principes nonnullos & reges, reuera non quales fuerunt, ſed quales eſſe debuerunt. Xenophon ſuum depinxit Cyrum, non qualis reiſſa fuerit, ſed qualis eſſe debuerit; ita & nos cum conſcientiam in ius vocamus, non ſolum cogitemus quales fuerimus, ſed etiam quales futuri ſimus: de præeritis doleamus, de futuris ſanctiora tatauamus. Biſrons Janus hic imitandus qui non acta ſolum ſed & agenda eſpiciat. Ita cenſuerunt priſci Patres.

*Octava cauſa.* Major ſomni tranquillitas. Qui extra periculum animi & ſalutis ſempiternæ ſomnum perire, qui conſcientia non palpitante ſed quieta cupit ſe quieti tradere, prius cum domino Deo ſuo rationem

supputet, & lætus securusque ibit dormitum. Auctor de imitando Christo cor vagum erudiens: Si non continuè, inquit, vales te colligere, saltem interdum, & ad minus semel in die. *a* Quis ille obsecro, qui perpetuis curis, crebrioribus colloquiis, assiduis negotiis distentus, animum semper habeat præsentem, & qui domi suæ sit. Num ergo superflua hæc pietas est, si quis vesperi per partem Horulæ secum habitet, mores suos inspiciat, & sanctis sese desideriiis armet? Hoc non solum rationi sanæ, sed & disciplinæ Christianæ convenientissimum, semel in die secum morari posse aliquantulum: Alioqui conscientia coram Christo iudice objiciet, quod Christus olim Philippo. Tanto tempore tecum sum, & non cognovisti me? O te fatuum & rerum tuarum ignarum! Ergo dum licet, inspicere, cognosce, ac dirige conscientiam. Auctor, quem proximè laudavi: Gaudebis, inquit, semper vespere, si diem expendas fructuo-







fructuosè. Vigila super te ipsum, excita te ipsum, admone te ipsum, & quicquid de aliis sit, non negligas te ipsum. *a* Vel ipse somnus tanto erit tranquillior & suavior, quantò conscientia pacatior fuerit & serenior.

*Nona causa.* Voluminum sacrorum auctoritas hoc ipsum Conscientiæ quotidianum examen digito monstrat. Insignissimè Siracides sensu prorsus historico & genuino: Præcurre autem prior, inquit, in domum tuam, & illic avocare, & illic lude, & age conceptiones tuas, & non in delictis & verbo aspero. *b* Inhærens sententiæ explanatio hæc est: Ante omnia tuam ipse domum ingredi, & tumultibus te subtrahe; nec lulum tibi prohibeo, sed suadeo spiritalem, ut spiritum fatigatum recrees, lustrando conscientiam & submisce te ipsum accusando. *c* Eodem digito intendens Ezechiel: Ingredere, inquit, & includere in medio domus tuæ, *d* conscientiæ tuæ. Bea-

O 2

to

*a* Thomas Kemp. l. 2. de Imit. Christi cap. 6.

*b* Eccl. c. 3 v. 15. *c* Ita Emanuel Sá explicat.

*d* Ezech. c. 3 v. 24.

to Marco memorante, Christus paralytico dixit: Vade in domum tuam. & Augustino explicante: Ingredere & scrutare conscientiam tuam. Quis enim verò nostrum dicat? Ego Paralyticus non sum, ad me non spectat hæc jussio. Quando igitur cuivis nostrum à Christo hoc imperatur: Vade in domum tuam. Eamus & ingrediamur domum nostram, lustramus quotidie Conscientiam nostram. Cum serus appetit vesper, cum somnus admittendus, seipsum quilibet Christi verbis urgeat: Vade in domum tuam, vade homo, vade, vade: Tecum ipse paullulum morare, tecum habita. Beatum vitæ finem optamus omnes, propitium Christi tribunal nemo non desiderat, huc autem non est certior, nec ducit rectior via, quam Conscientiæ lustratio quotidiana. Optimas & expeditissimas cum Deo rationes colligit, qui colligit quotidie. Clementissimum sibi jure pollicetur judicem, qui judicem quotidianis conciliat obsequiis. Oraculum enim illud Pauli multò

multò certissimum est : Quod si nosmetipsos dijudicaremus , non utique judicemur. <sup>a</sup> Judicemus nos ipsos quotidie, & ab orbis judice nobis non male metuemus.

*Decima causa.* Jobi & Davidis Hebræi Regis Illustrissimum hac in re monitum & exemplum. Disertè Jobus : Visitans , inquit , speciem tuam non peccabis <sup>b</sup> Qui rei familiari cupit servire & frugem facere , nunquam diu à domo ablit , & quid per domum hinc inde fiat , creberri- mè vestiget oculis , & *visitet*. Hic for- san dormitur ? excitet. Hic garritur ; gerrones dissipet. Hic ab opere cessa- tur ? labores ingerat. Hic furtivè po- tatur ? potatores puniat. Hic negli- genter laboratur ? reprehendat & ur- geat. Idem prorsus agat , qui pacatam conscientiam amat , speciem suam quam frequentissimè visitet , & non peccabit.

Hebræus Rex David maximam sanctimonix suæ partem nocti refe- rat acceptam. Noctu flevit , nocte

O 3

con-

<sup>a</sup> 1 Cor. cap. 11. v. 31, <sup>b</sup> Job. cap. 5. vers. 24.

conscientiam excussit, noctu precatus & meditatus: Lavabo, inquit, per singulas noctes lectum meum, lacrimis meis stratum meum rigabo. *a* Eam lacrimarum copiam itillavit oculis, ita lectulum suum lavit, ut Hieronymus & contextus Hebræus quod paulô ante monui, hæc verba statuant: Natate faciam lectum meum. Videte obsecro, quam severus ac rigidus in seipsum iudex fuerit Princeps Sionis, David; aliquanto tempore noctes totas, postea maiorem noctium partem pervigilavit orando & plorando. Sic autem oravit, ut orationis ardor largissimas ei lacrimas excusserit; ita ploravit, ut lectum non tantum leviter tinxerit; sed ita, ut lacrimis nataret, madefecit. Ardens oratio, vehemens sanè ploratio: Hinc illæ regis sanctissimi pervigiles meditationes, quarum ipse certissimus testis: Meditatus sum, inquit, nocte cum corde meo, & exercitabar, & scopebam spiritum meum. *b* Velut scopulis, inquit, rasoriis pectebam & verrebam cor meum &

& conscientiam meam. Perinde ut mulier illa Christi penicillo depicta lucernam accendit, domum everrit, & perditam drachmam quæsit: *a* ita David: Meum, inquit, animum penitissimè scrutatus sum, ut latente in eo veritatem reperirem. Quo autem tempore hoc solitus est tacere Rex David? Mediâ nocte surgebam, inquit, ad confitendum nomini tuo. *b* Et nox illuminatio mea in deliciis meis: *c* Deliciæ Davidis, esse & agere cum Deo. Ab hoc lumine accepit lumen: Nox illum fecit videntem. Ita sanè dixerit, qui ferè rationem cum Deo disputat noctu: Nox illuminatio mea. Ad hanc lucernam se penitissimè pervidet.

En, causarum quàm abunde satis, cur factaque & dicta omnia noctu remetienda, cur omnes conscientiae latebræ intimique recessus inspiciendi. Beatus, qui vigilat quotidie super custodiam gregis sui. *d* Subinde patri, qui liberos malâ disciplinâ depravat, dicitur: Filios tuos, mi Pater,

O 4

ter,

*a* Luca 15. 8. *b* Psal. 118. v. 62. *c* Ps. 138. v. 11. *d* Luc. 2. v. 3.

ter, ad meliores mores ipſus erudi,  
ne alii hoc facere cogantur: Ita cui-  
vis hominum dicendum; Teipſum  
doce, teipſum judica, teipſum puni  
& caſtiga, ſi à Deo puniri noliſ & ca-  
ſtigari. Non enim, quod Nahum di-  
xit, conſurget duplex tribulatio. •  
Neque Deus, quod Theologiæ ſciturum  
eſt, puniet biſ in idipſum. Imò Cy-  
priano fidejuſſore, nec biſ in idipſum  
judicabit. *b* Verum ſi noſmetipſos  
dijudicaverimus, tantum abeſt ut ju-  
dicandi à Deo ſimus, ut cum eodem  
Paulo aliorum etiam judices ſuo tem-  
pore ſimus conſtituendi. *c*

*a Nahum. c. 1. v. 9. b Cypr. ſerm. de paſſ. Dom. c 1 Cer. 6. v. 2.*

## C A P U T XV.

*Conſcientia bona quomodo ac-  
quirenda.*

**V**Eteri jaſtatur verbo: ſui cui-  
que mores fingunt fortunam.  
Ita Cornelius Nepoſ in vita Pompo-  
nii Attici: Fortunam, inquit, quiſque  
ſibi ſuis fingit moribus. Prout opi-  
fex, ita & opus eſt. à ſtatua noſces  
ſtatua-



statuarius. Prout quis sapit, ita multum aut minus promovet. Plautus in Trinummo: Sapiens, ait, ipse sibi fortunam fabricat. Quod prisce de fortunâ, nos multò æquius adferemus de conscientia. Conscientiam quisque sibi suis fingit moribus. Qualem quis agit vitam, talem & habet Conscientiam. Si pia est vita, læta hilarisque est Conscientia. Si vita est fœda, deses, vitiosa. Conscientia pariter exulcerata, tristis, & inquieta. Christianus ipse sibi fingit conscientiam.

Quâ verò arte fingenda sit melior conscientia? an non certo tractanda modo? quæstio non erit inutilis. Nam quemadmodum Ceroplastæ ars callenda, qua ceram fundat; pictori qua colores misceat, ærario fusori qua metalla temperet: ita Christiano excogitandum est artificium quo conscientiam tranquillet, ac in dies perficiat. Et de hoc ipso jam ageinus.

## SCRIPTURA.

*Optimum est gratiâ stabilire Cor.*

*Hebr. 13. v. 9.*

## PICTURA.

*Columba in aquâ limpida velut in speculo cernens supervolantem  
Milvum.*

**D**Ivinus Paulus artificium tradens solidandæ conscientiæ: optimum est, inquit, gratiâ stabilire cor. *a* Quo tandem modo? Non escis, ait, quæ nihil profuerunt ambulantibus in eis. Quod ergo firmanentum pectoris est? Angelorum testimonio. *Bona Voluntas est.* Hoc primum est artificium stabiliendi cordis, & conscientiæ ad teneritudinem educandæ. Porro *Voluntas bona* in eo versatur. ut homo non solum animo velit; quæcunque agit, ad amissam voluntatis divinæ agere, sed etiam conetur, & operam det, ac laborem ad hoc conferat, ut quod vult, in opus prædeat, possitque quovis momento dicere: Domine

Domine tu scis, me ferò velle secundum sanctissimam voluntatem tuam omnia facere. Inde oritur, ut homo tam Bonæ voluntatis omnes actiones suas quas vel leviter habet suspectas, applicet ad hanc regulam: Num istud, & istud etiam, & illud quoque ad divinam voluntatem est? sin aliter esse comperiat, flectit actionem & emendat, dum ea divinæ Voluntati exactè respondeat; uti fidicen tam diu fides intendit, remittitve, dum musicæ legi adsonent. Hæc Voluntas bona quietam & verò etiam lætam servat conscientiam. Absque hac bona Voluntate varia mœroris causa sæpius se prodet, in homine etiam probo. Nec enim ullus tam eruditus sui magister, ut sine quotidianis nævis sit: quos sanè tantò clarius cernet, quantò Conscientia purior existit. Quò autem quis acutius suas intuetur maculas, tantò majorem inde contrahit tristitiam & animi dejectionem. Hinc optimorum nonnunquam hominum voces illæ pusillanimes & pavidæ: Nihil proficio, in dies deterior fio, nihil emendo;

do; actum ago. Hic bona se se Voluntas ingerit, solatur, erigit hunc in modum: Tametsi non omnia, dum vivis, ad exactissimum perpendiculum facias, nec facturus sis, tu tamen tibi conscius es Bonæ Voluntatis, nunquam petulanter abjectæ. Angelorum carnem non ignoras: Et in terra pax hominibus bonæ voluntatis *a* suprà, meliore loco erimus sine nævo, pares Angelis, Christo affirmante. Et erunt sicut Angeli Dei. *b* Hic etiam num calcamus lutum, quid mirum si pedes inquinemus, & referamus luteos. Idcirco Christus in suprema cena: Qui lotus est, inquit, non indiget, nisi ut pedes lavet. *c* Mortales sumus, & quidem fragiles admodum, atque caduci & imbecilles. Tu perge; sed ita, ut quotidie Bonam Voluntatem in te restaures. Pax tibi erit, si Bona voluntas non defuerit. Propitium semper habebis Deum, si idem semper quod Deus vult, & tu velle fueri conatus.

Affyrius Naaman jam Lepra, qua  
tene-

enebatur, curata, statuit omnino facere, quod juberet Deus, nec iis amplius, quibus idololatra erat obnoxius, vitiis indulgere. Bona prorsus voluntas, & tenerioris conscientiae principium. Mox enim Naamam Elisæo stipulata manu promisit: Non faciet ultra servus tuus holocaustum aut victimam diis alienis, nisi Domino. *a* En Conscientiam strictam & tenebram. Mox & Conscientiae ambiguitates proponens: Quando ingreditur Dominus meus, inquit, templum Remmon, ut adoret, & illo innitente super manum meam, si adoravero in templo Remmon, adorante eo in eodem loco, ut ignoscat mihi Dominus servo tuo pro hac re. *b* En Conscientiae casum, ut vocant, non levem. Rex meus, inquit, cum idoli ædem ingreditur, genua submittit, ego necessario idem facere cogor, cum mihi innitatur. Quid hîc agendum, ne Deum offendam? Vade in pace, ait Elisæus; quo dicto religionem homini exemit. Antea Naaman conscientiae

*a* 4. Reg. cap. 5. v. 17. *b* 4. Reg. cap. 5. vers. 18.

entia laxissimæ, saltuosus, idololatra, ambitiosus, impatiens, indignabundus parabat abitum momento. Jam totus alius religioni habet in æde Remmon, officii causa se inclinare. Hanc Conscientiæ teneritudinem inducit bona Voluntas; primum arctioris Conscientiæ principium.

Alterum est, *Intentio recta*, quæ Bonæ Voluntati aliquid addit. Frequentissimum est, ut sibi quis optimum præfigat finem, nihilominus graviter impingat, & tam sibi quam aliis damno sit. Hic sæpe mœror & angor subit, vehemensque animi conturbatio: Sed suppetias veniens Conscientia & solatium instillans: En, summa fide, suggerit, optimoque animo hoc fecisti; certè neminem offendere voluisti, & tamen hoc indelatum est incendium, & pænè jam cælum minitatur ruinam. Verum non turbetur cor tuum, Deus & ego testes sumus, quòd nequiter non egeris. Hi duo testes tibi satis sint. Dicant jam alii quicquid velint, fremant & indignentur; quatiatur Orbis,

is, ruat cælum, feriat te ac sepeliat  
 æc ruina, modò innocentem, modò  
 intentionis rectæ tenacem.

Hoc sanè pacatam tranquillam-  
 ue servat Conscientiam : pax alio-  
 ui nulla erit animo, nisi sit pax ista.  
 res illi ab Oriente Dynastæ, qui  
 Christum recens natum salutaturi  
 enerant, tam Herodem quam om-  
 nem urbem, Hierosolyma, turbarunt.  
 uerint forsan, qui illis dixerint: Cur  
 non prudentius & circumspectius e-  
 istis, rebus antè certius exploratis?  
 At verò conscientia eorum Intentio-  
 e recta illos præclarissimè confir-  
 mavit, & constanter cæpta urgere  
 iussit. Hinc istæ illorum voces: *Ve-*  
*nimus adorare eum*; quid enim nos  
 possumus si Rex successorem metuat,  
 plebs novum sceptrum exhorreat;  
 non venimus turbare Herodem, nec  
 enimus commovere civitatem, sed  
 enimus adorare Iudæorum Regem,  
 Ubi est qui natus est, cuius stellam  
 vidimus? En rectissima Intentio, bo-  
 næ Voluntatis soror, & quietæ con-  
 scientiæ Mater. Tum demum ani-  
 mus quiescit, cùm sincere ac bona fi-  
 de

de rectaque Intentione agit.

Tarsentis Paulus cū venisset Ephesum, ut Lucas memorat, impleta est civitas tota confusione, & impetum fecerunt uno animo in theatrum, rapto Gajo & Aristarcho, Macedonibus, comitibus Pauli. Vo facta una est omnium quasi per horas duas clamantium: Magna Diana Ephesiorum. De turba autem detraxerunt Alexandrum propellentibus eum Iudæis. & Seditio horribilis. Hic Paulo quis objecerit: Quid agis, Paule? hoc urbis ingressu seditionem concitas. Cautius ac prudentius oportuisset hoc negotium aggredi. Cui Paulus jure responderit; Deus & Conscientia mea testimonium mihi dant de recta, quam huc attuli, Intentione; non veni turbas concitaturus, sed disciplinas Christianas traditurus. Recta pro me loquatur intentio.

Errores ejuscemodi crebriores sunt, in quibus septemplex elypei loco est recta intentio, quæ una & sola Conscientiam reddit pacatam.

Tertium est. *Beneficiorum divino-*  
a *Actor. c. 19. v. 29. & seqq.* rum



*in memoria.* Sed dixerit aliquis, quis tam assiduè alligetur Intentioni ectræ? Memor divinæ beneficentiæ. In promptu sit semper Catalogus, primò quidem communium, deinde & singularium beneficiorum. Dicat quisque sibi: Quid si natus fores in Turciâ, aut inter japones vel Sineses? quàm tu miser esses, ac deplorandus? nunc verò non tantum homo es, & homo liber, sed Christianus, & Catholicus. Adde jam singulalia Dei beneficia, vitam singulis momentis non solùm fervatam, sed insuper è tantis tamque crebris periculis, non corporis tantum sed & animi liberatam. Deinde quantum honorum dedit corpori, quod multis millibus non dedit, victum copiosum, amictum lautum! quantum animo gratiarum & donorum contulit? Non fecit taliter omnino nationi. Et nunquid saltem in die semel gratias ages de tantâ beneficiorum copia. Nimis hoc barbarum & planè impium est, nec semel quidem in die memorem sese ac gratum Deo sistere. Certe qui uno, aut pluribus horum

destituti sunt beneficiis, non semel, sed sæpius interdum suam cum gemitu indigentiam testantur. Quanto magis meminisse deceret suæ felicitatis tam largiter donatum?

Novimus qua ratione vates Hebræus Nathan Conscientiam regis Davidis adulterio ac cæde conspurcatam, divinorum beneficiorum memoria expiaverit, hunc in modum: Hæc dicit Dominus Deus Israël, ego unxi te in regem. Memento domine mi Rex, te juvenem pastoritium & opilionem fuisse, nunc esse regem, qui pro vili tugurio instructissimum palatium; pro pileo stramineo coronam auream; pro pedo ligneo sceptrum gemmatum acceperis; pro rusticana sponfa Domini tui conjuges; Et si parva sunt ista, adjiciam tibi multò majora. *a* Quare ergo contempsisti verbum Domini, ut faceres malum in conspectu meo? animi prorsus ingrati argumentum exhibuisti. Asperior hic pressus ita perculit regem, ut deinceps conscientiam accuratissimè coluerit, benefico Numini mirè gratus:

gratus : Hinc illæ voces : Misericordias Domini in æternum cantabo, in generationem & generationem. *a*

Quartum ; *Libertas Sancta*. Sapiens Periander interrogatus quid esset libertas ? Recta , inquit , Conscientia. Perinde ac si diceret ; effectus ab illâ causa. Porro ad libertatem spectat, uti Bernardus arbitratur, habere peccati odium , & mundi contemptum. *b* Sunt qui peccatum ode- rint, sed nondum contemnant Mun- dum. Agere in Mundo , & Mun- dum contemnere , negotium diffici- le. Sed bono animo, contemptus iste sic accipiendus est , ut animus huma- nus suam non ignoret libertatem , nec ab ullo mortalium ita pendeat ut eo subtracto vitam censeat intolera- bilem. Homines animi pusillitatio- nes nobiscum ipsi nonnunquam ita putamus : Si Patronus iste me dese- rat, si favor illius me destituat , si ne- gotium istud non succedat, si mea me- expectatio fallat, actum est, perii.

Quid, ais, homo timide ? nequa- quam ita ratiocinandum. Nam etsi

P 2

amici

*a* Ps. 88. v. 1. *b* Bern. de inter. domo. c. 13.

amici deserant, spes fallat, vota illudant, Mundus totus decipiat, omnia sinistrè cadant, neutiquam abjiciendus est animus. Etiamnum Deus gubernat, & singula vitæ momenta suis dispensat nutibus, à quo tantò plus auxilii sperandum, quantò minus ab hominibus potest expectari. In his omnibus liber sit animus qui bonâ sese tueatur Conscientia.

Christus discipulis trepidantibus animos addens: Confidite, inquit, ego vici Mundum. *a* Jam domitus, jam victus, jam prostratus est, jam jacet; vos calces in illum elidite, nec opus machinis robustioribus. Contemptu Mundus optimè triumphatur. Nec enim nocere potest nisi nocumentum amantibus. Eximiè Augustinus hanc animi libertatem commendans: Quid mihi prodest, inquit, si me continuis laudibus totus Mundus attollat, si Conscientiam mordat veritas criminis? Nec malam Conscientiam sanat præconium laudantis, nec bonam vulnerat opprobrium conviciantis. *b* Hac

*a* Io. c. 16. *b* Aug. tom. 7. contra litteras Pcciliani Donatista c. 7. miki pag 127.





Hac animi libertate Conscientia bona incredibiliter juvatur. Nec enim curat homo erecti spiritûs se fatuum censerî, imò ipse se talem in plurimis censet, interim sapiens & liber est, cum judiciorum ejuscemodi & sermunculorum possit esse contemptor.

Nostro Ævo Londini in Angliâ, primarius ludi moderator, qui Sebastianus audiit, comœdiam dedit spectante Reginâ Elisabetha. Miro plausu excepta est actio: Jussus ergo gratiæ aliquid sibi postulare. Quibus ille: Regiæ liberalitati, ait, gratias ago maximas, nec alio quam libertate Conscientiæ donari velim, quo mihi liceat religionem Catholicam impunè sequi, ac profiteri.

Enimverò Conscientia, non carnis, sed Spiritûs libertate gaudet. Suavis quidem est libertas carnis, sed letalis. Hæc disciplinam odit, frenos excutit, imperia spernit, ad libitum agit omnia. Jucunda est hæc libertas, sed pessima. Ea sectanda est, quâ libertate nos Christus liberavit.

Jam à *Circumcisionis* austerâ lege, & ab aliquot centuriis veterum præceptorum sumus liberi, & gratiis quam plurimis dotati. Sufficiat nobis hæc libertas. Illa quæ carnem ab obsequiis & servitiis liberat, servitus est deterrima. Erectæ mentis libertatem amat Conscientia.

Quintum Conscientiæ bonæ adjuvmentum; *Celestium explorator Spiritus*. Cum populus Hebræus ex Ægypto jam liber per vastissimam solitudinem iter converteret ad terras fertiliores, Dux populi Moses exploratores misit, per meridianam plagam, ut considerarent terram & terræ incolas, num pauci numero an multi; fortes an infirmi; ipsa terra, bona an mala; urbes quales, murtæ an absque muris; humus pinguis an sterilis; nemorosa an absque arboribus. Cum illuc pervenissent exploraverunt terram undequaque; delati demum eo itinere in Hebron ad torrentem Botri, ubi absciderunt palmitem cum uva sua, quam viri duo portaverunt in vecte. Ita omni regione lustratâ redierunt ad Moysen, dixe-



dixeruntque : Venimus in terram ad quam misisti nos , quæ revera fuit lacte & melle , ut ex his fructibus cognosci potest. At verò Iosue & Caleb , qui & ipsi lustraverant , terra , inquit , quam circuivimus , valde bona est. Si propitius fuerit Dominus , inducet nos in eam , & tradet humum lacte & melle manantem. Dominus nobiscum est , nolite metuere. Ita omnino Spiritus , quem cælestium exploratorem hîc appellamus , mittendus est in altum , ut beatorum cælitum regionem omnem consideret , voluptates expendat , delicias investiget , nectar & Ambrosiam gustet , destinatum sibi locum perquirat , cælum omne perambulet , rerum futurarum ac cælestium sit explorator , in sui ac conscientiæ bonum. Ita Bernardus ad hoc iter nos erudiens , Spiritus , inquit , à terrenis àversus ascendat ac visitet supernas sedes , currat per plateas supernæ Sion , audiat melos Angelorum , commendet se omnibus. <sup>a</sup> Ita Spiritus cæli peregrinator , tam visa quam au-

P 4

dita

dita in cælo recenseat conscientia.

Verum ad cæleste hoc iter maxime idoneus est Spiritus sui notitiâ imbutus. Clarevallensis Doctor iterum monens: Frustra, inquit, cordis oculum erigit ad videndum Deum, qui nondum idoneus est ad videndum seipsum: prius enim necesse est, ut cognoscas invisibilia Spiritus tui, quàm possis esse idoneus ad cognoscenda invisibilia Dei. Et si non potes cognoscere te, non præsumas apprehendere ea, quæ sunt supra te. *a*

Hoc itaque Conscientiam puram incredibiliter exhilarat, animo frequentius in cælum ire. Et obsecro, Christiani, quis nostrum seriò possit esse tristis, si bonam habeat Conscientiam, & mente sæpius ad cælum conficit viam! Hebræi exploratoris Calebi verbis hîc utor: Ascendamus & possideamus terram, quoniam poterimus obtinere eam. *b* Ascendamus animo, dum sequi liceat & corpori. Ascendamus in regionem viventium. Hanc viam nobis nulla inter-

intercluserit calamitas. Ascendendo non fatigabimur. Tamen sunt, qui deambulationibus ita impensè oblectantur, ut eos magis aurâ quam cibo victitare putes: malunt enim eduliis genium suum, quam corpus assuetis excursibus fraudare; sæpe ad secundam, non rarò post sublatam illam etiani mensam rure primum revertentes. Quid ni suæ sint etiam nobilissimo animo, tam arctè, tanque miserè habitanti, decentes evagationes? quid nî quotidianæ, quid nî horariæ? cum & magis expeditæ sint illis corporeis, minusque laboriosæ; & quod caput est, plus quam dici possit, quæstuosæ ac salutare. Animus ad ardua & excelsa non anhelat, neque lassatur locorum intervallis. Non enim movetur anima pedibus ait Augustinus sed affectibus. *a* Excurramus, exploremus.

*a Aug. tr. 48. in Ioan. circa initium.*

## CAPUT XVI.

*Signa Conscientiæ bonæ, sive purgatae.*

**D**ialis Flamen religionibus obstrictus porrum non solum non edebat, sed nec quidem tangebatur. Mysterii, dices, an valetudinis causa? utriusque; maxime mysterii. Porrum inflat, fumos in caput submittit, lacrimas ciet, oculis perniciosum, nonnunquam & vitæ. Plinius enim Major de porri succo commemorans: Fama est, inquit, quod Tiberius vocarit Melam Equitem reum ex procuratione, is in summâ desperatione porri succum ad trium denariorum argenteorum pondus hausit, & confestim expiravit sine cruciatu. Quando igitur sacerdotis est, tam oculis quam intelligentiâ valere, porrum sacrificulis illis vitandum fuit.

Christianorum Deus, Rex summus maximam Sacerdotum suorum curam gerens: Quia tu scientiam  
repu-



## SCRIPTURA.

Gloria nostra hæc est, testimonium  
Conscientiæ nostræ 2. Cor. I.  
vers. 12.

## PICTURA.

Quidam ingenuus, cujus vultus non  
cernitur, ante se Christum habet in  
botro crucifixum, dextrâ tenet facem,  
sinistrâ cranium spinis coronatum.  
Ad pedes sphaera, dextra chelys, læ-  
vâ liber apertus.

PRIMUM Bonæ Conscientiæ signum  
Circumspectio quam fax ardens in-  
dicat. In sacris voluminibus, homi-  
nes cautæ ac teneræ Conscientiæ vo-  
cantur *Timorati*. Ita Beatus Lucas  
de Simeone sene Christum ample-  
xante: Et homo iste justus, inquit, &  
timoratus, expectans consolationem  
Israël, & Spiritus Sanctus erat cum  
eo. *a* Idem beatissimus Lucas huma-  
ni Angeli iusta funebria describens:  
Curaverunt, inquit, Stephanum viri  
timorati. *b* Optimus Pauli magister  
Ana-











Ananias, vir timoratus, ab eodem  
Lucâ nominatur. Conscientia cau-  
criata & surda hoc titulo gaudere  
non potest, nec enim circumspectè  
ut verecunde agit, sed seipsam in-  
citans: Audeamus hoc, inquit, & rem  
in casum demus, quid oblit? Hanc  
propter viam notans Salomon: sapi-  
ens, inquit timet & declinat à malo;  
tultus transilit & confidit. *a* Homo  
præfractus & audax amussim excu-  
it, nequitas comminiscitur, liberè  
delinquit absque metu, & veluti c-  
quus cæcus in fossas præcipitat, nec  
ante deliberat, casurus, an non casu-  
us sit, sed in vetitum ruit, prout di-  
ctat impetus periculorum & exiti  
contemptor. At verò sapiens flectit  
impetum à flagitio, cautè ac circum-  
spectè incedit necubi cadat. Bona  
conscientia est timorata, nec pericu-  
um amat, suspenso graditur pede.  
Ejus circumspeditionis reverâ Paulus:  
Nihil, inquit, mihi conscius sum, sed  
non in hoc justificatus sum. *b* Etsi  
purum me à flagitiis existimem, non  
continuò tamen sanctimoniam mihi  
vindi-

*a* Prov. 14. v. 15. *b* 1. Cor. 6. 4. v. 4.

vindico. Hæret formido latentium  
 ævorum. Hinc cautelæ sanctiores  
 Alterum bonæ Conscientiæ sig-  
 num, *Geminata fiducia*, quam Chri-  
 stus ad botrum fixus adumbrat. Ad  
 eam Joannes Apostolus Christiano  
 erigens: Charissimi, ait, si cor no-  
 strum non reprehenderit nos, fiduci-  
 am habemus; & quidquid petier-  
 mus, accipiemus ab eo. *a* In homine  
 bonæ ac animosæ conscientiæ du-  
 plex, in aliis quasi simplex confur-  
 git: nec enim in iis solum quæ ad  
 Deum spectant, sed etiam in rebus  
 humanis quibuscunque tantam Con-  
 scientia suggerit fiduciam, ut suum  
 quis hostem eligat in judicem.

Cato Major, quod Valerius narrat,  
 aliquoties dicto die in jus vocatus,  
 causam nunquam non obtinuit. In  
 eam demum fiduciam à suâmet in-  
 nocentia est erectus, ut cum denuo  
 ad tribunal in judicium publicè vo-  
 caretur. T. Gracchum, pro judice po-  
 stularet, quem constabat capitalem  
 esse hostem Catonis. Fiducia ingens!  
 sed sanctior erit ea, si quis Christiani

san-

anguinis Christi verbis serió se tueri  
 possit ac dicere fuisset hominibus :  
 Quis ex vobis arguet me de pecca-  
 to ? *a* Vos quidem quotidie actiones  
 meas omnes ex insidiis arbitramini.  
 Sed enim si quid habetis dicere , vos  
 me statuo iudices , audacter dicite,  
 non est quod parcatis huic capiti.  
 Vos mihi esse inimicissimos vestra  
 vobis Conscientia dicet : Sed effun-  
 dite fel quod collegistis , hoc imbre  
 non terrebitis innocentem. Hac tali  
 fiducia Paulus assiduè nixus , præci-  
 pue cum à Tribuno Iudæis sistere-  
 tur : Viri Fratres , agebat , ego omni  
 conscientia bona conversatus sum  
 ante Deum , usque in hodiernum  
 diem. *b* Bonæ Conscientiæ signum  
 fiducia.

Tertium, *Serenitas animi & Tran-*  
*quillitas*, quam Mundi globus ad ho-  
 minis pedes abjectus significat. De  
 tranquillitate hac Jobus : Et scies,  
 quod pacem habeat taberna-  
 culum tuum. *c* Serenum tibi & in-  
 tebe fulgebit cælum , quieto licebit  
 esse

*a* Io. cap. 8. vers. 46. *b* Acton. cap. 23.  
*c* Job c. 5. v. 24.

cuius intus & lato; pax enim tam alta implebit pectus, ut culeum gallo, serpente, simiâ, cane, animantibus farum non sentias. Xenophon cuiusdam maledicenti: Tu quidem, m'amice, inquit, maledicere didicisti, ego autem conscientiam teste, didici maledicta contemnere. Hoc fedat Hominis artificium est, sentire morfus, sed neminem remordere.

Sed illustrius tranquillissimę Conscientię paradigma præbuit princeps Apostolorum Petrus. In Herodii carcere attinebatur, geminis catenis vinctus, utrinque milite septus, capite damnandus, & altero quidem die ducendus, extremo supplicio perimendus. Et tamen inter catenas & milites, fatali gladio iam imminente dormit Petrus securissimè, tanquam postridie ad epulum saliare iturus; ipso facto exhibens, quàm verum illud Salomonis: Non contristabis iustum, quicquid ei acciderit. b Thomas Morus, vir summus, quaquã illum spectes, sententiã mortis pronun-

a Du singst wie dir der Schnabel gewach-  
sen ist. b Prov. c. 12. v. 21.

nunciata theatrum fennale jam con-  
 censurus, quia pedibus laborabat,  
 carnificem affatus: Heus, inquit, mi  
 vir, ascendenti manum porrige, &  
 gressum firma; in descensu id opis  
 non exigam. Cumque carnifex veni-  
 am attactus peteret, & imperii faci-  
 endi: Ne tu, inquit, sollicitus sis; id  
 autem vicem tuam doleo, quod col-  
 um mihi sit brevius, non ita com-  
 modè feriendum. Jamque ad ictum  
 excipiendum paratus: Ego Fratres  
 contestor, ait, me & fidelem regi, &  
 servum Dei, & in fide Catholica mo-  
 riturum. Ita flexis genibus, ingemi-  
 scente omni populo & lacrymante  
 coepit precari: Miserere mei Deus se-  
 cundum magnam misericordiam tu-  
 am: Psalmo ad finem recitato, ala-  
 criter surgens auream monetam spi-  
 culatori donavit, sibi ipse oculos ve-  
 lavit, atque sic demum lætus cervi-  
 cem præbuit securi. En quam cit-  
 cumspecta, & confidens, quam tran-  
 quilla est bona Conscientia!

Cum eodem hoc generoso Mar-  
 tyre Joannes Roffensis Antistes An-  
 glus supplicium dedit nocte ante  
 Q diem

diem supplicii proximâ suavissimè dormivit in multam lucem, lac mane petiit in jentaculum. Jam ducendus canere cæpit: Te Deum laudamus, Te Dominum confitemur. Ita lætus ac hilaris supremæ necessitati sese attemperavit. Vtrumque hunc tam eruditum quam sanctum virum ad Gemonias has scalas, in lugubre theatrum illud perduxit Conscientiæ libertas: si imperiis regiis, sed iniquis voluissent subscribere, vixissent.

Ita prorsus Conscientiæ probæ serenitas nullis adversorum turbinibus obnoxia, sed nec morte ipsâ turbatur. Hunc nostrum aërem magi & anas veneficæ, & mulieres imbrificæ, pluviarum ac tempestatum potentes, per magicum murmur imbribus & tonitru ciere possunt; tranquillæ conscientiæ serenitatem nec Saga, nec Magus, nec Pharmaceutria, nec præcantatrix, nec venefica, neque trivenefica, sed nec Diabolorum ulli turbare possunt, si homo mentis serenæ nolit.

Veteris Stoæ placitum fuit: Agnata, & quasi soboles virtutis est, gau-



gaudium & serenitas mentis. *a*

Quartum est, *Modesta mentis securitas*, quam cranium spinis redimitum repræsentat. Discipuli Christi inter procellas & fluctus maris adverso vento navigantes, supremum sibi periculum imminere atque agi de vitâ censuerunt: at Christus securissimè dormivit, quo conscientiæ securitatem inter grandines, tonitrua, turbines, fulmina expressit. Defluat cælum, ruat Orbis universus, sua Conscientiæ puræ securitas non peribit. Notum illud de pulvinari, cujus emptorem sese Augustus Imperator constituit. Nam postquam audiit equitem Romanum obisse; qui moriens ducenties H S. seu, quingenta millia Philippeorum in nominibus habuerit, & securè nihilominus dormire potuerit, pulvillum hominis sibi emi jussit Imperator, pellen-  
dis curis & somno conciliando. Vbi pia Spiritus securitas, illic pulvinar istud est, quod & argumentum est sinceræ ac candidæ conscientiæ.

Q 2

Sed

*a Vide Lipsii Manuductionem ad stucam Philosophiam l. 3. c. 5.*

Sed illud non nesciamus, ô Christiani, Conscientiam circumspectè securam esse, uti dicere solebat Thomas Morus, qui fronte serenatâ hilarique vultu ad mortem contendit, & suas sibi exequias ivit, nihilominus psalmum, poenitentiae scriptum, recitavit. Ita conscientia non oscitans, non negligens, non incuriosa est; curat illa rem spiritûs, non torpidè secura, sed in periculis & adversis impavida. Ita Rex David turbarum & discriminum securissimus cantat: a dextris est mihi ne commovear: propter hoc lætatum est cor meum. a Me suscepit dextra tua, ipsi verò in vanum quæsierunt animam meam. b Cadent à latere tuo mille, & decem millia à dextris tuis; ad te autem non appropinquabit. c Ærumnosus & afflictus homo seipsum sic alloquitur: Quid angeris frustra? Nemo læditur nisi à seipso: Quis est qui tibi noceat, si bonus æmulator fueris? d Non est in orbe malum, nisi solum peccatum. Adversa non sunt mala, nisi malis.

a Ps. 15. vers. 8. b Ts. 62. vers. 9.  
c Ts 90. vers. 7. d 1: Petr. 3. v. 13.

lis. Tuam cum divinâ voluntate conjungas, & inferorum portæ non prævalebunt adversus te. O vita secura, ubi Conscientia est pura!

Quintum *Hilaritas animi & lætitiæ*, quam chelys designat. Beatissimus Paulus latrantem ferebat stomachum, corpus vestimentis malè intectum, livore & vibicibus plenum, lapidum & virgarum vestigiis insignitum tergum; siquidem ter virgis cæsus, semel lapidatus, ter naufragus hostibus & insidiatoribus vallatus, itineribus, periculis, laboribus assiduus, attritus, ærumnis & afflictionibus exhaustus, quotidie pæne mortuus, nihilominus exclamat: *Superabundo gaudio.* *b* Serione hoc dicit, an joco? Et qui fieri potest, ut aliquis in tanta luctus & mœroris copiâ superabundet gaudiis? Respondet pius & vetus scriptor: Nemo securè gaudet, nisi bonæ Conscientiæ in se testimonium habeat: Habe bonam Conscientiam, & habebis semper lætitiâ. *a* Glo-

Q 3

ria

*a* 2. Corinth. cap. 7. vers. 4. *b* Thomas de Kemp. l. 1. de Christi imit. cap. 20. & l. 2. cap. 6.

ria nostra hæc est testimonium conscientiæ nostræ. *a* Romanus sapiens Annæus hanc hilaritatem animi sæpissimè inculcans : Hoc, inquit , ante omnia fac mi Lucili, disce gaudere: nolo tibi unquam deesse lætitiā: Volo illam tibi domi nasci; nascitur, si intra te ipsum sit. Animus debet esse alacer, & super omnia erectus. Hæc quibus vulgus delectatur, tennem habent ac superfusoriam voluptatem. Tu ad verum bonum specta, & de tuo gaude. Quid est autem hoc? De te ipso, & optimâ tui parte. *b* Prædixit Christus: Et gaudium vestrum nemo tollet à vobis: *c* Gaudium purum, durabile, liquidum, sincerum. Gaudium quod tolli potest, gaudium verum non est. Hic obsecro, seipsum quivis suamque conscientiam interroget: Dic sodes, quænam illa sunt, quæ tibi placent, quæ gaudium & voluptatem pariunt? Num pecunia? potest eripi. Num dignitas & grande nomen? potest eripi. An opulentum munus & officium?

*a* 2. Cor. c. 1. v. 12. *b* Seneca epist. 23.  
*c* Ioan. c. 16.

cium? potest eripi. Num suppellex lauta, familia ampla, domus instructa? Hæc omnia possunt eripi. Num Uxor formosa, liberi bene morati? possunt mori, & morientur. Num Musica, num venationes, num pictura, num recreationes aliæ? possunt auferri hæc omnia, & auferentur. Hæc ergo gaudia prorsus omnia quæ tolli possunt, gaudia vera non sunt. Verissimum optimumque gaudium est, animi Deo se oblectantis, & Conscientiæ suâ tranquillitate sibi gratulantis. Quæ Chrysostomus confirmans: Nihil, inquit, suavius bonâ Conscientiâ, bonâ spe. *a*

Sextum conscientiæ bonæ indicium, *Amor lucis & publici* quem liber apertus connotat.

Tecta, suspecta. Esca operta *b* non properè laudanda.

*Aliquis latet error, equo ne fidite Teucris.* *c*

*Cautus enim metuit foveam lupo, accipitèrque,*

Q 4

Suspe-

*a* Chrys. tome 5. hom. 63. mihi pag. 347.  
*b* Berdeckts Essen muß man nicht zu fröhlich loben. *c* Virg. 2. *æneid.*

*Suspectos laqueos, & opertum mil-  
vius hamum. a*

Bona Conscientia nullius oculos  
fugit: *b* Aperto vivit, & actionum  
suarum testem advocat solem. Vale-  
rius candorem veterum laudans:  
Maximis viris, inquit, prandere &  
coenare in propatulo verecundie non  
erat, nec sanè ullas habebant escas,  
quas populi oculis subicere erubescerent.  
Erant autem adeò continen-  
tiæ attenti, ut frequentior apud eos  
pultis usus quam panis esset, *c* Cer-  
tissimam hac in re Christus regulam  
tradens: Omnis, inquit, qui malè  
agit, odit lucem, & non venit ad lu-  
cem. *d* Cur obsecro rem omnium  
amœnissimam habet exosam? Vt non  
arguantur opera ejus. Qui facit  
veritatem, venit ad lucem, ut mani-  
festentur opera ejus. *e* Hinc bonæ  
mentis homo conscientia rimulas  
omnes aperit ei Sacerdoti, cui eam  
committit persanandam: Si posset,  
veluti librum explicatissimum pro-  
pone-

*a* Horat. ad. Quintilianum l. 1. ep. 1<sup>a</sup>. *b* Hier.  
epist. 47. *c* Valer. l. 2 c. 1. *d* Ioan. cap. 3. v.  
20, & seqq.

poneret, in quo non solum voces sed & syllabas, & characteres, ac literulas, sed & ipsa punctula est videre.

Qua de re Seneca eximiè philosophatus: Tunc, inquit, felicem te esse judica, cum poteris in publico vivere, cum te parietes tui tegent, non abscondent, quos plerumque circumdatos nobis judicamus, non ut tutius vivamus, sed ut peccemus occultius. Rem dicam, ex qua mores æstimes nostros, vix quemquam invenies, qui possit otio aperto vivere: janitores Conscientia nostra, non superbia opposuit. Ita vivimus, ut deprehendi sit, subito aspici. Quid autem prodest recondere se, & hominum oculos auresque vitare? (Dei non possumus cernentis & audientis universa) Bona Conscientia turbam advocat, mala etiam in solitudine anxiosa est. Si honesta sunt, quæ facis, omnes sciant; si turpia, quid refert neminem scire, cum tu scias ò te miserum, si contemnis hunc testem! *Li-*  
*vius Drusus domum habuit omnium pro-*

prospectui patentem. Huic architectus promisit quinque talentis, seu tribus millibus Philippcorum, ita mutaturum ædes illas, ut neminis conspectui paterent. Cui Drusus; mi Magister, inquit, si quid in te artis, decem à me talenta accipe, & meas ædes ita construe, ut nullius inspecturi oculum excludant; sciant omnes, quid ego domi meæ faciam. Nimirum qui facit veritatem, venit ad lucem, ut manifestentur opera ejus. Bona Conscientia aperto vivit ostio, & turbam advocat. Ita luculentum Conscientiæ bonæ argumentum est, Lucis & publici Amor. Quisquis hæc sena in se signa, aut saltem aliqua deprehenderit, stet animo, bellè est ejus Conscientiæ. Conscientia ut os populi cælestis mereatur, sit Circumspecta, Confidens, Tranquilla, Secura, Hilaris, & lucis cupida.

## CAPUT XVII.

*Signa Conscientiæ perversæ.*

**P**hilosophus è porticu, Diogenes dicere solebat, fieri non potest, ut



ut animus præsens, acer, & armatus sit, nisi sibi nullius facinoris sit conscius. Quo significabat animum fractum, languentem, perturbatum, pavidum, pusillum, malæ Conscientiæ esse supplicium. Ita prorsus est: Animus altus ampliusque, magnus excelsusque & pura Conscientia, optimi sunt amici & plerumque in una sede morantur: quemadmodum animus æger afflictusque & læsa Conscientia sub eodem ferè tecto, in uno plerumque stabulo reperiuntur. Pavor & perturbatio Conscientiæ contaminatæ sunt signa. De istis sex signis hoc capite agendum, uti proximo actum de signis conscientiæ bonæ.

## SCRIPTURA.

*Arguet te malitia, & aversio tua increpabit te. Hier. c. 2. v. 19.*

## PICTURA.

*Extincta fax super foraminoso cribro;  
Globus Mundi, juxta lepuscus &  
ariculæ; liber clausus, insidente  
noctua in virga viscata:*

**P** Rimum, inquinatæ Conscientiæ signum, *Inconsiderantia*. Deus olim de po-

de populo Hebræo maximè querebatur & sæpissime, quòd adeò incogitantes, incauti, homines nullâ cogitatione, cæci ruerent in vetitum nefas: Gens, inquit, absque consilio est, & sine prudentiâ. Utinam saperent & intelligerent, ac novissima providerent. *a* Utinam vel tandem oculos attollerent ac caperent, quam infanda sit audacia, Deum offendere, quanta peccati vel unici sit gravitas ac foeditas, quam neque geminata mors, neque inferorum cruciatus æterni unquam poterunt expiare. Ideò Alexander abbas juveni cetera bono, sed languido & desidioso in os obijciens: Si sollicitè, inquit, cogitares regnum cælorum & cruciatum æternum in cellâ tuâ, acediam non sentire. Nimirum iis otium est molestum: & horæ videntur longæ, qui annos æternos in mente non habent, & ideò diem decipere, tempus sermonibus fallere, & otium sterilissimis nugis consolari student. Neque mos iste, neque hoc ingenium est bonæ Conscientiæ. Habet ea semper boni sanctique

Etique aliquid quod consideret. Accurate, prudenter, cogitat atque agit omnia, & legem illam unice observat: Prius expende, quam aude. *a* Idcirco hic idem, quem dixi, Alexander abbas seipsum identidem extimulans ad progressum: Quanta, inquit, erit confusio tua, cum ceteri coronabuntur, te rejecto. *b* Non ante actioni, quam cogitationi facienda subjiciens, nil ante ausus, quam præmeditatus. Considerata & circumspecta est bona conscientia, ut supra demonstratum: inconsiderata, imprudens, & immeditata est mala conscientia.

Videte concilium in caput Christi convocatum. Cogitaverunt autem, principes Sacerdotum, inquit Ioannes, ut & Lazarum interficerent. *c* Aspiciite homines cæteroqui sapientissimos, quam inconsiderate, quam stulte consultant. Lazarum cogitant interficere, ut summam Christi auctoritatem imminuant; Miraculum revocati ad vitam Lazari nec negare

*a* Cherwigs / dann wags. *b* 40. Moschus 142. *c* Ioan. 12. 10.

nec poterant occultare. Ergo, ajunt, interficiamus illum. Mi Deus, qualis hæc conscientia? Augustinus inconsideratam hanc atque fatuam consultationem doctissimè irridens: Videte, inquit, quid invenerunt. Lazarum interficere cogitaverunt. *a* Stulta cogitatio, & cæca sævitia! Dominus Christus, qui suscitare potuit mortuum, non posset occisum? (*An eorum nemini hoc in mentem venit?*)

Quando Lazaro inferebatis necem, nunquid auferebatis Domino potestatem? Si aliud vobis videtur mortuus, aliud occisus? Ecce Dominus utrumque fecit, & Lazarum mortuum, & seipsum suscitavit occisum. *a*

Hæc autem Conscientia perversa considerare non solet, quod facc adumbravimus mortuâ. Prima illius nota, signum primum est Inconsiderantia.

Alterum, *Temeritas & laxitas*, quam pertusum ac perforatum cribrum ostendit. Pravæ Conscientiæ homo in omnibus suus ipse Pontifex est, religione se liberat, legisque

gra-

gratiam sibi ipse facit ad lubitum. Perinde, ut Lupus, (quod Apologi narrant) qui accusatus est maximæ stragis in pecore, maximè terrâ editæ. Doluit reus, & pœnitentiam pollicitus est seriam. Decretum ergo à Curiâ: Hæc mulcta ei esto: Omni omnino pecore quod terrâ occurrerit, abstineat; si quid aquis fluvialibus expiscatus fuerit, suum habeat. Hic infelix mæstissimas cogitationes volvens: Quid agam, aiebat ipse sibi. damnatus ad extremam pauperiem; fame pereundum erit. Dum hæc anxius secum agit, videt porcum in lacunâ sese volutantem: Et, hæc quidem aqua, inquit, non est fluviatica, sed jura sunt amplianda. Mox porcum invasit, & suum fecit lacerando, ac devorando. Ita prorsus Conscientia laxa & perversa secum ratiocinatur: Hodie quidem esurialis dies est, sed pisces ne mihi incommodent, cautio sit; insuper & stomachus dolet: Cæno igitur, nam jura sunt amplianda. Pari modo temeraria & laxa Conscientia philosophatur: Hodie quidem dominica aut festa dies est,

est, rem divinam & concionem frequentare lex jubet. Sed quid tum? una hirundo non facit ver, una concio neglecta, piaculum exile. Jura sunt amplianda. Euge; mea Conscientia, sic perge, ita proficimus.

Eodem modo datur exceptio. Hoc quidem quod accipio, meum non est, sed hunc hominem tam avarum, quam opulentum compilare quid flagitii est? jura sunt amplianda. Simillimum est istud lupi seu Conscientiæ praviæ vaframentum: Omnes quidem libidines sexto decalogi præcepto prohibentur, sed paulò liberius jocari, oculis licentiùs exspatiari, manum humaniùs extendere, quid refert? Cogitationes à teloniis immunes sunt, sive, quod alibi Vlpiani verbis diximus: Cogitationis poenam nemo patitur. Jura, præsertim stricta, sunt amplianda. Non impar laxitas Conscientiæ est ista: Omnes quidem fastum, superbiam, superfluum corporis cultum damnamus, sed mundis uti vestibus, quid vetat? Jura sunt amplianda. Ad hunc omnino modum vacationem legis laxitas Conscientiæ sibi ipsa per-

permittit in alijs sexcentis. Verum  
 quidem est, ajunt, hæc legis esse ver-  
 ba; sed littera occidit, Spiritus vivi-  
 ficat. Summum jus summa injuria;  
 nec legi nec juri contradicimus, sed  
 jura esse amplianda contendimus:  
 Solaphus innocenti impactus mul-  
 tam pendat, mendaci sit in præmi-  
 um. Urbana & hilaris temulentia in  
 amicorum gratiam leges divinas non  
 violat, jura sunt amplianda. Hujus  
 generis innumera sunt. O mi lupe,  
 legis & jurium observantissime,  
 quam pulchrè leges & jura interpre-  
 aris? Lupinum hoc ingenium pro-  
 fectò etiam Rex David induerit, cum  
 de solario domus regię in fœminam  
 lavantem oculos conjecit, ita secum  
 ratiocinatus: Ego quidem satis uxo-  
 rum habeo, sed illa Vriæ mihi sin-  
 gulariter placet, hanc volo, Beisabe-  
 am amo. Quis regi vertat vitio libe-  
 riores has nuptias, hoc tale connubi-  
 um? Ire, adducite illam. Hactenus  
 Vriæ fuerit, nunc mea erit uxor.

O David, David non ita tibi am-  
 plianda sunt jura; leges divinæ non  
 largiter explicandæ; nec reges

quidem seipſos religione excipiant. Hæc nimia Conſcientiæ & laxitas & temeritas eſt.

Tertium pravæ Conſcientiæ ſignum. *Inquies & perturbatio*, quam mundi ſphæra denotat. Homini malo non licet eſſe quieto. Aſſiduæ illum furia inquietant, exercent, vexant. Minatur olim Hieremias vates: Arguet te, inquit, malitia tua, & averſio tua increpabit te. *a* Certiſſimum, quod ſuprà diximus, malitia ipſa maximam partem veneni ſui bibit. *b* Non minus eleganter ac venuſtè Arbitr: Dii Deæque, ait, quam malè eſt, extra legem viventibus! quicquid meruerunt, ſemper expectant. *c* Nec aliter nos erudiunt ſacri codices noſtri; & cauſam reddit ſapientiæ liber his verbis: Semper enim præſumit ſæva, perturbata Conſcientia. *d* Qui ſe ipſum alicubi includit, clamat, tundit, pulſat dum liberetur: Ita is quem vinxit Conſcientia, non quieſcit, dum vinculis illis eximatur.

Hoc

*a* Hierem. c. 2. v. 19. *b* Seneca epist. 81.

*c* Satyricon Arbitri. *d* Sap. c. 17. v. 11.



Hoc Tullius perspicacissimè adverte-  
 tens: sua quemque fraus, inquit, su-  
 um scelus, suum facinus, sua audacia  
 de sanitate ac mente deturbat. Hæ  
 sunt impiorum furia, hæ faces, hæ  
 flammæ. *a* Virgas & flagra sibi col-  
 ligat homo improbus, quibus cæda-  
 tur. Inquietissimam hanc Conscien-  
 tiæ perturbationem Hieremias vati-  
 cinatus: servietis, inquit, ibi Diis ali-  
 enis die ac nocte qui non dabunt vo-  
 bis requiem. *b* Dii prorsus alieni,  
 affectus vitiosi. Pax nulla est, ubi ta-  
 lium Deorum multitudo imperat.

Quartum pravæ Conscientiæ sig-  
 num *Pavor & trepidatio* quam lepus-  
 culus vel levissimo strepitu territus  
 adumbrat. Nil certè timidius malâ  
 conscientia. Notum Mauritiæ Cæsa-  
 ris dictum de Phocâ milite: Si timi-  
 dus est, homicida est. Quod Nicetas  
 Choniates scitè confirmans: Timi-  
 da res est, inquit, improbitas, ac suo-  
 pte testimonio convincitur, & argu-  
 ente Conscientiâ nil boni expectat.  
 suam ipsius umbram exhorret homo

R 2 in-

*a* Cicero orat. in Pisonem. *b* Hier. cap. 16.  
 vers. 13.

inquinatæ conscientiæ. E vobis quæro, trifæclisenes; audistisne unquam, folii ab arbore lapsu, vulneratum hominis caput? Et tamen folium volans Conscientiam malam exterreret, quemadmodum suis prædixit Moses, dabo pavorem in cordibus eorum. Terrebit eos sonitus folii volantis, & ita fugient quasi gladium; cadent nullo persequente. *a*

Geneseos Historia de Caino refert; Posuitque Dominus in Cain signum. Quærunt hîc docti: qualenam hoc signum fuerit: Rabbini veteres ajunt fuisse canem semper præcurrentem, qui veluti præconis loco diceret: Carnifex & morticinorum tribunus est Cain; Fratrem occidit. Alii frontem stellantem, & Cainum fuisse stigmaticum censent. Alii severiorem & tristiore vultum seu vultuosam tristitiam, id extitisse signi censent: Plerumque omnes totius corporis tremorem designari, & Cainum ut populum nigrum tremuisse censent. Hinc ille de se ipso timidissimè; Omnis, inquit, qui invenerit me, occidet.

det me. *a* Mi Deus, in toto terrarum Orbe nullus præter ipsum & parentes fuit, quem ergo timet? seipsum suamque umbram. Hoc nempe sollemnissimum est peccato, peccantis auriculæ tintinnabulum aut nolam appendere, quæ usque, & usque tinniat, & hominem nonnunquam adigat pæne ad insaniam. Ideò si roges Chrysostomum, quid sit peccatum? Constanter dicet: Peccatum est spontanea insania, voluntarius dæmon.

Ergo Conscientiæ malæ, ut Tertullianus loquitur, comes perpetuus est pavor. Nullum enim maleficium sine formidine est. quia nec sine Conscientiâ sui. Non minus Christianè quam sapienter dixit Annæus Philosophus: Potest nocenti contingere ut lateat, latendi fides non potest. Quia latendi etiam si felicitatem habent, fiduciam non habent. Quia tuta scelera esse possunt, secura non possunt. *b* proprium ergo est nocentium, trepidare.

Ægyptiis in more positum fuit, eum parentem, qui filium occidisset,

R 3

cogere

*a* Gen. c. 4. v. 15. *b* Seneca ep. 97.

cogere ut triduo necati à se filii cadaver aspiceret. Levis mulcta, sed supplicium grande parenti. Rea Conscientia suum mortuum, delictum scilicet suum, assidue cogitur aspicere, dum mortuus revocetur ad vitam. Hebræus Rex clamat: Peccatum meum contra me est semper. *a* Ejus non possum oblivisci quod feci; Antigrapheum & antagonistam meum conscientiam meam, semper in oculis fero. Odi quod feci; in amaritudinem transiit quod credebam esse voluptatem. Fel esse merissimum deprehendo, quod Hyblæum mel judicabam.

Quintum malæ Conscientiæ signum *Angustia & afflictio* quam aviculæ visco hærentes repræsentant. Clarissimè beatus Paulus: Tribulatio, inquit, & angustia in omnem animam hominis operantis malum; gloria autem & honor & pax omni operanti bonum. *b* Homo vitiis assuetus eò devenit, ut Deum cum suâ conscientia, non verò suam conscientiam cum Deo velit esse conformem:

*a* Ps. 50. *b* Rom. c. 2. v. 9.

nem : Cuperet sanè pulchrum videri Deo , quicquid sibi suæque prævæ conscientivæ pulchrum est: Existimasti iniquè quod ero tui similis. 4

Absurdorum absurdissimum sit, si neditâ turri curator horologii cupit solem respondere suo horologio, non autem horologium suum soli : perversa res est , & ordo planè præposterus. Contrarium fiat. Protoplasti homines existimarunt severius illud edictum, de arbore scientiæ Boni & Mali non libanda , vel abrogandum, vel certè mitigandum, ideò pomum formosissimum liberius decerptum avidis dentibus non negarunt. Ah, miseri ! carò nimium stetit unicus hic morsus, & impendio voluntas neutiquam respondit. Mox tribulatio & angustia , mala simul omnia catervatim in gentem humanam irruerunt. Vix enim infixus pomo morsus , continuó erubescunt ; tegunt, fugiunt, pudent, dolent, nollent factum. Hanc illis angustiam & tribulationem læsa conscientia peperit. Verè spontanea insania, voluntarius dæmon est peccatum.

Horrendum illud, quod Regum fasti commemorant. Sennacherib homo blasphemus, qui Regem Ezechiam Regum optimum in angustias adduxit, & immenso exercitu depressum ivit, mox ipse nimium quantum depressus, sicam corpore suo excepit, quam in alium exacuit. Nam ubi deletis exercitu suo salutem fugâ infami quæsiit, domumque rediit, à suis met filiis duobus interfectus est. Cum adoraret in templo Nesroch Deum suum, ait scriptura Adramelech & Sarasar filii ejus percusserunt eum gladio, fugeruntque in terram Armeniorum. *a* En Nemesin Conscientiæ pessimæ atrociter insultantem! Filii jugularunt Patrem, & in ipso quidem templo, quod hominibus facinorosissimis asylum est, & in ipso idololatriæ scelere; (*Dum adoraret*) Commissâ cæde fugerunt filii, ut aliqua inter patrem & filios esset communicatio calamitatis. Ita peccatum vindicatum peccato. Quod Paulus epistolis luculenter docuit. Qui, ubi Timotheo suo præcepisset:







cepisset: Milites bonam militiam, habens fidem & bonam Conscientiam, addit: quam quidam repellentes, circa fidem naufragaverunt. Ex quibus est Hymenæus & Alexander, quos tradidi satanæ. & Et à Societate piorum repuli. En neglectus conscientie proximus est gradus ad secessionem & transfugium. Quapropter nemo miretur, si aliquem à religione turpiter defecisse audiat: Indaganti causam constabit, prius conscientiam quam fidem ab illo desertore repudiatam aut neglectam. Nam ubi quis incipit non amplius cælum, non inferos, non hominum novissima, sed carnalia, sed luparum formas, & pudenda spectacula meditari; ô salve, & vale, mi homo! conscientie neglectum comitabitur religionis propudium: jam antigraphi tui contentores, brevi fœdisfragus eris, & transfuga. Naufragabis à fide, & Vigiliam tuam impingens ad scopulum. Conscientie neglectus est certus morum & sæpe religionis scopulus. Qualia naufragia! Hinc

R 5.

angustia

angustia & tribulatio in omnem animam hominis operantis malum.

Sextum malæ Conscientiæ signum, *Odiū lucis & publici*, quod Noctua libro clauso insidens significat. Nequitia tenebras amat; Bona conscientia prodire vult & conspici. Diximus: Omnis qui malè agit, odit lucem, ut non arguantur opera ejus. Bona conscientia neminem rejicit inspectorem, nullum fugit judicem, omnes sui arbitros admittit: Conscientia mala tam inspectores, quam arbitros & judices formidat.

Si cadaver venustatis aliquid aut gratiæ haberet, non ita studiosè totum tegeretur. Vix homo expirat, mox strophio velatur vultus. Quid ita obsecro? Quia plurimum mutatus ab illo, jam pallet, livet, terret, venustatem omnem exuit. Ita prorsus, quia Conscientiæ perversæ consilia & facta sunt mortua, ideò illa Strophio candido velat, panno tegit Holoferico. Quid Thesauri sub hoc involucro? Foetens mortuus.

Job princeps Hustæus, optimæ conscientiæ, obrectatoribus suis insultans:

sultans: Si abscondi, ait, quasi homo peccatum meum; & celavi in sinu meo iniquitatem meam. *a* Dicti Chrysoftomus intrepres: Rectè factorum, inquit, nullum testem quærebat, erratorum cunctos esse confcios optabat sciens peccata confessione deleri, ideò noxas confessus publicè. Sed nec aliter rex Sionis David: Injustitiam meam, inquit, non abscondi. Dixi, confitebor adversum me injustitiam meam Domino. Illo ævo genus fuerat publicæ confessionis, oblatio pro peccatis. Hinc vitio datum Abscondere, dissimulare, nec erroris nec doloris indicium monstrare. Rex impius Saul dolenti similis, sed longè aliter quam David: Peccavi, ait. Optimam hanc vocem pessimè corruptit iis, quæ addidit: Sed nunc honora me coram senioribus populi mei. Se peccasse non negat, sed videri talis recusat. Abscondi & dissimulari vult, quæ deliquerat. Signum evidens Conscientiæ non leviter inquinatæ. Hæc etenim cum sit inconsiderata, temeraria,

&

& in vitia flecti cerea, non sustinet lucem, consiliorum suorum arbitram: Tenebras & noctem pro tegumento habet.

## CAPUT XVIII.

*Bonæ Conscientiæ multiplex fructus.*

**M**Irabiles sanè lectos & lecticas in Brasilia sperio, si fides hystoriæ recenti. Cum enim Brasili nocentibus ac venenatis animalibus abundant, lecti vicem suspendunt rete, quod terram non contingat, in hoc dormituri decumbunt, admittuntque somnum sic in aëre suspensi. Hoc eorum lectus pensilis & lectica. Ita nullis expositi sunt virulentis besticulis, & mollius cubant, quam quorum somnus scamnum pro culcitra habet. Bona Conscientia non mollis solum, sed & securus est lectulus, quamdiu quis huic indormit, tamdiu sese à pestiferis orci belluis facile defendit. Quà ratione Conscientia tam bona quam mala sit noscenda, quæ utriusque sint signa, diximus, superest, ut bonæ Conscientiæ fructus & emo-





emolumenta præmissis scripturâ & picturâ exponamus.

## SCRIPTURA.

*Bona est substantia, cui non est peccatum in Conscientia. Eccli.*

*c. 13. v. 30.*

## P I C T U R A.

*Mensa, in qua testudo insidente citada :*

*Speculum ad parietem pendens : scutum mensæ acclinatum :*

*Tabulæ Mosis cum palma : Galea apta redimita lauro, & apiculæ pervolitantes eam.*

**P**rimus bonæ Conscientiæ fructus, emolumentum primum est. Solatium in omnibus adversis maximum, quam testudo notat. Salomonis effatum jam supra produximus : Secura mens quasi iuge convivium. Nunci opportunius explicandum. Fingamus animo convivium longè lautissimum & voluptatis summæ. Sint primò fercula multò selectissima. Æsopi patina, cerebrum Jovis, Ambrosia. &c. Sit deinde vinum dominicum, Optima-

mianum centum annorum, Creticum, Falernum, nectar merum, quale nec suis convivis posuit Assuerus. Sint tertio amici primæ admissionis optimi, jucundissimi. Sit quarto confabulatio multo suavissima. Nam sine hac nec cibus nec potus sapit nec amicitia. (Desit sermonis hilaritas, convivæ veluti boves muti ad præsepe stabunt.) Sit ergo tale convivium, in quo lætitia & voluptas imperet. Fieri quidem potest, ut vel negotia vel litteræ interveniant, quæ aliquid absynthii huic salsari mensæ mifceant, nihilominus Modimperator: Vivamus, inquit, hilariter & arrepto poculo. Te posco, cognate; Non aufugiet, qui nos exspectat, labor; cras videbimus. Vivamus hodie. Sed ah, quantillum est illud Hodie? Summum diecula dimidia. post omnis illa convivialis hilaritas in plumis & pulvillis sepelitur. Quid si ea duraret hebdomadem, quid si mensem, quid si annum dimidium, quale fuit Assueri? quid si duraret annum integrum? & quidem eodem gaudii ac voluptatis tenore? semper recens & absque  
ullo



ullo fastidio? At qui revera tale convivium est Conscientiæ tranquillæ. Hic cibi sunt exquisitissimi, tot honestæ actiones, tot virtutum officia perfecti labores jucundi. Hic vinum est dominicum, charitas seu gratia Dei, lætificans cor hominis. Hic amicorum intimi, fidissimi, Christus & beati Angeli. Hic orationes fervidæ, amicissima sunt colloquia. Nihil hîc deest, quod faciat ad sincerissimam voluptatem. Convivia illa diaria, initio famem habent & appetentiam; fastidium & nauseam in fine; incipiunt gaudiis festivissimis, sed sæpe tritissima illorum est clausula. At convivium Conscientiæ sibi semper simile est, dies noctesque durat, perpetuum est, gaudia illius finem nesciunt, jube convivium est.

Rex Ezechias mortifero morbo affectus, & tamen convivatus. Obsecro Domine inemento, quæso, ait, quomodo ambulaverim coram te in veritate, & in corde perfecto, & quod placitum est coram te, fecerim. <sup>a</sup> De mensa sibi regiâ non gratulatur, ex

ea

ea nil sapit, sed bona Conscientiâ lætatur, illius fruitur delitiis. Paulus afflictissimus, jamque semimortuus, tamen velut lautissimam accumbens mensam: Bonum, inquit, certamen certavi, cursum consummavi, fidem servavi. En tanquam temulentus loquitur, & addit: In reliquo reposita est mihi corona justitiæ, quam reddet mihi Dominus in illa die. a Paulus plagis opertus, ærumnis cinctus, omnibus tamen lætitiis incedit, jubilat, exultat gaudio. Nimirum hæc sunt cupediæ, hi missus delicati, hæc scitamenta Conscientiæ tranquillæ; hoc Jovis cerebrum, hoc vinum regium, hoc creticum & Falerium, hic Christus & Angeli epulares amici. Super omnia convivii hujus continuatio est, vivacissima beatitudinis æternæ prægustatio. Hic securè agitur, hic molliter cubatur, hic suaviter dormitur: Huc animalculis venenatis non est accessus. Res liquet. Nec Marco Tullio id ignotum, qui de purioribus his solatiis mentionem injiciens: Conscientia rectæ voluntatis, inquit,

inquit, maxima consolatio est rerum incommodarum. *a* seu, quod nos asserimus, solatium in omnibus adversis maximum. Juge convivium, bona Conscientia.

Alter bonæ Conscientiæ fructus : *Oraculum est in dubiis minime dubium* velut speculum, quod inspicienti manifestat ignotos nævos, oris aut frontis. Si quid olim caussarum aut litigii gravioris fuerat Hebræis, ejus decilio per Moſen ab oraculo petebatur. Quod divinæ litteræ his verbis asserunt: Omnis populus, qui habebat aliquam quæſtionem, egrediebatur ad Tabernaculum fœderis, extra castra. *b* Hic Moſes Numinis consulta, & constituta religionum petiit, & abstulit decreta super omni dubitatione, cui ipse respondere non potuit. Loquebatur enim Dominus Moſen facie ad faciem, sicut solet loqui homo ad amicum suum. *c* Hic facilis erat interrogatio, quia explicata fuit responsio. Tabernaculum nobis in-

S

hic

*a* Cic. l. 6 famil. ad A. Torquatum. *b* Exodi 3. v. 1. *c* Exodi ib. v. 11.

hic omnium poenę dubitationum potest fieri decisio bonā fide & absque dolo malo. Quoties cogitatione pendulā hāremus, anxii & incerti, quid agendum: Recurre ad tabernaculum tuum, Conscientiam tuam interroga. Multa facimus, in quibus ipsi nobis bellissimē satisfacimus, quia parum expendimus agenda, nec suā res trutina examinamus. Recurre igitur ad tabernaculum, interroga Conscientiam. Mille millia verborum temere profundimus quotidie, & alterius damno frequentissimē: insuper etiam defendimus. Recurre ad Tabernaculum, Conscientiam interroga, an non his dictis alterum confoderis? Interroga & responsum audi, non ut Pilatus, qui quærebat, Quid est veritas. *a* & dum quærebat, sermonem abrumpebat, & forās progressus responsum amputabat. Gravissima olim querela fuit Numinis de populo Hebræo, quem Isaïas, Dei personam induens, sic arguit: os meum non interrogastis. *b* Conscientia nostra, os Dei, hoc ore nobis respondet Deus, sed

d in abdito, & oraculis arcanis.

Tertius fructus, Conscientia Bona  
*firmamentum in prosperis est tutissimum.* quod monstrat scutum mensæ  
 oppositum. Fortunæ blandienti quis  
 dat? At ubi fideliter sincera est  
 Conscientia, pes providus, si non  
 constanter figi, saltem tutò poni po-  
 test. Mox enim aderit Conscientia &  
 documenta suggeret in hunc mo-  
 dum: Etiam si hæc & hæc & hæc etiam  
 erdas, non ideò infelix eris. Multos  
 actura rerum ditavit. Eruditum lu-  
 randi genus est, perdere. Omitte  
 questus, & tuis te necessitatibus at-  
 tempera. sic non solum miser, sed &  
 infelix esse disces. Utrumque in tuum  
 commodum. Utcunque res cadant.  
 divitias tu tuas non amittes. Quod  
 Siracidæ tutò credes affirmanti: Bona  
 est substantia, cui non est peccatum  
 Conscientia. a Quod Siracidæ  
 monitum Bernardus pulcherrime di-  
 cens & explicans: Nihil est jucun-  
 dius, inquit, nihil tutius bonâ Con-  
 scientia. Premat corpus, trahat Mun-  
 dus, terreat Diabolus, illa erit secu-

ra. *a Nihil ditius.* Argentum, Aurum, gemmas pretio longe superabona Conscientia. Divitias Christus spinas vocavit, non solum quia innumeris pungunt sollicitudinibus, sed etiam quia sæpius malis artibus comparantur. Cui enim Vibrans & acropronuntiatum Hieronymi ignotum. Omnis dives, aut iniquus ipse, aut iniqui hæres. *b* Opes igitur & divitiæ sunt spinæ; nil autem ditius bonâ Conscientiâ. Simul etiam. *Ni-  
zuti*; Veteri poëtæ, Murus est athenus; nil conscire sibi. In præcella-  
rupe decumanos maris fluctus & max-  
tillima naufragia tutis spectare licet:  
ita bonæ conscientiae homo tam ira-  
tam quam blandientem fortunam  
infra se despicit, ridetque stultas  
mortalium lacrymas, qui de obolo,  
aut de lana caprina digladiantur, &  
victi deplorant damnum. Ajunt  
baccas è cochleis margaritifera longè  
terstiores ac lucidiores fieri sub  
stercore columbino: Bona Conscien-  
tia Margarita lucidissima, in rebus  
pro-

*a Bern. de int. domo cap. 22. b Hieron. ad He-  
braeos ep. 1.*

prosperis splendet, in adversis ac turbidis splendorem non perdit, sed auget, velut exaluminatus unio. *a* Talis beatus Paulus: Confidimus, inquit, quia bonam Conscientiam habemus, in omnibus volentes bene conversari. *b* Non solum autem Conscientiâ bonâ nil ditiùs, nihilque tutius, sed etiam nihil jucundius, quia convivium instruit perpetuum, & quidem quale Isaias depinxit; convivium pinguium, convivium medullatorum, convivium vindemiæ defæcatæ. *c* Defæcata verè vindemia est Conscientia: non hîc vinum alienigena, non fugiens, non vappa, non exolescens, non marcidum, non accescens, sed generosum, sed meracum, sed defæcatissimum ponitur. Hîc suave prorsus est convivari.

Quartus fructus: Bona Conscientia Norma, lex & præscriptum est agendorum omnium, quod tabulæ Moïsis connotant. Principio scriptionis hujus diximus, nunquam licere contra  
S 3 scien-

*a* Wie ein halbtters schöns sein Verlein.

*b* Hebr. cap. 13. v. 18. *c* Is. cap. 15. v. 6.

scientiam agere. Huic legi quam Deus pectoribus nostris inscripsit, fideliter parendum est in omnibus.

Sed objicias; Quid si erret Conscientia? Ajo; nec errantis quidem dictamini contrarium facere, permixtum. Exemplo, quod dicitur, monstramus. Est cui conscientiae lex dicat: Eo die quo Corpus Domini sumis, non licet tibi in terram expuere. Errat profectò hæc Conscientia, sed ille, qui eam habet, dum habet, obligatur, non repugnare, adeoque in terram non expuere. Sed longè rectius hic fecerit, si falsum hoc conscientiae dictamen penitus exclusisset, & ipse sibi dixerit: Nullum est peccatum, illo etiam die, quo sumpta est Eucharistia, humum despuere.

Quapropter quod nativæ huic luci ac notitiæ, huic legi domesticæ ac regulæ contrarium est, id malum & peccatum est. Quod supra læpius, hoc ipsum hîc ingerimus: Quod non est ex fide, peccatum est. *a* Ad sciathericum hoc Horologium. *b* nostræ actiones omnes sunt moderandæ, gno-







gnomon a illius ordinario progressu non errat, nisi horologium sit perturbatum, quod non adeò infrequens est. Nam Horologio huic idem nonnunquam evenit, quod paganis illis, quæ imperitus faber ferrarius aut ædificator, vel sacrista rusticanus indocta manu dirigit & curat. Ita certè conscientia ex se non fallax, non male-suada, non imprudens aut præcipitans, sed sæpe curatorem habet indoctissimum qui vitiosis scatet affectibus, qui se neglecto fatagit in alienis. Et hinc istius horologii errores & deliria, hinc imperita Conscientiæ dictamina. In culpa est non ipsum Horologium, sed ipsius curator. Absint tot affectus pravi, & gnomon Horologii fideliter nunciabit horas, optimè monebit officii, noxas minimè dissimulabit.

Bernardus Domesticum hoc Horologium peritè gubernandum docens, Bona est, inquit, conscientia, quæ omnibus dulcis est, nulli gravis. utens amico ad gratiam, inimico ad patientiam, omnibus ad benevolentiam,

tiam, quibus potest ad beneficentiam. Bona est conscientia, quæ habet in corde puritatem, in ore veritatem, in actione rectitudinem. *d*

Quintus fructus: Bona Conscientia luculentum beatitudinis testimonium, quod laureata docet galea, quæ non tam securitatis tesseram, quàm cælestis dulcedinis argumentum exhibet, & officinam mellitissimæ suavitatis. Ante annos viginti signa duodecim divinæ Prædestinationis libro singulari proposui, quem Zodiacum inscripsi. Quod si duodecim hæc signa in unicum sint conflanda, hoc bona erit Conscientia. Quod Bernardus apertissimè affirmans. Futuræ, inquit, beatitudinis nullum est certius testimonium, quam bona Conscientia, & qui custodierit illam, semper erit in gloriâ cum Angelis. *b* Sed eò non pertingit nisi Conscientia, quam Bernardus omnibus dulcem, nemini gravem appellat. Sed hanc maximè conspurcat flagitium duplex, usitatissimum, quod subjungo;

jungo ; nempe libidinis & linguæ.

Si nullum penitus in orbe peccatum committeretur nisi linguæ , ac libidinis seu luxuriæ , cælum odisset meritissimò hunc orbem , & conspueretur , propter innumeras sordes tot foetentium Linguarum ac Libidinum. Exundat orbis hac geminâ peste. Non est qui bonum loquitur , non est usque ad unum. Num etiam addam ? Non est qui animum seriò castum fovet , non est usque ad unum. O libidinem humanæ gentis extremam perniciem ! O linguas gehennæ incendium atrocissimum ! Quàm infinitus quotidie numerus Adulationum , blasphemiarum , detractionum , calumniarum , mendaciorum & perjuratorum in orbe acervatur ? Quis contineat vocem , & non interroget ? O mortales , ubi vestra est Conscientia ? num ea sermones tam flagitiosos , tot pudendas libidines velut struthio-camelus ferrum , concoquere potest ? O Lingua , ô Luxuria ! ô geminas gehennas , quæ quotidie innumeros deglutiunt mortales ! ô voragines & barathra , quæ quavis horâ infinitas

tas mergunt animas ! ô abyſſos & ſine fundo foveas, quæ humanum genus dies noctesque ſorbent & hauriunt ! Linguae & Luxuriæ ignis, conſcientiam vaſtat, gehennam ditat, & in ignes præcipitat æternos. Lingua & luxuria præ aliis vitiis ſeverè ad Chriſti tribunal ventilabuntur. Di- verſa in orbe hoc noſtro ſunt tribu- nalia ; ſunt urbica & forenſia ; ſunt ſacra & religioſa ; ſunt oppidana & ruralia ; ſunt comitialia & provincia- lia ; ſunt regia & ſuprema ; eſt Cæſa- reum Spirenſe. Atqui fieri poteſt, ut quis manibus aureis hæc omnia per- rumpat, ſed hæreat in ultimo. Tres porro iudices præcipui ſunt, Mun- dus, Unuſquiſque noſtrum, & Chri- ſtus. Judicium Mundi fallaciſſimum, millies iterumque millies errat, & inſontes ſæpiſſimè plectit, perinde ut fontes : contra nocentes cum præ- miis, velut optimè meritos dimittit. Inſanit qui hæc Mundi judicia ſuſpi- cit. Non eſt, mi homo, quod tibi gra- tuleris, tametſi iudicium Mundi cum laude ſuperaris, reſtat tibi de teipſo tuum, & Chriſti iudicium. Si in tuo  
candi-

candidum feras calculum, & litteram faventem, æquo sis animo & optimè spera, ad tribunal Christi te pulchrè staturum. Nam prima est hæc ultio, ut supra doctus es ab Aquinate satyrico, quòd se iudice nemo nocens absolvitur. Quisquis igitur à domestico suæ conscientiae tribunali abit indamnatus, vix causâ cadet ad Chrismi tribunal. Siquidem è protocollo cuiusque conscientiae ferendum iudicium.

Est igitur bona Conscientia gloriæ cælestis fidelissima tessera, & luculentum beatitudinis æternæ testimonium. sinu fert abditam cæli syngrapham, qui bonam semper nutrit conscientiam.

## CAPUT XIX.

*Ante omnia curanda est Conscientia.*

**C**Hilon Philosophus jam ævo gravis, quod Laërtius memorat, se nullius sibi conscium agebat, cuius poeniteret, re unicâ exceptâ. Interrogatus, quid unum illud angeret:  
Ad

Ad quæ Chilon: Rogatus sum, inquit, ut arbitrum agerem inter duos litigantes amicos, eosque reducerem in concordiam. At ego ne quid contra jus fasque agerem, & uni propensius faverem quam alteri, persuasi utrique, ut quidquid esset litigii ad alium arbitrum deferrent. Ita legem non offendo, (ratiocinabar ipse mecum,) & amicos servo; Hic scrupulus angebat senem sibi ipsi occinentem. O mi Chilon, si illis parvulam hanc gratiam gratificatus fuisses, non tamen jus æquum violasses: etiamsi amicorum alter amicitiam renuntiasset, modò tu justitiæ amantior, quam popularis auræ perstitisses.

O Conscientiam, in homine non Christiano, mirè teneram! Si itud magnus aliquis Antonius, si Hilarion, aut Paphnutius dixisset, laudem non modicam tulisset. Hinc sanè liquet, quantum naturæ lumen, quod Deus pectoribus nostris indidit, adjumenti adferat, si affectibus malignis non extinguatur. Agebatur Chilon conscientiaæ stimulis, non quod egisset male, sed quod melius agere negle-



glexisset. His talibus exemplis Deus suaviter monstrat, quid possumus facere. si velimus; & unâ etiam ostendit sapientissime non scientiam deesse, sed conscientiam, de quâ locuti hactenus multa satis ad captum, pauca pro thematis amplitudine. Instituti mei erat, mi Lector, in hoc libello, (ne cramben tibi appositam putares) noscendam dare Conscientiam: excutiendam meus te Trismegistus docet.

Hic modò si à te impetrem, ut tuam ipse Conscientiam nosse incipias, satis effectum credam. Salutis principium, arcana sua non ignorare. Sed antequàm dictionem hanc omnem epilogo claudam, hoc unum moneo. *Ante omnia curandam esse Conscientiam.* Moniti hujus rationem jam reddo hoc capite.

## SCRIPTURA

*In hoc & ipse studeo sine offendiculo Conscientiam habere ad Deum, & ad homines semper. Actor.*

c. 24. v. 16.

## P I C T U R A.

*Hinc incendium , hinc naufragium ,  
media testudo sub suo fornice cum hac  
inscriptione : salvâ domo , salva  
mihi omnia.*

**C**Uranda ante omnia esse Conscientiam causa prima, & causarum omnium est causa, voluntas divina. In Jobi patientissimi tragico-comœdia Deus illustrissimâ scenâ docuit, velle se hunc prophetam, hunc nuntium, *Conscientiam*, superesse semper, & vivere. Cùm omnes Jobi facultates in Satanæ potestatem essent traditæ, Satanæ impugnare Jobum sic est aggressus. Boves arabant, & juxta pascebantur asinæ: subito irruerunt Sabæi, & omne pecus abegerunt, & custodes pecoris interfecerunt, mox nuntius pervolavit ad Jobum, qui diceret: Evasi ego solus, ut nuntiarem tibi. Nondum ille desiderat loqui, cùm supervenit alius, dixitque: Ignis cælo lapsus, omnes unâ oves ac opiliones consumpsit, & evasi ego solus, ut nuntiarem tibi. Sed illo adhuc loquente, venit alius qui  
grandi





grandi ore clamavit: Chaldæi divi-  
lis tribus turnis impetum fecerunt  
in camelos, & abegerunt illos, servos  
autem occiderunt, & effugi ego so-  
lus, ut nuntiarem tibi. Nondum ille  
finierat, & ecce, adest alius, qui lu-  
ctuosè vociferetur: Cum filii tui &  
filiae in ædibus primogeniti Fratris  
convivarentur, irruit turbo & quassa-  
tam domum evertit, ita liberi tui una  
omnes ruina sunt sepulti, & effugi  
ego solus, ut nuntiarem tibi. *a* Quid  
obsecro Deus voluit, ut unicus sem-  
per è strage grandi evaderet tristissi-  
mus nuntius? Effigies conscientiae  
fuit. Vult Deus hunc prophetam,  
hunc nuntium, tametsi narret ingra-  
tissima, semper vivere, perpetuò su-  
peresse, ubique locorum evadere, ut  
suo Domino, quicquid denique nun-  
tiandum est, nuntiet liberrimè: Etsi  
pecuniam omnem prædones rapiant,  
etsi conjugem & liberos mors tollat,  
etsi ædes incendium hauriat, nihilo-  
minus currat hic nuntius, adsit Con-  
scientia, & dicat: Animos erige; non  
ideò tibi Deus iratus est, quando ali-  
quan-

quantulum durus est : exercet te , ut muneret te ; corripit ut instruat , deprimat ut attollat ; modica morula est , momentum est , quod affligit , æternum erit , quod lætificabit. Aut vertat stylum conscientia , dicatque : Hæc quæ pateris , omnino meritis es , & multò graviora. Tu igitur hanc necessitatem in rationem verte , & virtuti operare vel invitus. Deum jam sanctius cole. Effugi ego solus , ut hæc nuntiarem tibi. Vivat hic nuntius vivat , qui præ omnibus est audiendus. Conscientia ante omnia est curanda.

Altera causa : Non est major interioris hominis miseria , quam miserum esse , & nescire se esse. Hic certè geminato malo miser est : malum primum est , Dei gratiam perdidisse , adeoque jam pauperrimum esse. Malum alterum est , extremam hanc egestatem suam ignorare , & divitem se credere. Christus Joannis ore severas minas jaciens : Incipiam te , inquit , evomere ex ore meo , veluti aquam , quæ nec calida nec frigida est. Quia dicis ; quod dives sum ,

& locupletatus, & nullius egeo, & nescis, quia tu es miser, & miserabilis, & pauper, & cæcus & nudus? Plerumque periculosissimè decumbunt, qui scire nolunt se ægrotare. Sic animo sunt miserrimi, qui suas ipsi miseras amant, quia ignorant. Horum plurimi sunt, qui gravius quidem delinquant, sed monente conscientia ingemiscunt, & facti poenitent. Hoc quidem simplex est miseria. Alii pariter iniquè agunt, sed moventem conscientiam non audiunt, miseras suas aut oculis cæcis transcurant, aut blandis inspiciunt, & se miseros esse non credunt. Ita nec nuntius quidem cladis superest. Quis enim silente conscientia, suam homini nequitiam in os opprobare audebit? Is militiæ Historicorum mos est, ut ædem copiosissimam, & cladem maximam significaturi, nec nuntium quidem cladis superstitem fuisse dicant. Haud aliter homines illi qui conscientiam pænè jam suffocarunt, miserrimi sunt censendi, quia jam fidus illis nuntius deest, qui currat & clamet:

T

met:

met: Effugi ego solus, ut nuntiarem tibi. Idcirco Christus imminens Hierosolymis exitium deplorans. Quia sic cognovisses, inquit, & tu, & quidem in hac die tua, quæ ad pacem tibi. O Hierusalem, innumeris quidem flagitiis cooperta es, sed superesset etiamnum remedio locus, modò tu tuam agnosceres miseriam. Misericordiarum omnium extrema est miseria: verè miserum esse, sed illud ignorare, & sibi de felicitate nescio quā inaniter blandiri. Malè facere, supplicium meretur; malè facta non agnoscere aut defendere, gemino dignum supplicio. Hoc enim est nuntium cladis jugulare, conscientiam velle extinguere. Ante omnia igitur cura conscientiam, & quicquid perdas, hanc servare memento.

Tertia causa Illæsa conscientia omne malum tolerabile. Rectè dixeris. Bona conscientia clypeus est adversus omne malum. Poenæ malum intellige, non culpæ. Innocentius Pontifex, uti Nicephorus narrat, Chrysostomo variis ærumnis exagitissimo, litteras misit hoc monito:

Vide



Vide ne plus possit adversariorum injuria, quam bona conscientia. Omnia namque sustinere debet, qui Deo primùm, deinde suæ quoque confidit conscientiae. Ajacis clypeus septemplex intemerata Conscientia. Clypeus priscis pars magna victoriæ vel partæ vel perditæ. Clypeum abjecisse ingens dedecus erat: è bello redire sine clypeo, probrum immensum. Hinc virago Lacæna filium militiam ablegans: *Cum hoc*, aiebat, *aut in hoc redi*. Clypeus noster adversus omnem malorum turbam impenetrabilis, Conscientia macularum expers. Cum hac vivendum, moriendum.

Valerius M. celebrat. M. Cassium Scævam, centurionem admirandæ fortitudinis. (Cæsar Suævam vocat. *a*) Hic in Dyrrachio propugnando, capite, humero, fæmoreque faucius, & eruto insuper oculo scutum Imperatori exhibuit 230. telis perforatum; quo testimonio meruit millibus æris ducentis donari, & ad primipilum promoveri. Aliàs ad in-

T 2

sulam.

fulam Britannicam è scopulo, desertus à suis, tamdiu unus restitit ingenti hostium numero, donec tragula femur trajectus, saxique pondere ora contusus, galeâ discussâ & scuto crebris foraminibus absumpto, profundo se credere coactus est, ad Cæsarem enataturus: quod etiam præstitit nihil vulneribus neque duplici loricâ impeditus. Quem Cæsar amanter exceptum cum laudare pararet; Ipse loquentem interpellans: Da veniam, inquit, optime Imp. da veniam ignavo militi, quòd scutum reliquerim. Factum hoc Valerius ipsi fortitudini præferendum censuit. Magnus, inquit, prælio fuisti, ô Scæva, sed major disciplinâ militari. *a*

In spirituali pugnâ non tantum dedecus, sed & damnum maximum, hoc scutum relinquere. Omnia igitur si perdas, conscientiam servare memento.


Quarta causa: Conscientia est columna, cui omne spiritale ædificium innititur. Ruit columna, tota ruendo sequitur structura. Lætaban-  
tus















tur Philistæi suæ potestatis esse Samsonem. In argumentum lætitiæ dies festos agebant, epulas instruebant; convivii acroama erat eductus Samson è carcere, ut lusu cæco recrearet satrapas. Exoculati gradum regebat puer, cui Hebræus: Sine, inquit, ut geminas columnas, quibus structura omnis imminet, tangam, quò mihi paullulum liceat respirare. Atqui domus virorum & feminarum refertissima, circiter tria millia spectatorum habebat, quos inter Philistæi quoque principes Samsonis lulum spectabant. Ille, exorato Deo columnam utramque, quibus tota domus nitebatur, apprehendens: sepe-liar, inquit, hac ruina cum Philistæis; quassatisque vi maximâ columnis, tota domus corruit, & omnem illic multitudinem oppressit: multoque plures interfecit moriens, quam ante vivus occiderat. a Spiritale nostrum ædificium, structura mirabilis & longè capacissima, duas habet columnas, quibus omnis domus imminet, Dei gratiam, & Conscientiam

bonam, sibi proximas, ruente unâ,  
ruit & altera; pari stant, caduntque  
concordiâ. Ante omnia ergo curan-  
da Conscientia, & non deerit divi-  
na gratia. Nihil ei salvum qui læsam  
gerit Conscientiam. Quod Grego-  
rius observans sedulò: Quid, ait,  
tibi proderit, si te omnes laudent, &  
Conscientia accuset? Aut quid ob-  
esse poterit, si tibi omnes derogent,  
& sola Conscientia defendat. *a*

Eam ob causam Augustinus, quod  
supra insinuavi, Secundum Manichæ-  
um impugnans, & Conscientiæ scu-  
tum libertate maxima vibrans: senti,  
ait, de Augustino, quicquid libet,  
sola me in oculis Dei Conscientia  
non accuset. *b* stet columnen istud,  
& unâ stabit totum spiritûs ædifici-  
um; dejecto columine illo, quicquid  
incubuit molis, concidet. Ideò Ber-  
nardus cautè incedendum docens,  
nihil, ait, æque exasperat illius tre-  
mendi iudicis Majestatem, quam  
peccare & securè peccare. Dejecta  
autem jacet hæc columna, cùm pec-  
candi

*a* Greg. hom. 6. in Ezech. *b* Aug. tom. 6.  
lib. contra Secund. Manich. c. 1.

candi securitate deprimitur conscientia. Vt ergo cures animam, ante omnia cura conscientiam.

Quinta causa: salvâ conscientia  
salva homini omnia. Erecta stet hæc  
quam diximus, columna, & firma  
erunt universa. Diogenes Cynicus  
cum adolescente collocutus, cum il-  
lius vitia nonnihil tangeret, colorem  
duxit adolescens: Cui mox Philoso-  
phus salva res; erubuit. Vivit etiam-  
num in hoc homine conscientia.  
Nam signum conscientia nondum  
extinctæ, verecundus rubor. Afflic-  
tiones in Orbe plurimæ, maximæ, diver-  
sissimæ, atque hinc querimonie infi-  
nitæ. Est qui ad pauperiem extremam  
& ad saccum se detrusum ingemis-  
cat; alius ad ima se subsellia deje-  
ctum & postremissimum se censi  
queritur. Num vobis, o viri, bona est  
conscientia? Benè est, salva sunt om-  
nia. Alii charissimorum funera de-  
plorant, alii morborum sævitiam aut  
diuturnitatem accusant: si inter fu-  
nera & morbos bona est conscientia,  
salva sunt omnia. Alii negotiorum  
molem, & edaces curas, grande putant  
sup-

supplicium; alii perditos favores humanos, & amissam principum gratiam, vel morte gravius censent. Si nondum perdit sit bona conscientia, salva sunt etiamnum omnia. Alii obrectatorum insectationes, & capitales insidias iniquissimè ferunt; alii tot adversos & acerbos casus sibi arbitrantur intolerabiles. Tolerabilia planè ac salva sunt omnia, si adhuc bona sit Conscientia.

Est qui malè se habere credat, & tamen penè nesciat, quâ corporis, quâ parte animi laboret. Fortassis parum sana est Conscientia? Tange, & explora, hîc ulcus, hîc vomicam invenies. Ergo nihil huic salvum est, quamdiu illi salva non est Conscientia. Non dignitates non voluptates cum verè oblectant, quem accusat & affligit Conscientia. Adversetur Orbis, & bellum in nos moveat: Quæta & salva erunt omnia, modò bona nos defendat Conscientia. Ita verè res se habet; nihil in homine sanum est, cum ægra est Conscientia: sed & contra, nec sexcenti morbi officiunt, cum rectè valet Conscientia.

Hoc

Hoc à naturâ beneficii serpens accepit, quomodocunque demum laceretur, & discerpatur, modo saluum & integrum conserveat caput, confectas partes non difficulter in pristinam compagem colligit: Ita omnino saluum integrumque sit hoc hominis caput, illæsa sit conscientia, & nulla quantuncunque damnorum ac calamitatum vis poterit nocere. Verissimum enim est Ecclesiæ priscæ sapiens oraculum? Nulla nobis nocebit adversitas, si nulla nobis dominetur iniquitas. *a* Salvâ Conscientia, salva omnia. Conscientia igitur ante omnia est curanda.

O Pilate, Pilate, quam pro conscientia egisti fortiter! modò egisses etiam tam constanter. Hominem infontem cruci suffigere, tua recusabat conscientia. Optimè hoc quidem; dummodò bene cœptis inhæsis; dummodò à recti semitâ te dimoveri passus non fuisses. Lingua tua cum conscientia tua bellissimè consensit: Hinc publicæ voces illæ: Nihil causæ invenio in hoc homine, in-

no-

*a* In mista ser. 6. post cineres post communem.

nocens est Christus. Rectissima sententia, Romano præside digna. Synteresis tibi suggestit: Nemo insons est damnandus. Conscientia subjunxit; hic homo est insons (sciēbas enim quod Iudæi eum per invidiam tradidissent) facillima erat conclusio: Ergo hic homo non est damnandus.

Hunc Syllogismum quem Synteresis & Conscientia simul struxerunt, Pilatus concoquere non potuit, hinc in omnem sese partem torisit, ut conscientiam tueretur. Interim Pontifices instabant, populus repetitis vocibus clamabat, Crucifige Crucifige, Christum omnes ad crucem postulabant. Quid hinc faceret iudex Romanus, sanè in arcto deprehensus. Tentavit omnia ut has montis oppositi fauces angustissimas penetraret; omnem movit lapidem ut evaderet salvâ Conscientiâ. Primum ergo ivit ac rediit sæpius, & Christum innocentem coram omni populo pronuntiavit. non successit. Deinde vinctum hunc reum ad Herodem misit, ut ipse in populares suos jus diceret, Romanis in hanc rixam  
non

non commissis, non successit. Tertium ergo tentandum effugium, sed conscientia jam plurimum læsâ. Infontem Christum tradidit flagellandum, sperans illos hac ignominia mitigandos. Sed nec hoc successit. Adhuc popularis furor supplicium crucis urgebat. Quartò igitur Barabbam latronem nequissimum composuit cum Christo, & petituris optionem fecit; liberarent, quem vellent: nihil dubitans, illos innocentem manifesto nequam homini longè ante habituros: Nec hoc successit. Nam universus populus clamavit: non hunc, sed Barabbam. Quintus igitur tentandus exitus: Christum flagellis fædissimè laceratum, & conduplicata sanguinis & muricis purpura velatum ex edito probè spectandum monstrat. At minus prioribus successit; quò magis aspiciebant, hoc magis furebant, velut tauri cruore viso. Tandem ergo Pontius, tanquam Conscientiæ suæ inligniter satisfactorius, spectante populo lavit manus: interim eodem ore, quo Christum sæpius infontem dixerat, jam veluti la-

latronem nocentissimum in crucem attollendum pronuntiavit.

O Pilate, non aquâ eluitur Conscientia, nec si totum illi Oceanum infundas: non aquâ, ô Praeses magne, non aquâ, sed justitiâ placatur, & poenitentiâ purgatur Conscientia. Outinam, Ponti, conscientiam defendisses constantius? Sed humanus timor, Imperatoris gratia forte perdenda, popularis furor, eparchia forsitan adimenda, tuo te statu moverunt, conscientiam rectam eripuerunt: & in miseras præcipitarunt extremas, nunquam terminandam æternum duraturas.

Exemplum enim omni æternitati sacrandum Pontius Pilatus est; qui Conscientiam suam abiecit, ut Cæsaris retineret gratiam, & infelix utrumque perdidit. Conscientia ante opes, ante gratiam, ante honores, ante omnia fuerat curanda.

Finio cum Bernardo, qui Henricum Senonensem Archiepiscopum ad Conscientiæ culturam excitans. Duo sunt præcipuè, ait, quæ bonam reddunt Conscientiam: *Et pœnite-*  
*re de*



*re de malis , & abstinere à malis : Hoc est , ( ut verbis beati Gregorii loquar : ) Et commissa flere , & fleenda non committere. Horum neutrum solum sufficit. &c. Utriusque virtutis bene conscius animus securè jam se ipsum deferat , & quodammodo perdat , ut alios lucri faciat. Cum tali conscientia nihil formidet , exemplo Hieremiæ & Ezechielis in Ægyptum vel Chaldæam cum transgressoribus captivari , & cum sancto Job frater fieri draconum & socius Struthionum. <sup>a</sup> Cum Mose quoque ( quod gravius est ) deleri de libro Dei. <sup>b</sup> Et cum Paulo anathema esse à Christo pro fratribus , <sup>c</sup> non timeat cum hujusmodi conscientia. Ipsam denique si necesse est intrare gehennam securus , medias penetrans flammæ læta decantet conscientia : Et si ambulavero in medio umbræ mortis , non timebo mala , quoniam tu mecum es. Comparemus , si placet , Thesauros Regum & Fastigia Regnorum cum hujusmodi fiducia ; nonne cuncta horum*

<sup>a</sup> *Iob. 30. 29.* <sup>b</sup> *Exod. 32. 32.* <sup>c</sup> *Rom. 9. 3.*  
<sup>d</sup> *Psal. 22. 4.*

horum felicitas præ tanti boni divitiis miseria reputabitur? Et hanc fiduciam operator charitas de corde puro & *Conscientia bona.* a Hactenus mellifluus Bernardus. Tu, mi optime Lector illi morem gere, & ante omnia conscientiam cura, & salva erunt omnia. vale.

a *Bern. c. 41. ad Henricum Archi. Senon.*  
col. 5.



INDEX

# INDEX RERVM



Fol.

- A** Dulterium causa majoris mali 60  
 Agonizantis Stephani lucta. 153  
 Alomæonis pallium. 46  
 Alexandro Conscientia pro carnifice 53  
 Aulicus à Conscientia exagitatus. 140  
 Aulicus pœnitentiam male differt. 158

## B

- S. Bernardus scrupulis liberat. 104

## C

- Cadaveris aspectus pœna Parricidæ. 262  
 Caput piscis admonet sceleris. 105  
 Charitas erga proximum solatium mor-  
 tis. 161

- Cognitio sui ad felicitatem via. 206

- CONSCIENTIA** hominum tam  
 varia quam vultus. 20. ejus encomia.  
 26. Differentia cum Synteresi. 23.  
 Comparata libro. 24. Læctulo. ibid.  
 Speculo. 25. Byssò. 26. Oraculo. ibid.  
 Horologio. 27. Muro. 28. Gallo.  
 ibid. Cani. 29. Padagogo ibid. An-  
 tigraphæo. 30. Deo ibid.

- Remorsus ejus latronem cogit, ut se ju-  
 dici sistat. 32. jure convivium est 37.  
 Nepenthes. 38. Scyphus Ioseph. ibid.  
 laus itliius optima musica. 40.

Con-

- Conscientia Echinus inter canes latran-*  
*tes. 40. Paradisus. 41. ejus encomia*  
*ex Bernardo. 42. Refrigerat. 45. Or-*  
*nat præ vestibus. 46. Martyres in-*  
*expugnabiles facit. 48. Perperam*  
*mola dicitur. 50. Culeum parricida-*  
*rum repræsentat. 52. pro carnifice*  
*est. ibid. ejus tormentum gehennam*  
*præcedit. 55. Ejus nullum effugium,*  
*nullum solatium. 56. Cilicium per-*  
*petuum. 58. Aquila Promethei est,*  
*Titii vultur, vermis semper rodens. 59*  
*Errans consc. exemplis docetur. 67. &*  
*seqq. Quid sit Pharisaica. 77.*  
*Quid in dubio faciendum. 85. & seqq.*  
*Scrupulosa quid sit. 94. Origo Scrupu-*  
*lorum monstratur. 96. remedia sug-*  
*geruntur. 97.*  
*Quid Cauteriata. 110.*  
*Argo centoculo comparatur. 121. Fle-*  
*gello quod servos in ordinem redige-*  
*bat. 131.*  
*Quos effectus habeat tam bona quam*  
*mala. 132.*  
*Non extinguitur. 137.*  
*Nuntium Iobi repræsentat. 288.*  
*Vxorem objurgantem imitatur. 147.*  
*Actiões omnes quasi lapillis atris aut*  
*albis adnotat. 150.*

# I N D E X.

Bona in agone secura est.	153.
Clypeus est adversus omnia mala.	291.
Columna adificii spiritualis.	292.
Monitor præteritorum.	155.
Decem causa, ob quas diligenter excu- tienda.	193.
Conscientiam ante omnia curandam.	283.
Cordis palpitatio prodit homicidã.	168.
Cruciarum Crucem sibi ipsi ferebant.	55.
Culeus parricidarum.	51.

## D.

Dæmon odit locum pœnitentiæ.	202.
------------------------------	------

## E.

Emendatio vitæ male dilata.	158.
Equitis ob ærari securus somnus.	243.
Examinis faciendi 10. causa.	188.

## F.

Felicitatis via.	206.
Facies nulla similis alteri.	19.
Fur religiosus.	89.
Fures duo seipsos produnt.	130.

## H.

Homicida proditur cordis pulpitatio- ne.	I.	168.
---	----	------

Impœnitentis juvenis mors.	185.
Incestæ nuptiæ ex adulterio.	61.
Injustitia ex adulterio.	62.
Juvenis impœnitens.	185.

## V

Leti

# I N D E X.

## L.

<i>Letitia ex Conscientia,</i>	47.
<i>Latro seipsum sistit iudici.</i>	32.
<i>Laus cons. optima musica.</i>	39.
<i>Libertas religionis.</i>	229.
<i>Locus pœnitentiæ Diabolo exosus.</i>	203.
<i>Ludimoderator Anglus.</i>	229.

## M.

<i>Maledicta pati, quã loqui præstat.</i>	240.
<i>Malitia sui ipsius carnifex.</i>	52.
<i>Meditatio novissimorũ quid profit.</i>	252.
<i>Melas Eques porri succo perit.</i>	234.
<i>Mors impœnitentis aulici.</i>	141. 158.
<i>juvenis.</i>	184.
<i>Morientis pugna.</i>	153.
<i>Solatium ex præstita charitate.</i>	161.
<i>Mores fingunt Conscientiam.</i>	217.
<i>Musica optima laus.</i>	40.

## N.

<i>Nepenthes antidotum tristitia.</i>	38.
<i>Neroni cons. pro carnifice.</i>	53.
<i>Nuptiæ incestæ ex adulterio.</i>	61.

## O.

<i>Origo scrupulorum.</i>	96.
<i>Origines in cathedra obtumesce.</i>	115.
<i>Otiifructus.</i>	101.

## P.

<i>Pallium Alcmaeonis.</i>	46.
	Par

# I N D E X.

<i>Parricidii pœna.</i>	51.
<i>Peccatum in tentatione minimum, perpetratum fit maximum.</i>	127. 128.
<i>Periclis morientis solatium.</i>	161.
<i>Pœnitentiæ locum dæmon odit.</i>	203.
<i>Prodit homicidam cordis palpitatio.</i>	168
<i>Puluillus obæratî securè dormientis.</i>	
<i>R.</i>	243.
<i>Religio in minimis, contemptus maximorum.</i>	59.
<i>Religionis libertas præmium ludimagistri.</i>	229.
<i>S.</i>	
<i>Sacrificantis scrupuli.</i>	104.
<i>Sceleratorum crux conscientia.</i>	52.
<i>Sceierati crucem sibi præferebant.</i>	55.
<i>Scrupulorum origo 96 remedia.</i>	100.
<i>Scrupuli ex reverentia sacrificii.</i>	105.
<i>ex Blasphemia. 105. ex charitate omissa. 284.</i>	
<i>Solatium morientis Periclis.</i>	161.
<i>Somnus tranquillus obæratî.</i>	243.
<i>Supplicium Parricidarum.</i>	51.
<i>T.</i>	
<i>Themistocles laudè præ musica amat.</i>	39
<i>Thomas Morus cum morte jocatur.</i>	241.
<i>V.</i>	
<i>Via ad felicitatem sui cognitio.</i>	206.
<i>V 2</i>	I N-

# *INDEX. Caputum.*

- C** *Ap. 1. Quid sit Conscientia.*  
*Cap. 2. Conscientia bona thesaurus maximus, summum bonum.*  
*Cap. 3. Conscientia rea tormentum gravissimum.*  
*Cap. 4. Conscientia errans conscientia nulla.*  
*Cap. 5. Conscientia dubia peritè dirigenda.*  
*Cap. 6. Conscientia Scrupulosa tam erroris quam doloris plena.*  
*Cap. 7. Conscientia cauteriata plus errat quàm dolet.*  
*Cap. 8. Conscientia tam bona quàm mala, potentissima.*  
*Cap. 9. Conscientia inextinguibilis.*  
*Cap. 10. Conscientiæ vultus in morte hominis.*  
*Cap. 11. Conscientiæ vultus in funere Orbis.*  
*Cap. 12. Conscientiam non audire, principium interitus.*  
*Cap: 13. Causæ V. Conscientiæ quotidie examinandæ.*  
*Cap. 14. Aliæ V. causæ Conscientiæ quotidie examinandæ.*

*Cap.*



# I N D E X.

- Cap. 15. Conscientia bona quomodo  
acquirenda,  
Cap. 16. Conscientiæ bonæ, sive pur-  
gatæ signa.  
Cap. 17. Signa Conscientiæ perversæ.  
Cap. 18. Conscientiæ bonæ multiplex  
fructus.  
Cap. 19. Conscientia ante omnia cu-  
randa.



APPRO-

**A P P R O B A T I C**  
**P R O V I N C I A L I S**  
cum Privilegio Cæsareo.

**L**ibrum de Conscientia posthumum P. Hieremiæ Drexelii p. m. è nostra Societate Sacerdotis à deputatis Patribus censum probatumque. Ego Georgius Spaifer Societatis J E s u per superiorem Germaniam præpositus Provincialis facta mihi potestate ab admodum R. P. N. Generali Goswino Nickel publici juris fieri concedo. Potestatem insuper Joanni Wagner Bibliopolæ Monacensi facio, jus Cæsarei privilegii usurpandi, quo Typographis & Bibliopolis omnibus facultas adimitur, vulgatos à Societatis J E s u Patribus libros citra superiorum Autorumque consensum recudendi, aut intra S. R. Imperii ac Provinciarum Sacr. Cæs. Majestatis Hæreditario jure subjectarum fines importandi. In cujus rei fidem Chirographum hoc dedi, Officii mei sigillo munitum. Landspergæ. 17. Sept. 1652.

Georgius Spaifer.



2688-976



